

INSAIT

*Olgeta Pasifik
kantri bai strong
wok bung
pes 3*

*Katolik Sios long
Westen Hailans
amamasim 70 yia
pes 6*

*Holi Spirit
Prameri skul
long Madang
winim prais
pes 12*



*Ol NRL
ripot
pes 28 na 29*

Wok ples mas opim tingting long HIV/AIDS

Neville Choi i raitim

OLGETA wok ples insait long kantri i mas tok klia long ol wok manmeri bilong ol long hevi bilong dispela sik nogut HIV/AIDS.

Dispela em i het tok bilong wanpela bikpela kibung we bai i kamap tete long makim Nesenel Leba De.

Long makim tete, namba 10 de bilong mun Jun olsem Nesenel Leba De, Leba na Emploimen Dipatmen insait long kantri i laik skulim ol wok manmeri long hevi bilong sik HIV/AIDS.

Ol bai bung long Pot Mosbi we ol bai kisim toktok na tok stia i kam long Nesenel AIDS Kaunsol, Employas Federesen bilong PNG, PNG Tred Yunion Kongres na Leba na Industrial Rilesens.

Bikpela het tok bilong dispela bung em bilong 'Wok bung wantaim long pait agensim HIV/AIDS'.

Dispela bung em Dipatmen bilong Leba na Industrial Rilesens wantaim Nesenel Traipatait Konsaltativ Kaunsol Seketeriet (NTCCS) i kamapim.


Traipatait Ogenaising komiti i bin bung na pasim tingting long singautim Nesenel AIDS Kaunsol long kam na givim toktok long sait bilong skulim ol wok manmeri insait long wok ples long dispela bikpela sik nogut.

Dispela bikpela kibung bai i stat long moning tasol long Sir John Guise Stadium long Pot Mosbi.

Ol bikman na meri husat bai givim toktok long sait bilong wok na mekim aweanes long sik HIV/AIDS em Dairekta bilong NAC, Dokta Ninkama Moiya, Misis Florence Willie husat i makim Employas Federesen bilong PNG, Dokta Moale Kariko bilong PNG Tred Yunion Kongres na Ekting Seketeri bilong Leba na Industrial Rilesens, David Tibu.

Ekting Dairekta bilong NTCC Seketeriet, Peter Pokana i tokim *Wantok Niuspepa* olsem dispela de em i no pablik holidi, tasol em i wanpela de we ol bosman, wok manmeri na gavman i kam bung wantaim long makim toktok i stap insait long nesenel Mama Lo bilong kantri we i maikim dispela de olsem Nesenel Leba De.

i go moa long pes 2






Mi laikim Wantok Niuspepa ■ Praim Minista bilong Papua Niugini Sir Michael Somare na pikinini bilong em, Bertha i soim laik bilong ol long *Wantok Niuspepa*. Dispela em bilong wanem *Wantok* i bin kirap long asples bilong ol Wewak long Is Sepik provins taim Sir Michael i statim wok olsem politisen na Memba bilong Wewak na Bertha (inset) i bin liklik yet. Tupela i soim sapot bilong ol taim ol i kam long opim nupela opis bilong *Wantok Niuspepa* long Tunde. *Poto: JOE IVAHARIA*

STATE OF ORIGIN TELEVISION SUPER SPECIALS

Brian Bell Exclusive Brand INTEGRITY HOT PRICES ON QUALITY TV'S

PROMOTION ONLY DURING THE STATE OF ORIGIN AND ENDS JULY 7 2004

 <p>14" TV</p> <ul style="list-style-type: none"> • ON SCREEN DISPLAY • SLEEP TIMER • FRONT AV INPUT/OUTPUT • HYPER BAND <p>K999.00 K529.00</p> <p>Model: CB1401</p>	 <p>21" TV</p> <ul style="list-style-type: none"> • ON SCREEN DISPLAY • SLEEP TIMER • FRONT AV INPUT/OUTPUT • HYPER BAND <p>K999.00 K779.00</p> <p>Model: CB2102</p>	 <p>29" TV</p> <ul style="list-style-type: none"> • DYNAMIC AND CLEAR SOUND FROM HIGH POWER • 100 PROGRAMS MEMORY • AV INPUT / OUTPUT • REMOTE CONTROL • HIGH QUALITY PICTURE <p>K1,799.00 K1,599.00</p> <p>Model: CB2903</p>
---	--	--

Brian Bell BUY WISELY !! ALL PRODUCTS ARE BACKED BY BRIAN BELL'S WARRANTY, SPARE PARTS & SERVICE All prices include G.S.T.

PLAZA 325 5411 HOME CENTRE CITY LAE 472 9200 GOROKA 722 1622 MT HAGEN 942 1929 KOKOPO 982 9107 MADANG 852 1599 HOME CENTRE CITY GORDONS 325 8469

AusAID i surukim taim bilong stretim ol rot

Paul Zuvani i raitim

DISPELA projek Stretim Ol Nesenel Rot na Bris we bai mas pinis long dispela mun em Gavman bilong Australia i save givim mani long en. bai surik i go moa long narapela tupela yia.

Dairekta Jenerel bilong AusAID Bruce Davis i mekim dispela toktok i no longtaim i go pinis taim em i tokaut long tingting bilong gavman bilong Australia.

Mista Davis i tok bai kisim narapela K114 milien long stretim ol bikipela rot long ol provins we dispela ol bikipela rot i stap.

Long mani i go long Hailans Haiwe mak bilong mani i sanap olsem- long tripela yia i go pinis AusAID i bin yusim K35 milien long stretim hap namel long Lae-Simbu provins.

Dispela em AusAID i yusim aninit long Nesenel Rot Rigreveling na Siling prosek we i bin stat long 2001.

Davis i tok tupela kontrek we mani maki bilong i stap olsem K8 milien em AusAID i givim pinis long tupela nupela kontrek long statim wok nau.

Wantaim dispela em i tok Australia i tokaut long K110 milien em bai givim long narapela faivpela yia long stretim Hailans Haiwe.

"Dispela em moa long 340 kilo mita long Hailans Haiwe we bai stat long Morobe na kamap long Isten Hailans provins.

De bilong ol kampani long aplai long tenda na stretim dispela rot i pas long pinis bilong mun Mei na i gat bilip olsem ol tim bai bung long Ogas long toktok long wei bilong stretim dispela ol rot.

Planti pipel i save amams long dispela kain projek.

Wok ples mas opim tingting long HIV/AIDS

I kam long pes 1

Dipatmen bilong Leba i wok long lukluk strong long mekim moa wok aweanes long HIV/AIDS bilong wanem ol i skelim olsem moa long 40 milien manmeri long wol tete i gat HIV/AIDS. Long 10-pela long ol dispela lain, 9-pela long ol em ol yangpela manmeri.

Olsem na long makim Nesenel Leba De insait long kantri, Leba Dipatmen i lukluk long strongim toktok long HIV/AIDS insait long wok ples.

As tingting bilong dispela wok aweanes em long tok klia long ol hevi bilong HIV/AIDS long wan wan wok manmeri na wok bilong ol, famili bilong ol na komyuniti bilong ol.

Planti toktok i kamap pinis olsem sapos PNG i no traim long banisim

ol manmeri long dispela sik, bai i gat moa hevi i kamap long sait bilong ekonomi bilong kantri.

Ol namba bilong Leba insait long PNG long 2000 inap long tude i soim olsem ol manmeri i wok long agrikalsa na piseris sekta i stap long mak olsem 82.1 pesen bilong olgeta wok manmeri insait long kantri, na ol bikipela bosman, ol sinia opisa na ol menesa i save mekim samting olsem 0.8 pesen long olgeta wok insait long kantri.

Dispela i soim olsem sapos ol wok manmeri i no klia long hevi bilong HIV/AIDS na ol i no banisim ol yet long en, dispela sik bai inap long kilim ol wok manmeri i save mekim wok insait long kantri, na inap long kamapim bikipela hevi moa long

PNG laikim Obseva Misin i skruim wok yet long Bogenvil

...Tupela bik manmeri long UN toktok wantaim ol lida

Veronica Hatutasi i raitim

PNG Gavman na ol lain long Bogenvil i laikim Yunaitet Nesens Obseva Misin long Bogenvil (UNOMB) long skruim yet wok long ailan inap ol i sanapim nupela gavman.

Olsem na gavman wantaim sapot bilong Hai Komisnin lain bilong em long Nu Yok i wok long toktok wantaim Yunaitet Nesens Sekyuriti Kaunsil long tok orait long larim UNOMB i mas stap bek inap em i pinisim olgeta wok bilong em.

Long dispela wik, tupela bik man na meri i mekim wanpela wokabaut i kam long PNG na Bogenvil long kisim ripot long ol samting i kamap long Bogenvil na toktok tu wantaim ol nesenel gavman na Bogenvil lida.

Dairekta bilong Esia Pasifik Divisen long Politikel Afeas Dipatmen em Misis Beng Yong Chew na wanwok bilong em husat i bin namba wan bos bilong UNOMB long Bogenvil long 1998-99 em Valery Marusin em tupela biklain i stap

nau long kantri long glasim na skelim ol wok we opis bilong ol i mekim na rot we ol wok long Bogenvil i traim long stretim hevi inap long en.

Tupela i bin kamap long Mosbi long dispela wik Mande na ol i toktok wantaim mol bikman long gavman bipo ol i go long Bogenvil tude.

Inta Gavman Rilesens na Bogenvil Afeas Minista Sir Peter Barter i no stap long kantri long dispela wik na wantok i no bin kisim ripot long wanem samting ol i toktok long em.

Opis bilong Foren Afeas i tok tru tupela biklain i bin toktok wantaim Minista Sir Rabbie Namaliu, opis i no inap long autim wanpela samting inap tupela i kam bek long Bogenvil na toktok wantaim Minista gen long ol ripot ol i kisim long hap.

Tasol long Mande, Sir Peter i bin tok em i bikipela samting long UNOMB i mas stap na skruim yet wok long Bogenvil. Em i gutpela long wok bilong painim gutpela sindaun na tu, long gutpela gavanens long

PNG tu.


Em i tok UNOMB i save siarim Pis Proses Konsaltativ Komiti (PPCC) we i save wok bung wantaim ol Bogenvil na nesenel gavman lida long ol wok bilong painim gutpela sindaun.

Ol i save supavaisim ol gan na wok bilong bungim, lusim ol long gan na bagarapim ol na ol arapela wok bilong skruim na strongim wok bilong pis o gutpela sindaun, Sir Peter i tok.

Em i tok UNOMB tasol bai givim tok orait long ileksen bilong nupela Bogenvil gavman i mas kamap o nogat.

Olsem na em i gat bikipela wok tru long Bogenvil i stap yet, em i tok.

Sir Peter i tok ripot bilong tupela bikman na meri ol i kisim long wokabaut bilong ol long Bogenvil bai i go long Yunaitet Nesens Seketeri Jenerel Kofi Annan long helpim em i redim redim tu ripot em bai givim long Sekyuriti Kaunsil taim ol i bung long glasim na skelim taim o stap bilong opis long Bogenvil.



Jeepney i stap pinis long PNG.. Ol man i lukluk long nupela Jeepney taim ol i kisim i kam aut long kontena long Mosbi bris. Foto: VERONICA HATUTASI

Ol dokta i wari na lusim wok

HELT Seketeri Nicholas Mann i givim daireksen o tok stia long Helt Dipatmen long bung na toktok wantaim ol residen dokta husat i straik o lusim wok long dispela wik na stretim wari bilong ol.

Ol dokta i lusim wok bikos ol i stap long hevi bihainim sikspela mun i lus pinis na ol i no kisim ol potnait pe bilong ol yet.

Ol "residen dokta" em ol nupela dokta ol i kisim ol i wok long dispela yia bihain long ol i pinisim skul dokta long yunivesiti ov PNG na ol arapela medikel kolis long kantri.

"Ol i wok long ol bikipela haus sik olsem Pot Mosbi Jenerel Haus sik na

Angau Memoriel Haus sik.

Taim ol i lusim wok i stap, Pot Mosbi Haus sik i wok long kisim taim tru bikos ol i nogat inap dota long lukautim ol sik manmeri na karimaut ol arapela wok bilong haus sik ol dokta i save wokim long en.

Sief Eksekutiv Opisa (CEO) bilong Pot Mosbi Jenerel Haus sik Dokta Alphonse Tay i tok as long ol dispela residen dokta i lusim wok em i trupela na em i luksave long hevi ol, tasol menesmen i no inap mekim wanpela samting long wanem samting i stap long han bilong Treseri/Fainens na Pesenel Menesmen Dipatmen.

Ol Katolik Bisop wari long hevi bilong gan i go bikipela

Veronica Hatutasi i raitim

BIHAINIM planti hevi we ol bikheth man i yusim gan long kari-maut ol trabel, singaut i go aut long olgeta Katolik pipel long kantri na tu, gavman na ol wan wan man long sapotim wok bilong rausim ol gan na daunim kraim long PNG.

Dispela singaut i kam long Presiden bilong Konfrens bilong ol Katolik Bisop long PNG na Solomon Ailan Asbisop Karl Hesse.

Asbisop Hesse i tok insait long nau, planti ripot i kamap long ol ol raskol i yusim gan long wokim ol holap na kisim ol ka, wokim stil pasin na insait long ol dispela, ol i wok long kamapim bagarap na kilim dai ol man tu.

"Long nau, ol raskol i wok long yusim ol gan na mebagarapim na pretim pablik husat i stap wantaim bikipela pret. Dispela i no nupela samting. Long planti yia nau, ol raskol

i wok long mekim nabaut na pretim ol pipel tasol nau, ol samting i go nogut. Ol Katolik Bisop i sapotim ol wok long rausim ol gan insait long sosaiti tasol i no dispela bilong yusim long sutim (hunt) ol animel wantaim na tu, ol dispela long yusim bilong ol FAM WOK.

"Planti gan i stap insait long komyuniti ol i yusim long kamapim birua, bagarap na kilim dai ol pipel i mak bilong sik mipela i bungim tude. Mipela i larim kain sindaun we hevi long lo na oda i kamap na gro na mipela i mas stopim dispela.

"Em i no gutpela long ol gavman bodi i givim aut ol gan i go long ol woklain. Pablik na praivet gan i save lus na ol raskol i save kisim. Taim pablik i holim gan, moa lain i save kisim birua taim ol kroapait i kamap insait long famili. Na tu, moa gan i save pundaun long han bilong ol raskol.



Wantok Niuspepa opim nupela opis

...Taim bilong mekim nem gen

Neville Choi i raitim

WANTOK Niuspepa nau i gat nupela opis we ol i bin opim long Pot Mosbi long Tunde long dispela wik.

Ol wok manmeri bilong Wantok nau i wok long dispela nupela opis long stretim 'niuspepa bilong ol PNG stret'.

Long luksave long dispela opening, Prais Minista Sir Michael Somare, Nius Dairekta bilong EMTV, John Eggins, na ol bikman bilong foapela bikpela sios insait long kantri i bin stap.

Sir Michael na Mista Eggins wantaim i bin tok amamas long nupela opis bilong Wantok Niuspepa.

Ol i tok Wantok Niuspepa em i wanpela Tok Pisin niuspepa tasol insait long kantri na i mas i gat luksave i kam long gavman na long praivet sekta bilong wanem em i yusim tok ples bilong ol Papua Niugini stret.

Olpela edita na jenerel menesa bilong Wantok, Anna Solomon tu i bin stap long tok tok long opening bilong nupela opis.

Em i singaut long ol nius ripota long givim luksave long nius we ol pipel i laik ritim na noken raitim tasol nius ol ripota yet i ting ol pipel i laik ritim.

Mis Solomon i tok taim Wantok i bin stat, em i bin stap yet long hai skol. Tasol bihain, em i go wok wantaim Wantok inap long taim em i kamap jenerel menesa.

Em i tok bikpela luksave i mas go long ol wok manmeri bilong Wantok Niuspepa long bilip na hat wok bilong ol long autim tok i go long ol manmeri i stap long ples husat i no

save gut long ritim na raitim tok inglis.

Mista Eggins i singaut long ol arapela han wok bilong sios long sait bilong redio na TV long wok bung wantaim Wantok bilong wanem ol sios yet i makim bikpela maus bilong ol pipel na planti long ol pipel i save luksave long ol.

Sir Michael i bin givim liklik kontribusen long mak bilong K50,000 i kam long em yet olsem memba bilong Is Sepik na ol pipel bilong Wewak.

Olpela opis bilong Wantok i bin bagarap taim ol stil man i laitim paia insait.

Tasol bihain long paia, ol wok manmeri i no malolo long stretim niuspepa long wan wan wik.

Nau Wantok Niuspepa i kisim helpim long arapela niuspepa, The National long printim niuspepa bilong em.

Nau Wantok i redi long mekim nem gen na helpim sindaun bilong ol pipel bilong PNG.



• Sir Michael (lephan) i sindaun wantaim Bisop David Hand (namel) na siaman bilong bod bilong Word Publishing, Fr. Nick De Groot. Foto: JOE IVAHARIA

Olgeta Pasifik kantri bung strongim wokbung

BIKPELA bung bilong ol Fainens minista insait long Saut Pasifik rijn i kamap long Rotorua long Nu Silan long dispela wik.

Minista bilong Pablik Sevis Sinai Brown i makim PNG long dispela bung wantaim ol opisel bilong Fainens Dipatmen.

Siaman bilong PNG Bisnis Kaunsil Mel Togolo tu i stap long dispela bung.

As bilong dispela bung em long lukluk insat long ol hevi bilong tred, ekonomik, bisnis na ol arapela hevi na wari bilong ol kantri insait long Pasifik rijn.

Forum Ekonomik Min-

ista Miting (FEMM) em nem bilong dispela bung.

Emma Ferguson em edvaisa long sait bilong ekonomik na bisnis insait long FEMM. Em i tok olsem dispela bung em namba 8 kibung bilong ol fainens minista na i bin gat ol gutpela developmen na senis i kamap pinis long dispela bung.

Em i tok insait long dispela bung i gat 4-pela bikpela het tok bilong bung. Ol dispela het tok em;

- Institutional Reform
- Public Enterprise government and management;

- Public Sector Eco-

nomik government reform;

- Economic issues ol ol arapela toktok bilong ekonomik insait long rijn.

Namba olsem 26 kantri olgeta insait long rijn we i karampim Australia, Nu Silan na olgeta Pasifik kantri.

Insait long bung tu bai ol bikpela benk olsem Esian Developmen Beng (ADB), Wol Beng na arapela ovasis benk na helpim we i save go insait long ol wok na developmen insait long ol Pasifik kantri i kamap tu na toktok wantaim ol minista na opisal bilong wanwan rijnol kantri ya.

FEMM i save wok klostu wantaim ol Pasifik kantri long helpim wantaim long eria bilong gutpela fainens menesmen, mani i go gut na klia stret long wok bilong em stret, givim tok stia long wok na sevis bilong forum na wok klostu wantaim ol long ol toktok bilong Wol Tred Ogenaisesen (WTO).

Ol minista tu bai toktok long sampela toktok olsem nesenel plening, millennium developmen gol na nesenel plen o plen bilong rijn long wanem ol bikpela wok ol i mas sanapim na kamapim. Wanpela bikpela

helpim bai ADB i mekim em long helpim ol kantri insait long rijn long kamapim Komesel Lo.

Dispela em long opim lo bilong ol bisnis insait long Pasifik kantri long surukim bisnis bilong ol i go aut long arapela kantri o isi long kisim ol bisnis patna bilong ol long narapela kantri i kam long strongim wok bisnis bilong ol i go moa.

Dispela em long sait bilong strongim ol praivet bisnis o kampani insait long rijn long kirap strong na ron strong.

Nau ol Pasifik kantri i wok long stat lon wok bung wantaim gut.

Papagraun i mas go pas long graun toktok

OL PAPAGRAUN i mas gat moa pawa long toktok long graun bilong ol taim ol i laik givim i go long wok bisnis i kamap long en. Long dispela rot tasol bai bisnis i ken kamap gut kantri i ken lukim moa bisnis i kamap na kantri i ken go fowet long ol bisnis na ekonom.

Dispela em toktok bilong Ofa Ketu'u, olpela Fainens seketeri bilong Samoa.

Bikmeri ya i tok bikpela hevi long Pasifik rijn em graun we i stopim planti wok developmen long kamap long wanem gavman i laik go pas long toktok bilong pulim ol ovasis bisnis i kam na ol benk olsem Wol Beng na IMF o Esia Developmen Beng i laik save sapos ol dispela bisnis bai i ron gut na mekim mani long kantri

sapos gavman i laik kisim dinau mani long ol.

Misis Ketu'u i tok bikpela samting insait long Pasifik em ol papagraun i mas stap insait long mekim ol plen bilong yusim graun long pulim bisnis o invesmen i kam. Sapos dispela rot i op bai i isi long ol kantri i ken develop.

Profesa Kenneth Jackson bilong Oklen Yunivesiti long Nu Silan i tok i mas gat senis tasol i mas bihainim laip na sindaun bilong ol pipel.

Bikpela samting em planti graun em ol pipel i no yusim olsem na wanpela rot i mas kamap long ol pipel na gavman i ken sanap long en long yusim ol dispela kain graun.

Profesa Jackson i tok insait long Pasifik i nogat inap wok resis

long bisnis olsem na ol ausait maket i no kam tumas insait long mekim bisnis long ol Pasifik kantri.

Olsem na i mas gat ekonomik rifom we i mas sut long kamapim gutpela sosaiti em bikpela samting ol lida bilong wanwan kantri i mas lukluk long en.

Profesa Jackson i tok sapos kain rot olsem i kamap bai i ken rausim tingting bilong praivetaisesen program we em i bilip i no inap wok gut insait long wanpela kantri. Bikos praivetaisesen insait long Pasifik i nogat bisnis salens na tu ol i kisim mani bilong ol pipel na salim i go long han bilong ol bisnis lain tasol.

Minista bilong Pablik Sevis long PNG Sinai Brown i tokim Wantok olsem gavman i wok long

lukluk long dispela eria bilong graun na i tok PNG i wok long wok isi isi yet long dispela samting.

Em i wanpela rot ol papagraun yet i ken mekim mani na tu ken go pas long bisnis bilong ol yet.

Tasol i gat planti hevi i stap yet na mipela i wok long lukluk long en na wok isi isi long en.

Dispela bikpela bung bilong Fainens na Ekonomik Minista insait long Pasifik rijn i kamap long Nu Silan long toktok long planti eria bilong bisnis na ol senis we i karamapim ol kain hevi we i stap olsem long graun, pablik sevis, tred na planti arapela moa.

Forum Seketeriet i go pas long dispela bung we i bungim samting olsem 26 kantri insait long Pasifik rijn long dispela wik long Rotorua long Nu Silan.



TOK WIN

NIUSPEPA bilong ol PNG stret nau i gat nupela opis. Planti bikman i tok pinis olsem nau em i taim bilong Wantok Niuspepa long kisim bek nem bilong em long bipo we em i bin stap antap tru long ol namba wan niuspepa insait long kantri na long Pasifik. Nau yet mipela i laik askim ol rida bilong mipela long rait i kam insait na tokim mipela long laik bilong yupela long wanem samting yupela i laikim insait long niuspepa bilong yupela.

DISPELA bai helpim mipela long skelim laik bilong ol rida na putim ol samting ol i laik ritim insait long niuspepa long olgeta wik.

TASOL ol samting we Wantok i gat nem long en olsem Tok Pilai wantaim Kanage, Bia Bia, Tambu Toro na ol arapela i stap yet. Mipela long Wantok i save olsem ol manmeri bilong Papua Niugini ol lain bilong mekim pani na lap na amamas. Olsem na sapos yu gat sampela pani stori i stap, salim i kam long mipela. P. O. Box 1982, Boroko, NCD.

BIKPELA toktok i kam long Prais Minista Sir Michael Somare i klia tumas. Sapos yu no givim luksave long Tok Pisin, bai yu i no inap givim luksave long ol pipel bilong Papua Niugini.

LONG wankain as, Tok Pisin em i wanpela tok ples we i gat kain kain stail long en. Long Wantok, mipela i save skelim long mak bilong wanem kain tok pisin stret bai i ken i klia long planti manmeri. Em i no wanpela tok ples we bai i stap wankain tasol. Nogat. Tok pisin i save senis, i gat ol nupela toktok i save kamap, na ol olpela toktok we i save pinis.

Tasol em i tok ples bilong yumi yet long PNG. Noken lusim, tingim na toktok i stap.

NAU mipela i laik tok tenkyu long olgeta wan wok bilong mipela husat i helpim mipela taim mipela i nogat opis long wok long en. Taim yupela i helpim mipela, yu helpim ol pipel tru bilong Papua Niugini. Tok pisin em bilong PNG, na Wantok em bilong ol pipel bilong PNG.

Klostu bai State of Origin gen na ol manmeri i wok long guria long lukim husat tru bai win. Ol sapota bilong Maroon i wari liklik long wanem hap man bilong pilai ragbi stret, Brad Fittler, husat i tok em bai i no inap pilai ragbi bilong stet o kantri bilong en gen tasol bai pilai long klab bilong em tasol, i sensisim tingting bilong en na i tok em i laik pilai wantaim ol Blues.

Ating ol Maroons i mas strong long Gorden Tallis, hap man bilong pilai tu, husat i bin mekim wankain disisen olsem Brad Fittler long sampela yia i go pinis, long kam bek tu long tim bilong Maroons.

Ol ripota i wok long toktok long dispela long opis i stap, na wanpela bilong ol i bin tok, maski lus tingting long Gorden Tallis, karim Wally Lewis i kam bek. Yu ting wanem. King Wally em fit long pilai yet?

Plantil ol PMV i no save pinisim rot ol i mas bihainim long en, tasol i gat sampela husat i save mekim gut wok bilong ol na go olgeta long ol hap ol i sapos long go long en.

Taim yu kalap long kain PMV olsem, givim gut mani long tok tenk yu na amamasim gutpela na stretpela wok bilong ol.

Las wiken wara i bin pulap long rot raunim Godens bas stop long Pot Mosbi.

Ples i luk rabis tru na sapos wanpela nupela man i kam long sili, em i no inap bilip olsem dispela hap em i wanpela hap bilong kapitel siti bilong Papua Niugini. Ol man tu kirap na pilai nabaut insait long dispela rabis wara. Yupela, i gat tingting long kisim sik tu o?

Hap Hap Nius

Butuwin klinik kisim helpim

BUTUWIN eben klinik insait long Is Nu Briten i kisim helpim mani inap long mak bilong K1, 500 long helpim ol baim marasin bilong ol sik manmeri.

Siaman bilong Butuwin klinik bod, Esekia Takuru i tok tenkyu long Tolai Warwagira Sosait long givim dispela hap mani i go long helpim ol.

Em i tok Butuwin klinik em i wanpela klinik we i save lukim samting olsem 200 i go inap 500 sik manmeri long wan wan de.

Mista Takuri j tok ol i wok long traim long resim moa mani bilong baim wanpela masin bilong helpim ol long kirapim bek X-Ray dipatmen bilong ol.

Chan kros long rot i bagarap

MEMBA bilong Namatanai, Byron Chan i autim belhat bilong em gen long rot i bagarap insait long ilektoret bilong em.

Mista Chan i autim kros bilong em bihain long wanpela birua long rot long wanpela kar i bin kamap long Ulaputur ples long Wes Kos Namatanai.

Wanpela man i bin kisim bagarap long dispela rot birua long kisim helpim long haus sik long hap.

Mista Chan i singaut long Gavana bilong Nu Ailan, Ian Ling-Stuckey long hariap na makim mani i go long stretim ol rot insait long Namatanai distrik.

Dispela nau em i narapela askim gen Mista Chan i wok long tromoi i go long Mista Ling-Stuckey long stretim ol rot.

Tasol Mista Ling-Stuckey i wok long mekim ol toktok we em i sutim tok i go long ol memba bilong Namatanai yet long hevi i wok long kamap long rot bilong ol i bagarap.

SOS helpim ol famili long Nu Ailan

SEKSUEL Ofenses Skwot (SOS) o hap seksen bilong polis we i save lukautim ol hevi bilong ol man i bagarapim o reipim ol meri na ol pikinini i bin go raun long Nu Ailan long mekim wok aweanes long ol kain hevi i save kamap na ol lo we i stap long banisim ol lain turangu.

Polis man i go pas long SOS long Kokopo polis stesen, Roland Funmat i tok olsem em i bin kisim askim i kam long ol lida bilong Wod 14 long Kandas ples long mekim wok aweanes long ples bilong ol.

Nu Ailan provinsel gavman i givim sapot long maining

NU AILAN provinsel gavman bai givim sapot bilong em i go long ol nupela maining projek na ol maining projek i stap pinis long provins.

Dispela bai kamap long luksave long kamapim bisnis namel long ol pipel na

long kamapim gutpela sindaun bilong olgeta manmeri i stap aninit long ol maining projek.

Ol dispela toktok i kam long Gavana bilong Nu Ailan, Ian Ling-Stuckey taim em i raun toktok long wanpela Komyuniti

Developmen Forum bilong em long Samo viles long Lihir ailan long Namatanai distrik.

Em i tokim ol pipel bilong Lihir olsem em i amamas long ol paitim tok namel long menesmen bilong Lihir Maining Kampani na Provinsel Eksekutiv Kaunsol (PEC) na ol mausman bilong Nu Ailan Developmen Koporesen (NIDC).

"Lihir Maining Kampani nau i gat ol saveman yet i lukautim na wok i wok long go het yet."



Nu Ailan Gavana Ian Ling-Stuckey wantaim ol lain bilong Nu Ailan provinsel gavman na Nu Ailan Developmen Koporesen i kisim piksa long poret bilong Lihir gol main.

Em i tok ol samting olsem wanpela askim bilong 13 haus bilong provinsel gavman we kampani i bin sanapim bai inap long go long Nimamar Developmen Atoriti bai i mas go long PEC pastaim long kisim tok orait bilong em.

Narapela askim i go long provinsel gavman em wanpela askim bai NIPG i mas wok hat long kamapim wanpela wok permit o pepa bilong kisim ol saveman bilong wok maining long kam hariap long mekim wok long sotpela taim tasol insait long kantri.

Mista Ling-Stuckey wantaim nupela provinsel edministreta Robinson Sirambat na Dairekta bilong NIDC, Walter Schaubelt i go raun long Lihir Gol Main.

Mista Ling-Stuckey i tok olsem Lihir Maining Kampani nau i gat ol saveman yet i lukautim na wok i wok long go het yet.

Luksave i go long ol pipel long ples

WANPELA non gavman ogenaisesen husat i save givim fri tok stia long sait bilong lo i go long ol papagraun na as ples pipel long lukautim komyuniti na envaromen bilong ol nau i lukluk long opim tingting bilong ol pipel long ol rurel erias long Is Nu Briten.

CELCOR, o Senta bilong Envariomen Lo na Komyuniti Raits bai givim mani bilong samting olsem 20 manmeri bilong Sentrel, Noten, Westen, Galp, Madang, Morobe, Is Sepik, Nu Ailan, Is Nu Briten,

Manus, Isten Hailans, Wes Nu Briten na Bogenvil provins.

Ol dispela lain i save wok wantaim ol komyuniti ogenaisesen insait long ol rurel ples.

Dispela trening bai i kamap long Pot Mosbi long namba 14 i go inap namba 17 de bilong mun Jun.

Dispela trening bai i kamapim ol wok bilong ol komyuniti grup.

Em bai makim stret ol bod memba bilong

ol komyuniti bes ogenaisesen long helpim long kamapim gutpela pien bilong ol projek bilong ol.

Trening ya bai karamapim ol kain kain lo bilong lukautim envaromen tu bai ol i ken save gut long en.

Kodineta bilong trening na infomesen long CELCOR, Harry Aufferé i tok mani bilong dispela trening progrèm i kam long Komyuniti Developmen Skim bilong AusAID.



Ol sumatin kirapim wok aweanes long HIV/AIDS

OL SUMATIN bilong Rarongo Theological Koles insait long Is Nu Briten i wok long mekim wok aweanes long tok klia long ol manmeri long ol ples i stap klostu long strong bilong dispela sik.

Dispela wok aweanes ol sumatin i statim nau i kamap bihain long Koles i luksave olsem wan wan manmeri insait long kantri i mas klia gut long hevi bilong dispela sik long famili, ol wan wan manmeri yet, na long kantri tu.

Deputi hetmasta bilong koles, Reveren Ben Aringan i tok olsem laip na bihain taim bilong ol pikinini i no klia nau long dispela sik nogut.

"Mipela i pilim olsem laip na bihain taim bilong ol pikinini bilong mipela na laip bilong kantri bai i no inap orait sapos dispela sik i kamap bikpela," Reveren Aringan i tok.

Dispela wok aweanes bai makim tupela bikpela hap - givim tok stia long bihainim buk baibel long as bilong dispela sik, na banisim ol yangpela long dispela sik.

Em i tok sios i gat bikpela wok long tok klia long ol pipel long dispela sik bai ol i ken stap gut long laip bilong ol

"Mipela i pilim olsem laip na bihain taim bilong ol pikinini bilong mipela na laip bilong kantri bai i no inap orait sapos dispela sik i kamap bikpela."

na noken kisim. Samting olsem 80 sumatin bai raun long ol arapela hap bilong kantri tu long karimaut dispela wok aweanes long dispela sik. Ol sumatin husat i go aut long mekim dispela wok aweanes long Is Nu Briten bai go mekim wok aweanes wantaim ol meri bilong ol.

Hap Hap Nius

Gavana i no laikim lo bilong tambuim gan

MORobe Gavana Luther Wenge i tok nogat long lo bilong tambuim gan.

Tasol em i tok Nesenel Gavman i mas kamap wantaim narapela gutpela tingting long wei bilong ol man i kisim gan na yusim.

Long taim em i toktok long dispela em i no tok hait long em yet i karim wanpela sait gan (pistol) we em i tok ol bisnis menesa na ol politisan i karim ol laisens gan long was long ol yet.

"Mipela olsem ol politisan na ol bisnis lida, mipela em ol raskol husat i ting i karim mani na olsem ol bai makim mipela," Mista Wenge i tok.

"Ol narapela politisan i mas karim gan long was long ol sapota bilong ol birua politisan," em i tok.

Ol hevi long Finshafen

OL pipel bilong Finshafen long Morobe provins i wari long prais bilong ol samting long stua i go antap tumas.

Tasol moa long dispela ol i wari olsem planti bilong ol dispela samting det bilong ol long yusim i pinis tasol ol stua i wok long salim yet na apim prais bilong ol i go antap.

Independen Konsuma Kompetisen Komisen (ICCC) opisa long Finshafen Ricky Seske i tok em i kisim planti ol komplek long ol pipel we ol i no amamas long prais bilong ol samting long stua.

Em i tok bihainim dispela ol wari i kamap em i mekim wanpela wok we em i painim planti bilong ol dispela samting em de bilong ol long salim pinis na olsem em i kisim dispela ol samting we em i bagarapim na tromoi.

Em i tok Konsuma Afeas Kaunsel i makim ol bisnis developmen opisa na lokal gavman opisa long helpim wok bilong ICCC progrem tasol dispela ol lain i no mekim wok bilong ol long wanem ol i gat ol narapela wok long mekim.

Ol papagraun i laikim tin pis faktori i pas

OL papagraun long Kananam ples, Madang i laikim RD Tuna Cannery kampani i mas pasim wok bilong em long graun bilong ol.

Siaman bilong Idawad Asosiesen Francis Yam i tok wok bilong kampani i bagarapim tru solwara bilong ol we planti bilong ol i save stap long strong bilong pis olsem abus bilong ol.

"Mipela i no inap go long graun bilong mipela long wanem RD Tuna Kenas i stap long en. Mipela i laikim bek graun na solwara bilong mipela," Mista Yam i tok.

Em i tok ol pipel i lukim inap bagarap i kamap long graun bilong ol ha nau ol i laik bai kampani i mas go aut.

"Bikpela samting em long rif bilong mipela. Ol rif i stap na pis i stap na sapos rif i no stap ol pis bai i go nabaut," em i tok.

Ol raskol i bagarapim yangpela meri

OL RASKOL i bagarapim meri krismas bilong em 15 long Lae long wiken.

Lae siti polis bos Simon Kauba i tok dispela meri husat i baim ol samting long Eriku long las Fonde apinun wantaim wanpela man em polis i bilip i kamapim hevi i tok strong long em long kalap long bas na go wantaim em.

Polis i tok dispela saspek husat i draiva bilong PMV i tokim yangpela meri ya long stap yet long bas na larim ol narapela pasindia i go aut.

Bihain long olgeta pasindia i go aut draiva i kisim meri ya na go long Foa Mail olsem 8 kilok long nait we em i mekim pasin nogut.

Mista Kauba i tok polis i no holim pas yet man o sampela man ol i save i kamapim stret dispela hevi.

Long narapela hevi, foapela man husat i karim wantaim ol samting nogut bilong pait i holim Maps Tuna faktori long Sarere long 11 kilok long apinun.

Gutpela we bilong painim pis

Stephanie Elizah
i raitim

LONG wok bung wantaim we save i stap em bai mipela i ken lukautim gut solwara bilong mipela, ol pis na mipela yet, wanpela mausman bilong Yuropian Union i tokaut long dispela long Madang long las Sarere.

Yuropian Union Kostol Fisheries Progrem Projek menesa Sean Marriott i tok ol wok bilong gavman, bisnis, komyuniti na wan wan ol man i bikpela samting sapos mipela i laik lukautim solwara na pis bilong mipela.

Mista Marriot i mekim dispela toktok long de bilong Wol Environmen De selebresen we i kamap long Madang Turisim na Kultural Biro.

Em i tok pis em kaikai bilong planti ol famili na hauslain i stap klostu long solwara.

"Nau i luk olsem mipela i kisim na kaikai planti pis na olsem namba bilong ol pis i wok long go pinis na long sampela hap pis no moa stap planti olsem em i stap bipo.

"Planti taim mipela i hukim pis, bagarapim o bomim ol pis wantaim ol samting olsem dainamait na bagarapim ples bilong ol pis long stap na hait i mekim planti kain pis i wok long pinis.

Em i tok maski ol saveman olsem ol saintis, ol lo bilong tumbuna long lukautim solwara na ol pis em ol manmeri i harim tasol dispela ol toktok



• Ol pipel i amamas long lainim long ol we bilong lukautim environmen bilong ol. Foto: STEPHANIE ELIZAH

em ol i no bihainim.

Na moa yet planti ol bikpela kampani bilong painim pis i wok long kisim ol pis long ol wei i no gutpela.

"Mipela i ken lainim ol gutpela samting bilong lukautim bus, graun na solwara bilong mipela long save mipela i kisim long wok bilong ol saintis na dispela i ken helpim mipela long i no inap painim

hevi long ol wanem hap mipela i stap long en.

Yuropian Union Kostol fisheries progrem i bin hap bilong Madang Wol Environmen De oganaising komiti we i helpim long amamasim dispela de.

Ol komiti memba husat i kamap long dispela de em ol mausman bilong Netua Konsevetiv, WWF Saut Pasifik Eko Rijn Senta, Medikol

Rises Institut, Luteran Shipping na Faundesen bilong Pipel na Komyuniti Developmen Inc na DWU.

Dispela de i kamap bilong mekim ol pipel bilong Madang i luksave long bikpela wok bilong lukautim busgraun na solwara bilong ol na was long ol birua pasin we bai i bagarapim sindaun bilong ol na ol pikinini bilong ol.

Ol papagraun i amamas

PAUL tingting namel long ol papagraun bilong Hidden Veli, Hamata gol projek long Morobe provins na Maining Seketeri Kuma Aua i stret pinis.

Ol eksekutiv bilong papagraun kampani, Nakuwi Asosiesen Inc. i bung wantaim Kua na Morobe Konsolidated (Bung wantaim) Golfil ekstenel afeas menesa Peter Leahy las wik we ol i stretim dispela ol paul tingting i stap namel long ol yet.

"Dispela paul tingting i kamap bihain long Mista Kua i mekim wanpela pablik toktok we i tok olsem Dipatmen o gavman, i no luksave long wanpela papagraun grup.

Tasol Kua i tok em i no mekim rong long wanem ol papagraun i no kisim gut wanem samting em i tok long en. Em i tok toktok bilong em i go long wanpela papagraun grup we aninit long lo sapos kain samting i kamap long graun ol i mas rejisterim ol yet olsem ol i papagraun tu na olsem aninit long lo gavman i ken givim luksave long ol.

Em tok moa olsem toktok bilong em i go long dispela papagraun grup na i no Nakuwi Asosiesen Inc we em i rejista na i gat luksave bilong gavman na developa wantaim.

Em i tok ol toktok i kamap long nius i no longtaim i go pinis we Seketeri i mekim i no kamap gut long ripot bilong ol niusman we Mista Kua i tok Gavman i no luksave long ol papagraun long Hidden Veli.

"Mipela i trupela papagraun long Hidden Veli na Hamata gol projek. Mipela i soim olgeta samting we i tok long mipela i mas i gat long kisim luksave olsem mipela i wanpela asosiesen na olsem mipela i rejista long Regista ov Kampanis we mipela i kisim setifiket long 1999," asosiesen presiden Rex Mauri i tok.

Mista Leahy i tok kampani i luksave long Nakuwi Asosiesen Inc em i trupela papagraun bilong tupela projek husat i makim ol pipel bilong Nauti long Watut na Kuwembu na Winima from Biangai haus lain long Wau.

Wenge i pait wantaim IRC long GST

MORobe Gavana Luther Wenge i tok lukaut long Intenel Revenu Komisen (IRC) long ol i no baim gut ol provins long takis ol i kisim long Guds na Sevis Takis (GST).

Mista Wenge long Mandé i tok em i givim IRC wan mun stat long las Fraide long IRC i mas baim Morobe Provinsol Gavman K3 milien.

Sapos dispela i no kamap Mista Wenge i tok em bai go long kot long lukim olsem IRC i givim em mani em i mas kisim long en.

Em i tok em i no kisim yet mani stat long Januari 1 dispela yia taim GST Ekt i kamap long en we i wok wankain tasol

i kisim ples bilong Velu Eded Takis (VAT).

Mista Wenge na Morobe Provinsol Gavman i bin go long kot we i lukim Suprim Kot i tokaut olsem VAT i no bihainim lo long kamap olsem Ekt na olsem em i no moa Ekt.

Em i man husat i stap long baksait long Gavman long tok orait long GST Ekt long Januari 1, 2004.

Dispela GST Ekt i givim ol provins planti ol sia bilong takis long kisim taim ol i salim dispela ol sia we i kamap long ol provins.

IRC Komisina David Sode i tok Morobe i mas kisim olgeta mani em i mas kisim long em

long pinis bilong dispela mun. Na dispela bai kamap sapos olgeta pepa wok i kamap stret.

"As long Morobe Provinsol Gavman i no kisim GST mani bilong em long asua bilong ol opisa bilong provinsol gavman yet.

"Dispela ol fainans opisa i no toktok stret long Provinsol Gavman long as bilong ol i no kisim mani bilong ol," Mista Sode i tok.

"Ol narapela provinsol gavman i go aninit long dispela hevi inap long olgeta hevi bilong takis em ol i stretim.

Mista Wenge pastaim i tok olsem Pato Loya husat i makim Morobe Provinsol

Gavman i kisim toksave long mekim wok painimaut bai stretim ol kot pepa long go bipo long Nesenel Kot.

"Mi bin sainim wanpela tok orait pepa wantaim IRC na Nesenel Gavman long givim luksave long GST Ekt na (mi) save long wanem samting i stap insait long en.

"Ekt i tok olsem 60 pesen bilong GST husat i kisim long wan wan ol provins i mas go bek long ol provins na narapela 40 pesen em IRC bai kisim.

Mista Wenge i tok olsem i gat kain save i stap tasol inap nau dispela i no kamap na ol pipel i kisim taim.

Hap Hap Nius

Minj komyuniti tok tenkyu long polis

WANPELA komyuniti long Minj distrik insait long Westen Hailans provins i tok tenkyu long ol polis long givim sekyuriti long ol taim ol i vot long bai ileksen bilong Anglimp Saut Waghi.

Ol komyuniti lida bilong Konoumkpa klen i tok ol polisman husat i bin go wok long hap i mekim gutpela wok sekyuriti long hap.

Ol i tok polis tasol i stap na i nogat wanpela hevi i kamap long ol ples we ol i kaunim ol vot.

Ol i tok dispela em i namba wan taim we ol i pilim orait long makim ol kendidet ol i laikim.

Ol olupela memba lus long ileksen

SIKSPELA olupela memba husat i sanap resis long Anglimp Saut Wahgi open sit long baj ileksen i lus long namba wan raun bilong kaunim ol vot.

Ol dispela sikspele olupela memba husat i resis long bai ileksen em Pater Robert Lak, olupela minista bilong envaromen na konsavesen Herowa Agiwa, fopela olupela memba bilong Anglimp Saut Wahgi Michael Mel, Roger Tongai Palme, Kuk Kuli na William Ekip Wii.

Ol arapela man husat i lus lon resis em Kapil Kii, Willie Palme, Thomas Paraka, Yu Minimbi, Patrick Nema, John Gras Atep, Anna Keral Golan, Cathy Kas, Jennie Kopia, Joe Ain Lama, Thomas Wan Peka, John Koi, Steven Wii Tombil, Frank Korken kagai na Tombe Mukap.

Pipel kros long aipas sumatin kisim bagarap

OL PIPEL bilong Goroka i kros nogut tru taim ol raskol man i paitim wanpela aipas sumatin.

Ol i tok dispela kain pasin ol stil man i mekim i no gutpela pasin na i bagarapim nating wanpela gutpela manki husat i gat hevi long em i no inap long lukluk.

Isten Hailans Semba ov Komes i tok olsem i mas i gat gutpela sekyuriti long skul we dispela aipas sumatin, Martin Kawage i skul long en.

Hetmasta bilong skul, Paddy Kelly i tok olsem dispela kain samting i kamap long Martin em inap long bagarapim laip bilong em.

Em i singaut long polis insait long Goroka long hariap na mekim wok painimaut long holim ol dispela man nogut.

Red Cross wok wantaim ol hevi

14 disasta menesmen kodineta long ol han bilong Red Cross Society long Papua Niugini, las wik i bin pinisim wanpela trening kos long Goroka, Isten Hailans Provins.

As tingting bilong dispela kos em long redim ol pipel long abrusic ol hevi we i kamap nating o we man i kamapim.

Ol lain husat i bin go pas long dispela kos em Jeffrey Phillip bilong PNG Red Cross Society opis long Pot Mosbi, Oscar Pidian long Is Nu Briten, James Dagen bilong Madang, na Moya Saunders long Nu Ailan Red Cross opis.

Progem Kodineta, Mista Phillip, i tok redi long hevi i wanpela bilong ol bikpela as tingting we Red Cross i wok long wok long kamapim.

Em i tok olsem bikpela samting em long ol provinsel kodineta long wok wantaim ol disasta opis long luksave long wanem ol hap long provins bilong ol em ol ples we ol hevi inap long kamap long en na redim ol lain husat i stap long hap long wanem samting ol i mas mekim sapos dispela kain hevi i kamap.

Deputi Gavana bilong Isten Hailans, Joksy Nakime, taim em i toktok long pinis bilong bung, i bin tok tenk yu long Red Cross long helpim bilong ol.

Yonki i gat pis fam

Michael Novingu i raitim

YONKI raun wara i stap long Anona veli insait long Isten Hailans provins bai ol i wokim kamap wanpela pis fam projek long kamapim mani.

Dispela bikpela raun wara we i save saplaim pawa insait long faivpela Hailans provins, Morobe na Madang provins bai ol i kamapim olsem wanpela fam bilong lukautim pres pis bilong wara long salim long ol manmeri long ples.

Long las wik Tunde, ol i lonsim dispela Yonki Pis Fam Kalsa Diverlopmen projek.

Pis Fa ya ol i statim pinis na ol kain pis olsem Talapia na Kap (Carp) ol i groim pinis insait long wara yusim ol masin bilong tude we ol i ken salim long ol maket insait long PNG long mekim mani bilong ol fama.

Kain pis olsem fingerlings tu bai ol i groim na salim og ol arapela fama insait

long Hailans rijen.

Nau yet Yonki Dam i wok long kamapim moa long 500 kilogram pis long wan wan mun, na inap long tausen ol 'fingerlings' ol i save salim long ol lokol maket. Dispela fam I i in olsem klostu long 12,000 fingerling pis bai ol i kamapim long wanwan mun. Dispela em i nambawan taim bilong Isten Hailans long kamapim dispela kain projek.

Isten Hailans Gavana, Mista Malcolm Smith Kela i tok em i laik lukim dispela projek bai i mas i go het na kamap gut. Em i tok dispela projek bai kamapim planti wok bilong ol lokol pipel insait long Isten Hailans provins na PNG tu.

Dispela projek em Isten Hailans provinsel gavman yet i statim long sapatim fres wara pis faming long salim long maket. Gavman bilong em yet i bin givim mani long dispela projek long mak bilong K280, 000 taim ol i statim long 1998.

Long wankain taim, bosman bilong Pisis Atoriti long inlen, Jacob Wani i tok dispela em i gutpela projek we i ken kamapim planti milien kina.

Dispela raun wara em i bikpela mak inap olsem 50 kilomita longpela bilong em na i holim samting olsem 33 milien lita o mak bilong wara i stap insait long em.

Em i tok dispela Yonki RaunWara i ken kamapim K5 milien long wanpela yia we 1000 famas i ken lukautim 1000 tons fres wara pis long wanpela mun.

Long dispela taim yet em i givim K35, 000 inap long ol samting olsem umbun na ol arapela samting bilong lukautim pis long Yonki na arapela fam tu long Isten Hailans provins, em i tok.

Mista Wani i tok fres wara pis em i wanpela bikpela bisnis we Yonki i gat bikpela hap biang lukautim pis na mekim mani bilong ol lokol fama.

Katolik sios long Westen Hailans amamasim 70 yia

KATOLIK sios insait long Westen Hailans provins i bin amamasim 70 yia bilong em i stap insait long provins long las wik Sarere.

Moa long wan tausen manmeri i bin stap long dispela amamas. Dispela bikpela de i bin kamap long Rebiatul, ples we namba wan Katolik sios i

bin sanap.

Peris long dispela hap i bin go pas long dispela bikpela kaikai na i kilim 120 pik long makim.

Plan bikman bilong sios na ol provinsel lida wantaim Gavana bilong Westen Hailans provins, Paius Wingti i bin stap.

Mista Wingti yet i bin skul long Rebiatul Komyuniti Skul.

Westen Hailans provinsel gavman i bin givim bikpela helpim mani i go long sios long lukautim na stretim dispela ples bilong apim nem bilong provins.

Mista Wingti i tok tenkyu long ol papa graun long Mogei

long ol i lukautim ol samting bilong sios long 70 yia i go pinis.

Dispela bikpela amamas i bin kamap long wankain taim olsem wanpela Daiosis Asembli we i bungim 150 mausman bilong olgeta peris i stap insait long Asdaiosis na i bin ron gut tru.



Redi long kaikaiMumu bilong Hailans i save kamap gut tru ya. Ston i go pas, kaukau i bihainim na bihain pik i go antap na ol kumu i go long givim naispela tes bilong em. Ol dispela kain naispela mumu i save kamap long ol bikpela bung.

Ipatas laikim maining kampani givim mani

GAVANA bilong Enga provins, Peter Ipatas, i singaut strong gen long maining kampani, Durban Roodepoort Group (DRD) long bihainim tok promis ol i bin mekim long salim 5 pesen long ol sea bilong em insait long Porgera Gol Main i go long Minerel Risoses Enga Limited (MRE).

MRE em i wanpela kampani bilong ol papagraun na Enga provinsel gavman.

Mista Ipatas i tok olsem dispela komiten i bin kam long DRD taim Oil Search Limited i bin salim 20 pesen sea bilong em long Porgera i go long DRD.

Em i tok dispela agrimen o tok promis bilong kampani nau i mas kamap.

Mista Ipatas i bin mekim dispela singaut i go long DRD bihain long wanpela bikman bilong DRD i bin tokaut long las wik olsem DRD i wok long wetim wanpela

nupela proposel bilong MRE.

Em i tok MRE i wok long wetim long kisim ol dispela sea long namba 26 de bilong mun Epril yet taim DRD yet i rausim Sels na Peses Agrimen.

Mista Ipatas i no wanbel long dispela kain toktok na em i tok em bai singaut yet long kampani i mas luksave long tok promis bilong em na ol i mas givim wanem ol i bin tok ol bai givim.

Hap Hap Nius

Derari givim was toktok long ol pablik seven

EKTING Edministrata bilong Orp Provins, Monty Derari, i givim was toktok long ol pablik seven long provins bilong em, olsem em i les long ol pablik seven i no save wok gut na husat i save soim les pasin.

Em i tok ol pablik seven long ol bipo edministrasen i save soim dispela kain les pasin na i no save mekim wok bilong ol gut.

Mista Derari i tok em i bin kisim opis bilong en las yia tasol na em i soim olsem em i man husat bai bihainim tok em i mekim long en, bihain long em i bin rausim 3-pela pablik seven husat i no bin wok gut na i bin bikhet.

Em i tok olsem klostu bai em i sasim 16 arapela opisa bilong edministrasen.

Luteren Rinuwol Sios amamasim namba 1 aniveseri

Paulus Tali i raitim

LAS Sande Luteren Rinuwol Sios i bin amamas namba wan aniveseri bilong en we i bin kamap long Pot Mosbi Nesenel Hai Skul.

Long dispela taim moa long 250 Kristen pipel bilong Luteren Rinuwol Sios i bin kamap long lukim dispela spesol dei.

Pasto Wilson Mark i bin autim tok bilong God we em i bin toktok

long pasin bilong givim bel long wok bilong God.

Em i tok i gat kain kain rot long givim bel long wok bilong God, olsem amamas wantaim singsing.

Pasto bilong Asembli ov God (AOG), Tom Watinga, i tok olsem bipo em i Luteren tasol nau em i kamap memba bilong AOG, em i amamas long lukim sios bilong God i wok long gro na wok bung wantaim na givim amamas i go/long God.

Ol mama long Morata kisim helpim

Joe Ivaharia i raitim

WANPELA grup bilong ol mama long Morata namba 4 insait long Pot Mosbi i bin kisim sampela helpim i kam long wanpela sios grup Latter-Day Saints.

Dispela i bin kamap bihain long wanpela kain wokabout bilong wanpela pasta bilong sios elder James Keung i bin go raun lukluk long hap.

Grup bilong ol mama ol i kolim Foa Siti Womens grup husat ol memba bilong ol mak olsem 67 i kam long olgeta hap bilong kantri na ol i stap long Morata namba 4.

Presiden bilong grup Margaret Yom i bin tok olsem dispela grup bilong ol mama i bin stat long Mas 5 dispela yia we i bin gat 4-pela memba tasol.


Bihain ol i go askim ol arapela long kam insait na joinim grup we namba nau i stap long 67 memba.

Wok bilong dispela grup em long stretim na helpim sindaun bilong ol wanwan famili insait long komyuniti bilong ol husat i gat ol hevi wantaim man o long sait bilong marit we i bruk na ol arapela kainkain birua we i save kamap long meri wantaim pikinini, misis Yom i tok.

Em i bin tok tu olsem nau ol i ronim pinis wanpela pri-skul we ol pikinini bilong ol long dispela hap i ken go lainim ol skul samting long en. Nau i gat moa long 40 sumatin i stap insait long dispela skul.

Long wankain taim tu ol i stat pinis long kamapim wanpela klasrum bilong ol sumatin long sindaun insait long en we ol mama yet wantaim liklik helpim long ol man bilong ol i wok long sanapim i stap.

Narapela wok tu ol i mekim em long kamapim wanpela senta bilong ol mama na pikinini husat i wok long painim planti



• **Ol mama wantaim ol pikinini i amamas long kisim ol samting.** Foto: JOE IVAHARIA

birua i kam long man o papa bilong ol.

Dispela senta em bai olsem wanpela haus bilong slip na kaikai na long wankain taim bai i gat kaunseling sevis tu we ol mama bai toktok long stretim ol hevi bilong dispela ol famili.

Misis Yom i tok ol memba bilong em i bin kisim luksave na helpim i kam long komyuniti polising divisen bilong Waigani polis stesin we polisman Sarjen Toitoi na Polimeri Sarjen Petrina Dikin i bin go pas long ronim wanpela tripela dei woksop long setelmen bilong ol.

Long dispela woksop ol mama i save

nau long we bilong sindaun na lukautim gut ol famili bilong ol na long wankain taim helpim ol arapela lain tu.

Nau ol i ken mekim ol kain wok olsem samapim ol klos, we bilong kuk, na pasin bilong mekim ol hankraf olsem bilum o basket.

Waigani polis stesin komanda Inspekta Steven Kapera i bin stap long lukim dispela bung na long wankain taim makim Latter-Day Saints sios na i givim ol samting i go long ol mama na ol sumatin. Dispela ol samting bai helpim sindaun bilong ol pipel.

Raskol pasin kamap bikpela long Pot Mosbi

...Toktok bilong polis long sut long kilim, i stap yet

RASKOL pasin long Pot Mosbi i wok long kamap bikpela, tasol polis tu i wok long wok strong long daunim ol dispela pasin.

Las wik Nesenel Kapitel Distrik (NCD)/Sentrel Polis Komanda, Tony Wagambie, i bin tok olsem polis bai sut long gan long kilim tasol ol raskol.

Komanda Wagambie i bin mekim dispela toktok bihain long planti ol bikpela raskol pasin i wok long kamap.

Wanpela bilong ol dispela bikpela raskol pasin we i bin kamap em stil pasin wantaim gan we i bin kamap long namba tu bikpela hotel long Pot Mosbi, Holiday Inn, las wik.

Ol raskol i bin stilim bikpela mani long dispela taim long hotel.

Tasol ol polis i holim pasim pinis na sasim wanpela man husat i gat 33 krismas, husat

ol i bilip i bin wanpela bilong ol dispela raskol husat i bin kamapim dispela stil pasin wantaim gan long hotel.

Dispela man Top Lukson Gaunede bilong ples bilong Paip long Laiagam, Enga provins, i stap long han bilong polis nau na i kisim sas pinis bilong kamapim stil pasin wantaim gan.

Polis i bin kisim tu wanpela liklik gan, 7-pela bulet, 3-pela beng kad we em i bin stilim, K400, ol ki bilong kar na wanpela nupela redio, mani mak bilong en olsem K3000, long Gaunede.

Komanda Wagambie i tok Gaunede em i wanpela tasol bilong planti arapela raskol, husat i kamapim ol raskol pasin, we polis i wok long holim pasim.

Komanda Wagambie i bilip olsem polis i

wok long holim pasim ol memba bilong wanpela bikpela raskol grup long siti we i save skelim gut rabis wok bilong ol bipo ol i karimautim ol.

Long stat bilong ol wok bilong polis long daunim na stopim ol raskol pasin long siti, polis i bin holim pasim 4-pela raskol husat i wok long traim long stil long ol manmeri husat i bin go insait long Boroko Entertainment Senta long pilai long laki masin.

Polis i bilip olsem wanpela bikpela raskol grup i wok long kamapim ol dispela raskol pasin long wanem wankain kar we sampela raskol i bin yusim long stil long Speed Guesthouse, laisen plet CAK 358, ol raskol i bin yusim gen long stil Boroko Entertainment Senta na long Holiday Inn.

Komanda Wagambie i tok olsem ol i bilip olsem dispela wankain grup tasol i bin ol dispela raskol husat i bin kamapim stil pasin wantaim gan long namba wan bikpela hotel long Pot Mosbi, Crowne Plaza, long sampela wik i go pinis, na husat i wok long stilim planti ol kar long siti.

Em i tok tu olsem polis i kilim 2-pela raskol taim ol i pait wantaim gan wantaim ol polis long las Fraide.

Ol raskol i bin traim long ronawe long bihain long ol i bin stil long Mainland Plumbing Senta taim ol i bin bungim ol polis na dispela pait i bin kirap, Komanda Wagambie i tok.

Em i tok ol polis bai karimaut ol rot blok raunim siti na go het yet long ol wok bilong ol.



MONEY SAVING

KEROSENE MOTOR

WAS K10,439

NOW K8,799

PRICE INCLUDES GST

SAVE K1,640

HURRY WHILE STOCKS LAST!

FOR FURTHER INFORMATION CONTACT : JAMES MOVEH
PH 3229608 FAX 3217268. EMAIL: jmoveh@elamotors.com.pg

Ela Motors
YAMAHA

Powering the Nation


BRANCHES NATIONWIDE

- MORESBY : PH 3229488
- LAE : PH 4781800
- KOKOPO : PH 9829100
- MADANG : PH 8522188
- GOROKA : PH 7321844
- HAGEN : PH 5421888
- WEWAK : PH 8562255
- KAVIENG : PH 9842788
- KIMBE : PH 9835155
- TABUBIL : PH 5489060
- VANIMO : PH 8571254
- PORGERA : PH 5479367
- LIHIR : PH 9864099
- ALOTAU : PH 6410100
- BUKA : PH 9739915

www.elamotors.com.pg

OFFER EXPIRES : 30 / 06 / 2004.





Opim opis bilong

WANTOK *niuspepa*
long

JUN 8, 2004

"Mi laik tok amamas long Word Publishing Company long ol hat wok em i mekim long karim nius na toksave long wanpela tok ples bilong yumi we planti lain i save long toktok."- Praim Minista Sir Michael Somare

Meri i gat namba i dai

... Sista Vai bin kirapim Baha'i lotu long PNG

I no planti taim yumi save harim olsem long sampela hap bilong wol, wanpela meri i kirapim o statim lotu. Nogat. Em ol man tasol. Tasol hia, yumi ritim stori bilong wanpela meri Australia i bin kam long PNG 50 krismas i go pinis na planim Baha'i lotu. Na em i soim olsem ol meri tu inap long mekim wok we pastaim, ol man tasol i save wokim.

MAMA bilong Baha'i lotu insait long PNG husat planti sios memba na ol arapela lain insait long Helt Dipatmen i save long en i dai pinis.

Nem bilong em Violet Hoenhnke na em bin gat 87 krismas. Em bin sik long sampela taim na i dai long las Fraide, Me 4 long haus bilong em long Pot Mosbi.

Ol sios memba, ol pren na save-lain i save kolim em long Sista Vai.

I no long taim na Sista Vai i bin selebretim 50 yia long karim Baha'i lotu i kam long PNG. Dispela em long yia 1954. Na em i bin stap insait long PNG na karimaut wok bilong em long Metron o nes long wok long ol manmeri. Em bin wok olsem nes long planti hap bilong PNG na planti manmeri i bin save long em.

Bihain long 50 krismas long Violette i kisim Baha'i lotu i kam long PNG, i gat samting olsem 50,000 memba i stap long ol taun na viles long PNG. Na dispela wanpela meri i dai nau i bin kirapim ol dispela wok. Liklik stori bilong Sista Vai i go

olsem, mama i karim em long Australia long mun Novemba 1916. Taim em i stap yangpela yet, em bin harim stori bilong Baha'i pastaim na taim em i gat 23 krismas, em i kamap memba bilong Baha'i sios. Em bin kamap olsem namba wan kumap bilong Baha'i Spiritual Asembli bilong Baha'i sios long Melbon, Australia. Long yia 1953, Sista Vai i bin go long wanpela bikipela kibung ol Baha'i na dispela i bin senisim laip bilong em. Long dispela kibung, ol bin askim olgeta Baha'i long lusim asples na go long ol arapela hap long wol we nogat Baha'i i stap long en. Sister Vai i bin redi long kirapim na mekim dispela wok i karim kaikai. Olsem na long mun Julai 1954, em bin namba wan Baha'i i kam long PNG.

Sista Vai i bin skulim wanpela tisa bilon Nu Ailan long dispela nupela lotu. Nem bilong tisa ya em Apelis Mazakmat. Em bin kamap olsem namba wan Baha'i long PNG long yia 1956.

Long sait bilong wok, Sista Vai i bin kamap olsem Metron bilong planti haus sik long PNG. Insait long 17 krismas, em bin wok long ol bikipela haus sik long Lorangau, Rabaul, Samarai, Wewak, Goroka, Madang na Lae. Long yia 1975, em bin kamap olsem sitisen o asples PNG. Taim em i lapun liklik na lusim wok, em bin stap long Hagen long narapela 18 yia inap long em i bin Hagen na kam stap long Mosbi.

Planti manmeri i amamas tru long tingim laip bilong dispela strongpela meri husat i bin helpim tru long lukautim planti manmeri long PNG long sait bilong kisim spiritual/sios, edukesen na helt sevis.

Francesca helpim long kamapim gut Bogenvil

... Nupela mama Lo mas lukautim gut mama na pikinini

Veronica Hatutasi i raitim

LUKIM olsem ol meri na pikinini i gat maus long nupela Bogenvil Lo we na tu, nupela Mama Lo gavman i wok i mas lukautim gut welfea bilong ol meri na tu, givim ol balens tingting bilong helpim komiti we i sindaun long mekim kamap Mama Lo bilong nupela Bogenvil Gavman em ol sampela as tingting we biknem meri long Yumi/Nau FM Redio Francesca Semoso i gat taim em i wok wantaim Bogenvil Konstitusanel Komiti (BCC) long Buka.

Meri husat nem bilong em i bin save pairap nogut tru long Yumi FM Redio asples Mosbi nau i go bek long asples bilong em long Buka, Bogenvil na i stap na wok long helpim komyuniti, pipel na previns bilong em.

Em i tupela ya em i lusim Mosbi siti na em i stap amamas long ples we i no wari long ol kain hevi taun laip, moa yet long Mosbi i gat long en. Moa yet long sekyuriti na sefti sait, wari long kaikai olsem bai famili i gat wanem long tebol long moning na nait, wokabaut na stap bilong ol pikinini long sait bilong bas fea na lans kaikai, baim pawa, wara, ren o haus na pipia bil na ol arapela samting moa olsem we ol pipel long taun i wari long em. Na samting we Francesca i bin wari long en long planti krismas taim em i stap na wok long Mosbi siti inap long 2002 taim em bin go bek long asples bilong em long Malasang long Buka Ailan.

Meri Wantok i bin bungim Francesca long Pot Mosbi long dispela wik na stori liklik wantaim em. Em bin kam long Mosbi long mekim sampela wok i sut long ol Disebel bikos em i save wok wantaim ol Disebel Spots lain long Bogenvil.

Narapela bikipela wok Francesca i stap insait long en em long Komisina wantaim BCC em komiti i bungim, glamis na skelim na wokim ol draf ripot long Mama Lo bilong nupela otonomi gavman bilong Bogenvil. Komiti i gat samting olsem 24 memba na tripela tasol em ol meri. Francesca i makim ol meri long Not Bogenvil, Elizabeth Sawai long Sentrel na Bernadine Kira i makim ol meri long saut Bogenvil.

"Mi luksave olsem dispela komiti em i mekim bikipela wok bikos ol lo ya i no bilong nau tasol, nogat. Em i bilong ol pikinini na bubu bilong yumi bai i kam long bihain taim. Na dispela mama lo em ol pipel bilong Bogenvil yet i kamapim bihain long kisim toktok na tingting bilong ol pipel yet.

"Olsem wanpela meri na mama husat i stap insait long wok bilong kamapim Mama Lo bilong Bogenvil, ol dispela tingting i mas stap wantaim mi olgeta taim. Em long kamapim Mama Lo we i mas lukluk long bihain taim, rot we em bai lukautim na

staiam ol pikinini na ol mama long graun bilong yumi yet we ol arapela i no inap long kam wokim nabaut long ol nau na long bihain taim. Nupela Mama Lo i mas i gat long en lo i lukautim ol meri na mama ol papa i lusim ol long sait bilong welfea na mentenens na long dispela, UNICEF i givim ol gutpela toktok na tingting na pipel wantaim. Ol meri i mas stap insait long ol gavman na stetuteri bodi long mekim ol fea na balens disisen.


Narapela samting tu em dispela Mama Lo i mas i gat long en na wokim bilong em long traim lainim samting long en na abrusim. Long dispela, em i olsem blessing long Bogenvil. Dispela Mama Lo i lukautim envaironmen o bus na graun na wanem samting i stap ananit na antap long graun. Na wanem mak ol pipel i papa long en. Mama Lo i kisim i go insait ol kra, driman na tingting bilong ol pipel na olgeta pipel long Bogenvil i lukluk long em i mas pinis na kamap olsem wanpela pipel lo we Neseleng Gavman

long mi.

Mi stap isi na help Malasang komyuniti skul, komyuniti na ol disebel pipel. Olsem na long wok bilong mi wantaim Disebel spot, mi bin kisim 7-pela disebel spot pilaia i bin stap insait long atletiks na ol bin wokim gut tru long pilai resis long Mosbi long 2002. Mi bin stap olsem Tim Menejeres bilong ol na 5-pela long tim bilong mipela em ol bin kisim ol long nesanel sait. Mipela i bin brukim rekot long Disebel pawa Lifting sait. Dispela tu bebin namba wan taim dispela disebel /spotlain long Bogenvil i stap insait long Nesanel resis bihain long Bogenvil hevi na mi amamas olsem grup we mi lukautim i bin kam gut," Francesca i tok.

Em bin tok em i amamas long gutpela na bikipela wok ol meri Bogenvil i mekim long wok bilong kamapim bel isi na pasin bilong gutpela sindaun i ken kamap bek long Bogenvil.

Francesca i bin stap insait long BETA komiti we i bin glamis ol aplikasen long ol eks paitman na oplikem we ol man bilong ol i bin



• Francesca Semoso i go bek long ples na helpim ol pipel bilong em.

na ol Bogenvil lida i wanbel long en. Na mipela tripela meri tu i sanap strong long i no makim ol meri tasol long strong long ol fea na balens Mama Lo bai lukautim olgeta pipel bilong Bogenvil na gutpela gavman bai i ron gut na i no pundaun long wokim ol pasin i no stret," Francesca i tok.

Em i tok tripela yia i go pinis em bin strongim tingting long go sindaun bek long ples na helpim long wanem rot em i ken. Em no bin suvim het bilong em tasol em bin stap isi na tok wanem rot em i ken helpim komyuniti long en na komyuniti i wanbel long em i helpim ol, em bai go insait.


"Mi bin wok long redio longpela taim tasol taim mi go long bek long Bogenvil, mi bin save hap i gat ol lain i wok pinis long hap na mi noken fosim sait

dai long pait, bilong kisim helpim mani we AusAID i bin givim K10 milien helpim bilong ol (eks paitman) i kirapim ol projek long helpim ol i sindaun bek gut long komyuniti na long wankain taim tu, helpim ol pulim mani long en.

Em bin tok sampela mama i bin strongim tingting long go arapela save Bogenvil manmeri i stap ausait long ailan long tingting gut long kontribusen ol i ken mekim long helpim Bogenvil na pipel bilong em long rot bilong kisim gutpela na trupela amamas aninit long nupela demokretik gavman.

Meri Wantok i laik save sapos yupela i save laikim ol stori mipela i save printim. Rait i kam long Meri Wantok, Word Publishing Company, PO Box 1982, Boroko, NCD o ring i kam long telipon 325 2500 na toktok long Veronica Hatutasi o Barbara Tomi. Yu ken salim ol stori tu long email: word@global.net.pg.

Kisim save long SKUL BILONG LAIP



Tok Tok Nating
Wantaim Fr Paul
Liwun SVD



LAS Sande, Jun 6, 2004 - Sios i bin selebretim bikpela de bilong God Triwan. Em i wanpela misteri insait long bilip bilong Sios na yumi i gat bilip long en. Olgeta taim yumi statim prea na pinisim prea, yumi save kolim God Triwan taim yumi mekim mak bilong kruse.

Bilip bilong ol Katolik manmeri i soim olsem, taim yumi mekim mak bilong kruse long foret bilong wanpela man o meri, i soim olsem i gat gutpela rilesensip namel long manmeri wantaim God na prea bai dispela rilesensip bai kamap strong wantaim God. Pasin bilong mekim mak bilong kruse em i wanpela bikpela samting insait long lotu bilong Katolik Sios.

Long histori bilong sios, i soim olsem, long mekim mak bilong kruse long Bodi bilong manmeri em i wanpela strongpela devosen stat long namba tu senturi, insait long Katolik Sios. Santu Blase i tokaut olsem ol Kristen manmeri i save mekim mak bilong kruse long foret bilong ol. Bihain ol i bin mekim tu long bros na ai bilong ol. Sampela i bin yusim Santu Komunio long mekim mak bilong kruse.

Long namba faiv senturi, ol i bin mekim mak bilong top bilong bodi long mekim mak bilong kruse. Long senturi namba siks, i gat wanpela strongpela muvmen i yusim tupela pinga long mekim mak bilong kruse. Dispela pasin i soim bilip bilong ol long Jisas Kraus em i trupela God na trupela man tu. Tasol i gat sampela manmeri i bin mekim mak bilong kruse long tripela pinga wantaim long soim bilip bilong ol long God Triwan; Papa, Pikinini na Holi Spirit.

Insait long western Sios, dispela pasin bilong makim mak bilong kruse i bin kamap long taim bilong Pop Innocentius III, long 13 senturi. Pasin bilong mekim mak bilong kruse long tripela pinga na tasim left solda na bihain i go long rait solda - em i wanpela we bilong ekspresim bilip bilong ol pipel. Bihain long sampela taim, ol manmeri i mekim mak bilong kruse i no yusim tripela pinga tasol. Ol i bin yusim han i op stat long foret, i go daun long bros na bihain i go long left solda na rait solda. Dispela i bin kamap olsem ritual bilong Katolik Sios inap long tude.

Pasin bilong makim mak bilong kruse tu i bin kamap olsem wanpela gutpela pasin bilong mekim lotu insait long sios. Em i bin stat long senturi namba tri. Wanpela eksampel - long yia 215, Bisop Hypolitus - olgeta taim em i bin mekim mak bilong kruse long foret bilong ol Kristen manmeri i kamap nupela yet insait long sios.

Long 9 senturi, i gat wanpela bikpela bung bilong ol bisop, ol i bin tok orait long olgeta pris long mekim mak bilong kruse long taim bilong misa long yusim bikpela pinga na tupela pinga i op. Ol save man i no save kila long wanem taim formula God Triwan i bin kamap insait long mak bilong kruse insait long tradisen bilong Katolik sios. Tasol ol i bilip strong olsem olpela fomula bilong mak bilong kruse i bin kamap wantaim fomula bilong God Triwan. Insait long lsten sios tu ol i bin yusim wankain we olsem ol i yusim long western sios. Long mekim mak bilong kruse long poret, lip na bros wantaim wanpela liklik mak bilong kruse i soim olsem yumi laik opim gutpela tingting na gutpela lewa long kisim Tok bilong God.

Asdaiosis Jenerel Asembli komiti bungim ol ripot

...Redi long bikpela bung neks mun

Veronica Hatutasi i raitim

KATOLIK Sios i mekim ol wok redi nau long bikpela Jenerel Asembli bung bai kamap long Vunapope, Is Nu Briten provins long neks mun.

Pot Mosbi Asdaiosis Pastorel grup insait long ol wok redi bilong em nau i kisim ol ripot bilong ol wan wan peris long glasim na skelim na kamap wantaim Misisin na Visen stetmen bilong em long kisim i go long bung long Vunapope.

Siaman bilong Asdaiosis Pastorel grup Pater Owen Ani i tok bekim bilong ol peris insait long Asdaiosis i no gutpela tumas olsem ol bin laikim long en. Tasol ol bai wok long ol dispela ripot ol i kisim na bungim wantaim long kisim i go long bung. Na long dispela bung olgeta 19-pela Katolik daiosis insait long PNG bai prisnim ol ripot na Asembli bung bai glasim na skelim ol na kamap wantaim wanpela Nesanel Misisin na Visin bilong sios long PNG we bai kamap olsem stia long ol yia i kam.

"Sampela peris i givim gutpela bekim na wokim ful ripot, sampela i wokim hap na

bekim bilong ol ripot i wok long kam insait isi isi. Ating dispela i kamap bikos i no bin gat inap aweanes wok i bin kamap na go daun long olgeta sios memba long ol peris na komyuniti. Tu, hevi long sait bilong printing na sampela peris i no bin kisim na redim ol metiriel i mekim na bekim ripot long ol kwesten topik we ol peris i bin redi gut. Tasol mipela bai kisim ol ripot bilong ol dispela i redim bilong ol na wokim bilong mipela," Pater Owen i tok.

Em i tok Asdaiosis bai lonsim Asdaiosis Misisin na Visin stetmen bilong em long wanpela bikpela lotu we ol peris na sios memba bai holim insait long Sir John Guise stedium long Sande Jun 27.

Oksileri Bisop bilong Pot Mosbi Asdaiosis Bisop Cherubim Dambui i tok ol samting we Jenerel Asembli i toktok long en, glasim na skelim i bin kamap bihainim pas bilong hetman bilong Katolik Sios long wol em Pop Paul 2 i mekim long olgeta Katolik long wol ol i kolim long: "Novo Milenium Inente" o Kamap bilong Nupela Milenium. Na narapela pas-gen i go long sios insait long faivpela kontinen

we dispela i sut long sios long Oseania ol i kolim long "Post Synodol Apostolic Exortation Ecclesia in Oceania".

I gat 36 toktok i stap insait we em i askim ol sios long lukluk na glasim na skelim

Olgeta eria bilong laip na mekim ol senis na ripot long stretim na redim rot long givim stia long sios long ol yia i kam.

Em i tok olgeta daiosis, peris, ol sios institusen na ol arapela grup i stap insait long wok bilong sios i bin kisim ol toktok na wokim ol ripot bilong ol long en.

Nesanel Visen na Misisin stetmen bai givim stia long ol daiosis long ol wok evanjelaisesen na ol arapela wok bilong sios insait long nupela milenium.

Bung bilong pasim Jenerel Asembli yia we sios i bin lonsim long mun Janueri las yia bai kamap long wanpela wik na i stat wantaim bikpela misa lotu long Julai 4 long Vunapope na pinis Sande de namba 11. Ol i ting moa long 200 bikman bilong sios bai kamap long bung. Long dispela, bai gat 5-pela opisel delegesen an 20 pilgrim long wan wan daiosis.

Tupela pasto kisim odinesen

Michael Novingu i raitim

MOA long 500 manmeri i bin kamap long Memoriel Luteran Sios long Madang long witness odinesen bilong na Pastro Lua Boglau long karim aut wok bilong Bikpela.

Hetbisop bilong Evanjelikel Reveren Gaudneio Cruz Luteran Sios bilong PNG (ELC-PNG) Dokta Wesley Kigasung, ELC/PNG Distrik Presiden Reveren Nawon Melambo na ELC/PNG Madang seket presiden Markut Kamang i bin givim blessing long tupela pasto ya. Tupela i bin mekim tok promis long karimaut wok bilong Bikpela long sios na surukim Gutnius i go long aut long olgeta pipel bilong Madang

Distrik na provins na komyuniti bilong yumi long PNG.

Dokta Kigasung i bin welkamim tu ol manmeri na ol lain bilong ol arapela sios i bin kisim askim long witness dispela bikde bilong tupela.

Em bin skruim tok na tok olsem strong bilong God i brukim kalsa, pasin nogut bilong mipela na i bringim amamas long laikim ol narapela manmeri i kam bung wantaim. Em bin tok sapos dispela marimari bilong Bikpela i no stap, ol i no inap long kam long bung wantaim long dispela taim.

Em bin tok maski wanem lotu yumi kam long en, yumi save lotuim wanpela God tasol na yumi mas sanap strong long wok bung wantaim.



Pastro Lua i kisim blesing long Rev Dokta Kigasung (fran). Foto: MICHAEL NOVINGU

"Yumi mas opim lewa bilong yumi na harim Tok bilong Bikpela. Na bihainim Kraus na helpim tupela pasto ya long bildim sios bilong Bikpela. Bilip yu gat long en yu mas serim. Sapos yu no serim, bai yu kilim idai sios. Inap long dispela bilip yu gat long en i karim kaikai na dispela bilip bai yu

surukim i go long ol pikinini bilong mipela, em i askim. Em bin askim ol pipel bilong Madang long senisim pasin nogut bilong ol na kam bilip manmeri bilong Kraus. Long wankain taim tu, Siaman bilong Memoriel Luteran Sios Karl Ujah i bin tok tenkyu long ol arapela

lain husat i bin kisim askim na kam long witness odinesen, ol singsing na drama grup, Filipino komyuniti, Kumia grup na ol arapela manmeri long kam long dispela bikpela selebresen bilong tupela wokman bilong God na i bin go gut tasol wantaim nogat trabel long en.



Bikpela em i gutpela ston i gat laip

Yupela i kamap nupela pinis, olsem na yupela i mas lusim olgeta ol pasin nogut na pasin bilong tok giaman na olgeta arapela pasin bilong giaman. Na pasin bilong bel nogut long man i gat planti samting, na olgeta tok baksait, em yupela i mas lusim. Yumi save, nupela pikinini em i save laikim tumas susu. Olsem tasol yupela i mas laikim tumas long kisim gutpela susu i kam long God, na i no gat samting nogut i stap long en. Em dispela kain susu i save helpim spirit bilong yupela i kamap bikpela na strongpela long nupela laip God i givim long yupela, na bai yupela i stap gut wantaim God.

1 Pita 2: 1 - 2

Ol Katolik skul bai holim kombain lotu tumora

Veronica Hatutasi i raitim

OL KATOLIK skul insait long Nesanel Kapitel Distrik bai holim kombain sios sevis long Sir John Guise Stedim long tumora bilong makim pinis bilong Jenerel Asembli yia.

Teti faiv (35) Katolik edukesen institusen we i karamapim ol hai skul, teknikel, vokesenel, praimer na komyuniti skul bai stap insait long dispela sevis we i save kamap bihain long tupela yia.

Bikpela tingting long holim kombain sevis em long luksave long Jenerel Asembli we Katolik Sios bai pasim long neks mun long Vunapope.

Ol wok long Jenerel Asembli i bin stat long Janueri las yia na insait long dispela, sios long PNG i glasim ol wok kamap na senis insait long

sios na painim rot long givim stia long sios long ol yia i kam.

Ol Katolik skul insait long Pot Mosbi i gat 12,600 sumatin long ol tasol-bikos ol elementeri pikinini i liklik tumas na ol i no inap long stap insait long dispela lotu sevis, mak namel long 7 na 8,000 skul pikinini long Teknikel, Hai, Vokesenel, Praimer na Komyuniti bai stap.

Asbisop bilong Pot Mosbi Katolik Asdaiosis Asbisop Sir Brian Barnes na Oksileri Bisop em Bisop Cherubim Dambui bai go pas long dispela lotu.

Ol arapela pater insait long Asdaiosis tu bai stap long helpim Asbisop na Oksileri Bisop long dispela kombain lotu sevis.

Kombain sevis bai stat long

8.30 moning na pinis klostu long belotaim.

Seketeri bilong Asdaiosis Katolik Edukesen ejensi Ben Kote i tok ejensi i save holim dispela kain kombain sios sevis bilong olgeta ejensi skul bilong em long mekim ol sumatin. i soim luksave na pillim olsem ol i Katolik na ol i praut long dispela. Na tu, ol i luksave na stap insait long spirit na selebresen bilong ol samting i kamap insait long sios na ol i stap insait long lotu, liteji na ofatori.

"Ejensi i ogenaisim dispela kombain misa lotu long kisim olgeta Katolik skul na institusen insait long siti long stap insait long ol samting sios i wokim long en na long kisim piling olsem ol i Katolik na ol i praut long dispela. Olsem na

ol wan wan skul i kisim askim long stap insait long liteji na givim ofa. Ol ofa we i karamapim kaikai, klos, mani na wanem samting ol wan wan skul i bungim na givim em bai ol i givim i go long ol haus sik lain na tu, ol disebel long Cheshire Home long Hohola.

"Etvais bilong mi i go long ol sumatin em ol i mas praut long stap insait long samting we olgeta Katolik long wol i stap long en na long dispela rot, ol i soim komitmen o strongpela laik i go long sios.

Na ol i developim o bihainim ol gutpela velu o pasin, bilip pasin na prela na wosip. Na tu, mekim ol sumatin insait long ol wan wan skul i gat luksave, yunuti, pren pasin, wok bung wantaim namel long ol, Mista Kote i tok.

Hap Hap Nius

**Wol bai amamasim
"Wol Blut Dona" de**

Wol bai selebretim namba wan Wol Blut Dona de long Jun 14. Ol bai lonsim dispela program long Johannesbeg insait long Saut Afrika wantaim program long kirapim dispela kempain ol i kolim long "Blood-a gift for life".

As tingting long kamapim dispela de em i bilong tok tenkyu ol lain i save givim blut long wol bikos kontribusen builong ol i save haelpim ol komyuniti na tu, long strongim ol nupela jenere-sen long givim blut long laik bilong ol.

Inap blut saplai na tu, blut i seif em wampela strongpela na gutpela rot bilong gutpela helt kea sistem.

Tu, em i pawaful o strongpela tul long stopim ol sik long kalap i go long narapela. Tasol planti kantri long wol i save bungim hevi long blut i sot long ol haus sik.

Sampela i bungim hevi long kism blut i no seif na i no gutpela. Hevi long sot long blut i save kamapim hevi, moa yet, long ol pikinini we i save kism sot long blut bihain long sik malaria, bun nating na ol sik olsem i save bagarapim ol.

Na tu, ol meri i gat hevi long karim pikinini na ol lain i bungim ol arapela kain hevi moa olsem. Bikos long givim na kism blut i no gutpela, ol sik we i ken kalap long narapela em long HIV/AIDS, hepataitis Bna C, sifilis, malaria na ol narapela sik moa olsem.

**Luteran De tisa i no
kism pe na sot**

Ol sumatin long Luteran Dei Praimeri skul long Madang taun i askim long kaikai na ol arapela samtiyn long helpim ol tisa bilong ol. Nau yet, 8-pela tisa i no kism yet potnait pe bilong ol. Maski ol tisa i bungim hevi, ol i skruim yet wok tisa bikos ol i tingim ol skul pikinini.

Skul i salim pinis ol pas i go long ol papamama bilong ol pikinini i skul long Luteran Dei long givim helpim i go long ol tisa.

Ol skul pikinini i stat pinis long givim kaikai long ol tisa bilong ol. Singaut i go tu long ol bisnis haus long Madang taun long givim helpim i go long ol tisa ya i stap long hevi.

**PNG sainim agrimen
long daunim pasin bilong
yusim nogut ol pikinini**

YUNICEF na Ministri bilong Komyuniti Developmen i bin sainim agrimen long yusim Stokholm Dekleresen na Eksen wok patna na stap insait long wok bilong daunim na stopim pasin bilong bagarapim na yusim ol pikinini long mekim na kism mani.

Bihainim dispela, PNG i bin joinim 119 kantri long wol na ol Non Gavman ogenesesen husat i wok wantaim long stopim pasin bilong yusim ol pikinini na yangpela long mekim pamuk pasin long komesel na turisim sait.

Stokholm Ajenda bilong Eksen i singaut long ol kantri, olgeta grup long sosaiti long nesanel na rijinel level long egensim pasin long yusim ol pikinini bilong wokim ol pasin i no stret long wokim mani.

Long tok Inglis, ol i kolim dispela long Commercial Exploitation of Children". Namba wan bung long toktok, lukluk, glasim na skelim dispela wari long pasin ya i bin kamap long Sweden long ya 1996 na namba tu long em i bin kamap long Japan long ya 2001.

PNG nau i luksave pinis long dispela hevi na em bai wok long monitaim dispela eria long daunim na stopim dispela samting we i wok long kamap na i salensim ol atoriti long mekim samting long en.

I gutpela long PNG long luksave long ol dispela kain samting we i save bagarapim tru sindaun bilong ol pipel, planti taim ol dispela pipel em ol grasrut husat i no gat inap save o mani long lukautim ol yet.

Nu Silan givim K2.7 milien long sapotim helt sekta

...Kamap kodineta bilong ol developmen patna

Veronica Hatutasi i raitim

NU Silan AID i givim klostu K3 milien long sapotim ol helt program insait long PNG.

Menesa bilong Developmen na Nu Silan AID long PNG Zoe Coulson i bin tokaut long dispela insait long Nesanel Helt Konfrens long Por Mosbi las Fonde.

Helt sekta i save kism bikpela fanding helpim i kam long AusAID, Nu Silan, Wol Helt Ogenesesen na ol han bilong em olsem Yunaitet Nesens Jilren na Edukesen Fan (UNICEF) na Yunaitet Nesens Famili Plening Asosiesen

(UNFPA), Yuropien Yunien, gavman bilong Japan aninit long JICA na ol arapela ovasis dona moa.

Mani mak we Nu Silan i givim olsem kontribusen long helpim wok bilong helt sevis long PNG em long K2,780,000.

Mis Coulson i tok dispela mani bai sapotim ol wok long daunim HIV/AIDS sik malaria, ol sik STD olsem gonoria na sifilis, seif madahut, banis sut bilong ol pikinini, helt sevis long Bogenim, trening ol nes na program bilong helt bilong ol pikinini long Is Sepik. Na tu long sapotim strong wok bilong Helt Sevis Impruvmen Program(HSSIP) Seketeriet.

Nesanel Helt Dipatmen i bin kamapim HSIP program bilong lukim olsem helt sekta i gat inap na gutpela risos long sait bilong mani na ol wokman long karimaut gut ol wok plen bilong helt sekta.

Aninit long wok patna wantaim Nesanel Gavman, ol developmen patna inap sapotim ol bikpela helt sekta program.

AusAID i save givim bikpela hap mani tru long sapotim ol helt sekta program, moa yet, long sait bilong HIV/AIDS.

Olsem wampela long ol developmen patna, Nu Silan AID i kamap kodineta bilong ol dispela (developmen) patna.

**Temu tokim Helt bung long stretim
helt bilong ol meri na pikinini long ples**

**Veronica Hatutasi
i raitim**

TOK strong i go long Nesanel Helt Dipatmen na ol lain i stap long level bilong mekim ol disisen long givim namba wan tingting long givim gutpela helt kea sevis i go long ol meri na pikinini insait long ol viles na rurel eria.

Olpela Helt Seketeri na nau Stet Entaprais na Infomesen Minista Dokta Puka Temu i bin wokim dispela toktok long opening bilong Nesanel helt Konfrens long Pot Mosbi.

Wampela wik bung i bin pinis long las Fraide na i pulim klostu 200 Provisnel Helt Seketeri, ol Provisnel Etministreta, ol helt plena long

nesanel na provinsel level na ol Intenesenel helpim grup olsem AusAID, NZAID, Wol Helt Ogenesesen na ol han bilong em olsem UNICEF na UNFPA, Yuropien Yunien, JICA, Saina na ol arapela dona na NGO grup long bung wantaim na glasim ol wok i karamapim olgeta eria bilong helt kea, etministresen na ol wok kamap long PNG.

Aninit long het tok "Empowering for Healthy Living", Dokta Temu i bin tok bikpela samting nau we Helt Dipatmen na ol lain i save givim helt sevis insait long kantri i mas wokim em long givim strong long ol pipel na ol bai gat helti na gutpela laip.

Em bin tok wantaim ol lesan

yumi lainim, mipela i ken glasim na skelim ol gutpela samting na lukluk long stretim ol samting i sut long sosel na politikel sait.

Em i tok sapos yumi lukluk long ol dispela isu na wokim samting long stretim, em bai helpim tru Helt sekta na tu, ol wok developmen kantri i laik kamapim long en.

Dokta Temu i tok glasim wantaim ol arapela kantri long wol na Pasifik rijen, PNG i no wokim gut long sait bilong helt bilong ol pipel bilong yumi. Olsem na kantri na Helt Dipatmen i mas mekim samting long traim kamapim gut helt rekot we i sut long sait bilong helt kea na sevis..

"Skelim wantaim ol ripot

long wol, Sentrel Esia na Pasifik, mipela (PNG) i no wokim wampela wok go het long ol eria olsem poveti o pasin bilong sot long ol samting, gutpela rot long kism sevis, seif wara bilong dring, gutpela helti kaikai, edukesen bilong ol pikinini meri, givim save na pawa na daunim sik AIDS," Dokta Temu i tok.

"Skelim ol ripot ol i mekim long PNG na ol arapela kantri, long rijen na wol, ol dispela samting i kamap.

"Yumi mas makim o strongim wok long helpim ol trangu grup, distrik na viles. Em i taim nau PNG i kirapim strong wok long long lukautim ol nit o samting we ol lain long trangu o i no kism sevis bikos ol i stap long ol ples longwe i gat long en.

"Mi toktok long ol trangu meri na pikinini i stap insait long ol rurel eria. Mipela i mas kamapim program long helpim ol, sapotim wok long kamapim gut ol rot, kontrolim ol sik we ol dispela pipel i save kism planti taim na kamapim gut ol rot, wara, kaikai na mekim ol kism save o infomesen we bai helpim kamapim gut sindaun, helt, wok mani na laip bilong ol Yumi mas mekim ol dispela samting nau," Dokta Temu i bin tok.

Tasol em i tok long mekim kamap ol diapela i wok, sapot na wok bung wantaim i mas kam long ol patna bilong Helt Dipatmen olsem ol lain long Sentrel Kontrol seksen, Provisnel na Lokol Level Gavman (LLG), ol dona o helpim grup, praiwet sekta na komyuniti we i i gat long en ol sios na Non Gavman grup.



• Sampela ol lain husat i bin kamap long helt bung i harim gut toktok i stap. Foto: CATHOLIC FAMILY LIFE APOSTOLATE

Lukautim gut solwara, bus na graun

...Skulim ol sumatin long luksave long envaironmen

LUKAUTIM gut envaironmen we i karamapim ol bus, graun, diwai, wara na ol samting i stap aninit na antap i bikpela samting na ol kantri na komyuniti i kism bikpela askim long wokim dispela.

Wol Envaironmen de i bin kamap long las Sarere Jun 5. Hettok bilong dispela de em "Wanted! Seas and Oceans-Dead or Alive?" Long Tok Pisin dispela i min olsem "Laikim!Solwara na Osen- Dal o stap Laip? Long olgeta kantri long wol, ol 'bin wokim ol samting long luksave long dispela de.

Eking Seketeri bilong Edukesen Dokta Joseph Pagelio i tok bihainim het tok bilong dispela de, dipatmen i luksave long de ya na i save putim long skul kalenda bilong ol skul long wokim ol spesel aktiviti

antap long nomol skul program bilong ol. Sampela skul i bin planim ol diwai na flaua, putim ol drama pilai na ol arapela samting we i soim olsem ol skul pikinini, husat i lida na lain bilong tumora i luksave long envaironmen na ol i wokim samting long lukautim na sevim ol busgraun na wara bilong yumi.

Long mesej bilong Dokta Pagelio, em bin tok ol aktiviti long dispela de i bin sut long strongim ol sumatin long lainim lukautim ol solwara na nambais i stap helti na klin.

"Planti pipel long PNG husat i save stap long ol nambis ples i mas lukautim gut solwara na nambis. Ol lain i save stap klostu long ol wara na raunwara i mas lukautim gut na klinim ol wara na tu, tingim olsem

wara i save go kapsait long solwara. Plis, noken tromaom ol pipia i go long solwara, ol wara na ol raunwara." Dokta Pagelio i tok.

Em i tok ol solwara na wara i bikpela samting long mipela bikos ol i ples bilong planti animel na diwai samting. Ol i save givim yumi long kaikai na mani long fising na wok turis.

Em bin tok moa tu, olsem ol solwara na wara i bikpela samting long ol asples lain na rot bilong karimaut intenesenel tred.

Bikpela mesej em bin wokim long ol tisa long dispela de em long helpim ol sumatin long lainim long lukautim gut solwara i stap klin na helti long nau na tu long ol pikinini na bubu bai kamap bihain long yumi.

Holy Spirit Skul winim prais bilong ron long sip

Melly Steven bilong DWU i raitim

OL GRED 7 skul manki bilong Holy Spirit Praimeri Skul long Madang i winim prais bilong ron long Lutheran Sip bihain long ol soim ol gutpela piksa long makim Wol Envaironmen we i kamap long las wik.


Oi i kisim wanpela de long ron long Lutheran Sip na raun long hap bilong Madang. Las wik ol i kisim dispela prais long regista bilong Madang

Maritime Koles.

Dispela raun bai kamap tete. Resis bilong soim ol pen, dro, stori, poetry i kisim olgeta skul long Madang tauh eria we ol i kamap long en. Het tok bilong dispela so em "Laikim Solwara na ol samting i stap long en i dai o stap laip!"

Wantaim Holy Spirit em Kusbau na Lutheran Day Praimeri skul husat i winim ol prais long gutpela so bilong o.

Oi i kisim ol buk olsem prais we Yuropian Yunion i givim long ol.




• Antap rait: Yuropian Yunion Sean Marriott i amamas long mausmanki bilong Kusbau Gred 7 long taim em i givim presen long ol. Antap: Pablik long Madang i gat sans long lukluk long ol piksa bilong amamasim envaironmen na we ol pipel i lukautaim ol gut. *Oi foto: STEPHANIE ELIZAH*



• Dispela em ol lain sumatin bilong Hahela, Sohano, Malasang na Kahule praimeri skul i kisim sakramen bilong konfemasio long Hahela Katolik peris long Pentekos Sande. Bisop Henk Kronenberg i sanap wantaim ol. Moa long 100 skul sumatin i bin kisim konfemasio. *Poto: ALOYSIUS LAUKAI*

• Antap raithan: Pasto bilong Latter Day Saints Elder James Keung i amamas long kisim piksa wantaim ol sumatin i bilas long amamasim ol pren bilong ol husat i bin helpim ol long givim ol skul samting long Foa Siti pri-skul long Morata 4 long Pot Mosbi. *Poto: JOE IVAHARIA*

• Raithan: Em i no kibung bilong ol niusman, nogat. Oi bikman bilong *National Newspaper* Yehiura Hriewazi (namel), John Eggins (lephan) bilong EMTV na ripota bilong *Wantok Niuspepa* Neville Choi i toktok long ol wok bilong long taim bilong opim nupela opis bilong *Wantok Niuspepa* long Tunde.



Save moa long CSEC

... Wanem samting PNG gavman na turisim bisnis i mas mekim

Barbara Tomi i raitim

LAS wik yumi ritim ol hevi turisim bisnis i ken kamapim long Papua Niugini long sait bilong bagarapim ol pikinini we ol papamama o was manmeri i yusim ol pikinini aninit long 16 krismas long mekim wok long pulim. Dispela long Englis ol i kolim Commercial Sexual Exploitation of Children (CSEC).

Dispela wik bai yumi lukluk long ol rot we yumi i ken daunim dispela hevi.

Bikpela wok bilong daunim dispela hevi i mas pundaun antap long ol turisim bisnis, gavman na ol grup i save lukautim gutpela sindaun bilong ol pikinini.

Ol sampela rot we turisim bisnis i ken helpim

Kamapim ol trening, putim ol tok-save, mekim ol posta, ol vidio long taim balus i ron na mekim kamap wanpela wok pasin (code of conduct) we planti ol arapela turisim bisnis long wol i kamapim long daunim CSEC. Long intanesenel level, ol turisim bisnis we i save karim ol turis raun o travel indastri na ol balus, sip na trein o bas bisnis wantaim ol hotel na motel i wok bung long kamapim ol polisi we ol memba bilong ol i mas karim aut o bihainim. I gat wanpela tok orait pinis we ol travel indastri long wol olsem International Air Transport Association (IATA), International Hotel and Restaurant Association (IHRA), the Universal Dederation of Travel Agents Associations (UFTAA) na World Tourism Organization (WTO).

Wok bilong Child Sex Tourism Lo em long daunim hevi na givim mekim-save long ol lain i mekim wok bilong salim pikinini olsem bisnis.

Salens bilong yumi long Papua Niugini long lokal level em long ol turisim bisnis o travel indastri i luksave long ol dispela wok pasin na ol polisi na long kisim na yusim long daunim CSEC. Wok bilong lainim na trenim ol wok manmeri long bihainim ol dispela wok pasin na polisi i mas kamap na go het na menesmen i mas kamapim open diskasesen o sans long ol manmeri i ken patim tok long ol isu bilong pikinini seks turisim.

Wanpela grup i go pas long kirapim dispela luksave em Child Wise na ol i gat ol savelain na ol program i sut long daunim hevi bilong CSEC na pikinini seks turisim.

Wok bilong ol i helpim Gavman bilong Australia long luksave long dispela hevi na kamapim ol lo long lukautim ol pikinini i bungim dispela hevi, givim mekim-save long ol birua lain na tu long helpim ol birua lain long mekim mekim dispela trabel gen.

Ol sampela wok go het Australia i kamapim em:

- Travel with Care em wanpela

edukesen program bilong pikinini seks turisim aninit long go pas bilong Child Wise na Pikinini Seks Turisim Lo. Aninit long ol dispela program ol i kamapim sampela liklik buk bilong ol lain i raun, ol konsaltesen na trening wantaim travel indastri, kamapim kirikulam bilong travel na turisim trening na ol toksave buk wantaim ol vidio bilong ol sumatin na ol wok manmeri bilong travel indastri.

- AFTA deklaresen o tok orait egen-sim pikinini seks turisim,

- Tourism Training Australia i kamapim turisim diploma na setifiket kos long pikinini seks turisim we ol wok manmeri i mas kisim. Dispela kos i sut long Child Sex Tourism lo bilong Australia na sosel wok o risponsibili bilong ol long lukautim ol pikinini. I gat wok i stap yet long kamapim wanpela kirikulam yunit long Child Sex Tourism, na

- Buk bilong Laws for Travellers.

Ol arapela rot bilong daunim pikinini seks turisim em:- Senisim pasin bilong komyuniti long ol i luksave olsem CSEC em i rong na i no gutpela;

- Kamapim sampela rot bilong daunim poveti o nogat;

- Kamapim Extra-territorial Child Sex lo long kotim ol lain i kamapim birua long bagarapim pikinini long narapela kantri we ol i no kisim sas; na

- Kamapim wok bung long intanesenel level.

Lo bilong pikinini seks turisim

Extra-territorial lo em wanpela bikpela na strongpela rot we i wok long helpim CSEC na i wok long moa long 30 kantri long wol.

Child Wise i bin go pas long mekim Australia i kamapim senis long lo bilong Crimes (Child Sex Tourism) Amendment Act 1994. Dispela senis i kamap lo long Julai 1994. Aninit long dispela lo, man Australia i mekim pasin pamuk long pikinini aninit long 16 krismas long narapela kantri bai kisim sas. Dispela lo i karamapim wanwan man o meri, kampani o koporesen na mekimsave em 17 yia kalabus na peim fain inap long K500,000. Man o meri husat i salim pikinini o kisim mani long pasin pamuk pikinini i mekim bai kisim dispela mekimsave tu.

Wok bilong Child Sex Tourism Lo em long daunim hevi na givim mekimsave long ol lain i mekim wok bilong salim pikinini olsem bisnis o i wok long kisim mani o win mani long dispela rot. Lo i stap long ol Australia in luksave dispela pasin nogut na stapim pasin bilong bagarapim ol pikinini long dispela rot long olgeta hap bilong wol. Dispela lo i laik kirapim tingting bilong ol arapela kantri long kamapim kain lo olsem long kantri bilong ol long salim strongpela toksave i go long ol kantri ikisim ol turis bilong Australia olsem ol i no save laikim dispela kain pasin na ol gavman i mas givim mekimsave long ol pikinini seks turis. Lo tu i toksave long ol dispela lain i save mekim dispela rabis pasin olsem em i rong long mekim dispela na lo i ken givim mekimsave long ol.

Plen i stap pinis long daunim hevi

BIHAIN long wanpela de wok-sop tupela wik i go pinis, CIMC wantaim halivim bilong Child Wise Australia na ol arapela sosel grup long Papua Niugini i kamapim Draft National Plan of Action long daunim Commercial Sexual Exploitation of Children (CSEC).

Ol astingting i stap insait long National Plan of Action bai CIMC bai putim long han bilong gavman husat i save lukautim family na pikinini aninit long lukaut bilong Lady Carol Kidu em Komyuniti Developmen Dipatmen.

bilong ol wantaim ol arapela wok lain.

b) **Ligel rifom** (ol senis long lo) Ol hap we i mas gat luksave hariap:

■ Krismas bilong ol yangpela long marit na tu lo bilong marit we ol man i save hait bihain long en na bagarapim ol pikinini;

■ Wok etvokasi bilong ol pikinini i kisim bagarap;

■ Kamapim strongpela mekim-save long pasin incest o pasin we papa i mekim marit pasin long pikinini meri; na

■ Kamapim tritmen olsem terapi o we bilong toktok na kisim halivim long lusim kain pasin nogut bilong ol birua lain; na

■ Senis pasin long we komyuniti i ken luksave long ol birua lain na kisim skul.

d) **Victim o bagarap lain sevis**

■ Helpim o rispons i karamapim olgeta eria bilong helpim, na

■ Ol ples we ol pikinini i pilim seif long go (i no haus).

e) **Bungim data** (infomesen)

■ mas i gat gutpela data o infomesen long child abysus na CSEC,

■ Infomesen em pawa olsem na i mas gat ol rekot we ol save-lain i ken lukim as bilong dispela samting na rot long em i save kamapim long traime na daunim; na

■ Husat bai bungim ol dispela data, long wanem rot na amamas taim.

f) **Komyuniti rispons o helpim**

■ Strongim netwok i stap pinis namel long ol komyuniti, gavman na NGO, i mas skul long save long pasin bilong bagarapim pikinini o abysus na CSEC;

■ Ol papamama i mas traime long wokbung wantaim ol pikinini na joinim ol long ol aktiviti bilong ol olsem taim bilong spot we papamama i mas go wantaim pikinini;

■ Olgeta pikinini i mas go long skul, pikinini man na meri wantaim; na

■ Strongim ol gutpela wok we i stap pinis olsem Early Childhood Teachers program long Mt Hagen.



• **Lin Sugal (raithan) wantaim pren bilong em Betty Chapau Madang amamasim Wol Environmen De long Sarere Jun 5 long Madang.** *Poto: STEPHANIE ELIZAH*

Ol dispela astingting em:

a) **Strongim ol institusen**

■ Kamapim kodinesen namel long gavman na ol NGO;

■ Ol savelain bilong CSEC i mas wok strong na serim save

■ Lo o polisi long lukautim ol lain i tokaut long ol kain nogut pasin long atoriti.

c) **Ol birua lain - we abysus o bagarap i save kamap namel long famili o CSEC**



Australian Government Australian Trade Commission

AUSTRALIAN EDUCATION AND TRAINING ROAD SHOW

A roving display featuring 10 Australian Educational institutions promotion education & training courses will be held in Papua New Guinea from 14-19 June.

Road Show Programme

- Mt Hagen - Highlander Hotel
Monday 14 June 8:30 am to 3:00 pm
- Lae - Melanesian Hotel
Tuesday 15 June 8:30 am to 3:00 pm
Wednesday 16 June 8:30 am to 3:00 pm
- Kokopo - Vunapope Conference Centre
Thursday 17 June 8:30 am to 3:00 pm
- Port Moresby - Holiday Inn
Friday 18 June 8:30 am to 4:00 pm
Saturday 19 June 8:30 am to 4:00 pm

Please take the opportunity to discuss your study requirements and curricular interests with participating representatives.

FREE ADMISSION

For further detailed information on participants, please contact:

Christine Lamur
Tel: 325 9150
Fax: 325 9727

WANTOK KOMENTRI

Niuspepa bilong ol PNG stret

"SAPOS yumi i no givim luksave long Tok Pisin, yumi bai i no inap luksave long ol pipel bilong yumi husat i no save long tok Inglis, na husat i save harim, ritim na raitim tok pisin tasol." - Praim Minista Sir Michael Somare i tok taim em i opim nupela opis bilong *Wantok Niuspepa*.

Dispela toktok em i stap long as bilong wok bilong ol wok manmeri long *Wantok Niuspepa*.

Sir Michael i tok tru olsem i nogat inap luksave i save go long Tok Pisin, tasol planti long ol manmeri husat i stap long ples i no save ritim na raitim tok Inglis. Planti long ol i save lainim Tok Pisin bilong wanem Tok Pisin em wanpela tok ples we olgeta manmeri long PNG i save long en.

Wantok Niuspepa em i wanpela niuspepa tasol we i save go stret long manmeri i sindaun long ples husat i no save ritim tok linglis.

Long dispela as tasol, na wok tingting bilong ol wok manmeri long *Wantok Niuspepa* i save strong long givim tok stia, skul na toksave long ol pipel long wanem samting i wok long kamap insait long kantri bilong yumi na long ausait tu.

Planti taim ol bikpela bisnis i no save luksave long strong bilong Tok Pisin long opim tingting bilong ol pipel bilong kantri.

Tasol *Wantok Niuspepa* em wanpela i no inap long opim tingting bilong olgeta manmeri bilong kantri i stap long ples.

Tok Pisin em i wanpela tok ples we ol manmeri bilong Papua Niugini stret i save yusim, olsem na gavman wantaim ol bisnis i mas wok bung wantaim *Wantok Niuspepa* long givim ol pipel ol toksave na nius we i ken surukim save bilong ol pipel na helpim ol long kamapim ol disisen we bai kamapim gutpela sindaun bilong ol pipel.

Sir Michael i tok pinis olsem gavman i luksave long strong bilong Tok Pisin na Motu, narapela tok ples we ol pipel i save long en.

Sapos i gat bikpela luksave long strong bilong Tok Pisin, ating bai ol pipel bilong PNG bai inap long kisim moa save bilong kamapim gutpela sindaun bilong ol yet.

Long sait bilong toksave long ol samting i wok long kamap insait long gavman, bisnis na komyuniti tu, *Wantok Niuspepa* bai i go pas long dispela wok yet.

Sapos *Wantok* i no stap, ating tingting bilong planti manmeri husat i save ritim Tok Pisin tasol bai i hat moa.

Tok Pisin em i tok ples bilong ol Papua Niugini stret. Olsem tu, *Wantok Niuspepa* em i niuspepa bilong ol PNG stret.

Long strong bilong ol samting i kirap long graun bilong yumi yet, bai yumi inap long kamapim bel isi na gutpela sindaun insait long Papua Niugini.



Yupela i no inap popaia sapos yupela wokbung

Toktok bilong John Eggins long opening bilong opis bilong *Wantok Niuspepa*

EM i gutpela na mi amamas long stap long opening bilong nupela opis bilong *Wantok Niuspepa*.

Sapos dispela taim em i no histri, orait yumi ken tok em i kirap gen bilong wanpela bikpela na gutpela tredisen - dispela nius we *Wantok Niuspepa* em i stap long ol strit na em ol i mekim long nupela opis we i gat ol masin bilong dispela taim.

Ol rida bai amamas na ol bikpela lotu husat i save sapotim *Wantok* bai amamas tu wantaim ol etvataisas na ol sapota.

Mi bai go moa long dispela bihain, tasol mi laik tok nau olsem i gat tupela pater i dai pinis bai tanim tanim long matmat wantaim amamas. Ol tupela pater em Pater Frank Mihalic, pater na tu jenelis na Bisop Leo Arkfeld, bisop na tu paillet. Pater Frank Mihalic em papa bilong *Wantok*

Niuspepa long Wewak, Is Sepik provins long 1970 na gutpela sapota bilong wok bilong dispela niuspepa em Bisop Leo.

Dispela namba wan *Wantok Niuspepa* i bin go bikpela na i kamap bikpela tru na em i kamapim sampela moa ol niuspepa aninit long Word Publishing Company olsem mama kampani. Wanpela kain niuspepa em *The Times of PNG* we em i kamap olsem nambawan niuspepa long Pasifik na i kisim luksave.

Yumi mas strongim tingting olsem nau em i stat bilong dispela niuspepa long go bek long ol gutpela taim na strongim wok bilong em olsem bipo.

Wanpela samting em i stap pinis, na dispela em olsem *Wantok Niuspepa* em tokples bilong ol Papua Niugini. Yumi i gat tripela tok ples em yumi save luksave long en. Em Inglis we

em i tokples bilong komes na skul o edukesen, na Motu na Tok Pisin em tok ples bilong kalsa na tu yumi save pilim gutpela moa long toktok. Tok Pisin i kamap olsem wanpela strongpela Tok Pisin winim Motu na tu nau yu ken harim ol strongpela hap bilong Motu olsem planti ol ples long Papua sait i save tok Pisin. I gat planti ol elementri skul long olgeta hap bilong kantri we ol i save lainim ol sumatin long rit na rait long Tok Pisin. Ol pikinini nau i save tok pisin pastaim bihain lainim tok ples bilong ol o Inglis.

Sapos yumi laik lainim o strongim save bilong ol pipel long edukesen, rilijes, sosel, kalsa na ikonomi, yumi mas go daun long level bilong ol na toktok long ol long tok ples ol i save gut long en. *Wantok* em i stap long rait rot long mekim dispela wok. Hevi bilong yupela

tasol em long salim ol pepa bilong yupela i go aut long moa pipel.

Narapela ogenaisesen bipo i pas klostu long ol pipel em Nesenel Brotkasting Komisen o NBC.

Nau yumi harim olsem Kundu sevis bai kirap bek gen na bai strongim ol wokman na meri bilong em wantaim ol risos long go hetim wok bilong kamapim ol program we ol pipel i ken lainim samting na save.

Wantok i stretim rot bilong em pinis long mekim dispela wok na nau ol i mas wok strong long mekim dispela wok karim kaikai.

Wantok o Word Publishing em wanpela bisnis i stap aninit long lukaut bilong ol sios. Ol dispela sios em Katolik, Engliken, Evenjelikel Luteran na Yunaitet sios. Ol dispela wanwan sios tu i gat ol wankain ogenaisesen bilong ol long radio na televisen.

I gat wanpela

nupela Katolik Redio netwok we i stap pinis nau long Pot Mosbi. Bipo ol Luteran tu i save kamapim ol program bilong ol long radio stesen bilong ol long Lae.

I gat tu Religious Television Association i stap pinis long Pot Mosbi. RTA i save kamapim ol kalsarel na sosel programs we i save kamap long EMTV.

Ol sios i gat laik long givim toksave na skulim ol pipel long ol bikpela samting i save kamap we i save helpim long mekim Papua Niugini i go het. Tru olsem ol i bin stap bipo na bai stap yet.

Wanem samting we i no wok long stap em koporesen namel long ol sios i lukautim ol niuspepa, televisen program na radio stesen.

Yupela i tok wankain tokples, yupela yunaited.

Yupela i no inap popaia sapos yupela i wok bung wantaim.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Jeremy Burgess

Editor
Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Not Waghi Memba i mas kamaut long pablik

Dia Edita,
Mi laik makim maus bilong ol sapota na 7706 vota bilong Michael Mas Kal na tok olsem Memba em yet mas kamaut long ples klia na tokim ol pipel bilong Not Waghi long wanem kain wok o developmen em i bin mekim namel long 2002-2004.

Plis MP ol pipel bilong Not Waghi i no save gut long wanem wok yu kamapim. Inap yu sanap long

pablik na tok klia long ol pipel na ol bai i save gut?

Sampela ol dinaw yu stretim, sampela ol komitmen yu promis, sampela ol wok yu gat plen long em.

Plis noken hait long Mosbi. Kam bek long beis na tokaut long pablik.

**MATT DEDEBOH
HOLEYAH
BANZ
WESTEN HAILANS
PROVINS**

OL PAS

Salim pas i kam long
WANTOK

Niuspepa
P.O. Box 1982,
Boroko, PNG

Ol Memba i bihainim mani

Dia edita,
Mi lukim niuspepa bilong Mande 17/04 i kam long Fraide 21/04 bilong ol stori i kamap long palamen na luksave olsem planti MP i muv i go i kam olsem ol batafai.

Plis Sir Michael Somare, i gat wei long yu senisim ol minista gen na givim i go bek long ol bekbensa bilong Gayman bai ol i noken surik surik na welwel olsem ol malio na pis.

Ol dispela bekbensa i bin stap wantaim yu long taim nogut na gutpela taim wantaim. Kain piksa i soim sampela MP i kalap i go sapot gen long PLP lida.

Plis Sir Michael Somare inap yu senisim ol potfolio gen?

**MATT DEDEBOH
HOLEYAH
BANZ
WESTEN HAILANS
PROVINS**

Maski long werim trausis

Dia Edita,
Mi wanpela boi Morobe mi stap long Badili setelmen long Pot Mosbi. Na mi rait i kam long pas susa Joyln Pamba i tok olsem meri i ken werim trausis. Em gutpela tasol mi wanpela mi no save amamas long wanem God Papa em wokim man na meri na yumi i no wankain. Man werim trausis na siot meri werim laplap na klos o meri blaus na yumi ken save olsem man na meri.

**BAU B. TALAESO
BADILI
NCD**

Ol lain bilong baim vanila i daunim prais

Dia edita,
Mi laik raitim dispela pas long *Wantok Niuspepa* bai olgeta vanila fama bilong Is Sepik provins i mas lukim na save olsem ol prais i wok long go daun em ol baiya i pasim tok na wokim na i no long wol maket prais.

Insait long Wewak Taun ol lain i save baim ol vanila long K350, K365 o K310 long wanpela kilogram long A Gret Drai bin mak em 16 sentimita tasol.

Long wol maket prais bilong PNG vanila em i stap yet long gutpela prais taim kantri Madagascar i painim hevi long bikpela saiklon o

strong win. Mi ting dispela PNG Spais Bod ol i westim taim bilong ol long Pot Mosbi na ol i mas kam raun long Is Sepik provins na lukim wanem samting ol fama i wokim bai ol opisa i ken givim skul long ol.

I gat planti vanila i stap long Is Sepik provins na ol baiya i save giamanim ol fama long ol prais na salim long gutpela wol maket prais na kisim bikpela mani nating.

Plis ol baiya long Is Sepik provins na Wewak taun, noken trikim mipela ol fama.

**JOHN KRIOSAKI
WEWAK
IS SEPIK PROVINS**

Westim mani long baim skul fi na nogat wok bihain

Dia Edita,

Mi wanpela manki Finschafen tasol nau mi i stap long Higaturu Oil Pam kampani long Oro provins.

Lukluk na tingting bilong mi i go olsem long sait bilong Edukesen nau em skul fil i go antap tru.

Na nau ol mamapapa ol hat tru long baim skul fi bilong ol pikinini olsem na mi tokim *Wantok Niuspepa* olsem i tru

Edukesen em bikpela samting tasol mi tok olsem long ol mamapapa na brata susa yupela noken westim taim bilong yupela long baim skul fi sapos i gutpela long baim.

Tasol mi tok olsem noken westim mani long baim skul fi ol winim save tasol nogat spes long wok mani na bekim mani bilong ol papamama bilong yupela.

Long wanem nau em wantok sistem em bikpela olsem na nogat spes long wanem

planti ol saveman meri nogat wok na raun nating nating long taun na provins na siti long wanem nogat planti kampani o wok long 19 provins long PNG.

Em tasol yu husat i agensim o sapotim mi amamas tru long lukim bekim bilong yupela.

**P.G. ASAGIONG
POPONDETTA**

Ol meri nogat klos?

Dia Edita,

Mi bus manki i stap long Brahman long Madang. Planti taim mi harim, wan wan taim mi ridim long niuspepa olsem ol meri i komplek tru na save gut tru long sakim toktok bilong werim 6 poket na jin trausis.

Long mun Me 6-12 long Wantok Niuspepa, mi ridim wanpela susa long Bulolo, Morobe provins, em Marie Isophylla i toktok planti na strongim kona bilong em long werim 6 poket na jin trausis. Susa, tok yu mekim mi pilim olsem yu strongim yu yet long lotu na tumbuna o kanaka

pasin.

God i laikim yumi wanwan long luksave na respektim raits bilong wanpela narapela. Long buk bilong Deutronomi sapta 22 lain 5. God i tok long Moses long skulim manmeri long noken werim o yusim klos bilong wanpela arapela. Yu ting God bai kamap long yu wanpela meri tokim yu stopim dispela pasin, na yu ken stop long werim 6 poket na jin trausis?

Yu bin tok tu long go bek long tumbuna pasin, wanem pasin tumbuna i nogut? Yu bon long we? Yes susa, Papua Niugini i fri kantri, yu tok stret.

Yu save long wanem pasin i rait na rong? Yupela ol meri save tumas long strongim kona bilong yupela yet long toktok ya.

Yu luksave long yu olsem yu meri taim yu werim klos samting bilong yupela meri.

God i tokim Moses long meri noken werim trausis bilong man plis ridim na save gut bai yu kamap gutpela mama bihain. Nogut yu ting yu rait na pikinini meri bilong yu bihain bai paul olgeta. Yupela ol meri yupela save harim toktok bilong mama na papa na sindaun harim skul bilong ol tu o nogat?

Plis harim na skelim wanem samting i rait na wanem i rong. Trangu ol man i toktok taim ol pilim sem long lukim olsem yupela i laikim tru trausis bilong ol man ya. Mi no save mipela ol man bai werim wanem?

Ol susa traim harim na respektim ol man bai yumi man tu i ken luksave olsem yupela tu istap. Nau taim mi raun lukluk long taun mi hat tru long luksave meri o man i go.

**BR. P/S 1250
BRAHMAN
MADANG**

Wantok Niuspepa em i niuspepa tru bilong mipela ol grasrut

...Em i no save pret long putimaut belhevi bilong ol papagraun

Dia Edita,

Nem bilong mi Aloysius Kubulan Panusian na mi wanpela asples man bilong Madang Lagoon. Mi gat sotpela toksave tasol!

Toksave bilong mi em olsem: *Wantok Niuspepa* em niuspepa tru bilong mipela ol simpel grasruts pipel bilong PNG. Mipela i save amamas tru long wanem *Wantok* em i yusim Tok Pisin na planti bilong mipela grasrut i save long tok pisin na i no Inglis. Narapela samting em bikos *Wantok* i no save pret long putimaut stretpela nius o stori. Mipela i save olsem em i no isi long putimaut stretpela o trupela nius.

Mipela i save olsem ol niuspepa i save kisim bikpela mani i kam long ol bikpela bikpela kampani husat i mekim wok insait long kantri bilong yumi. Ol niuspepa i save kisim kain mani olsem long putimaut ol advetismen long strongim sait bilong ol kampani. Olsem na ol niuspepa i save skelim gut na i save pret tu taim ol i putimaut ol stori o nius. Nogut Tok Pisin bilong ol i daunim o bagarapim sait na nem bilong ol bikpela kampani na ol bai stop long givim mani long niuspepa, o nogut ol i kotim niuspepa long bagarapim o daunim nem bilong kampani.

Long skelim bilong mi, mi ting *Wantok Niuspepa* em i fit nating niuspepa. Em i no pret, em i save mekim samting stret. *Wantok* i no save pret long putimaut ol bel wari na hevi bilong ol papa na mama



• Ol nius ripota i skelim kambang insait long solwara namel long ol ailan long Madang. Ol i kisim skul long lukautim solwara. Foto: DOKTA PATTY DEBENHAM/SEAWEB

graun (mipela ol grasruts bilong PNG). Long dispela as na mi tok na mi bilip tru olsem *Wantok Niuspepa* em wanpela fit nating niuspepa. Edita yu wantaim olgeta lain long *Wantok Niuspepa* i mas amamas long wanem niuspepa bilong yupela i stap nambawan long lis bilong mi, na bilong Madang pipel na bilong olgeta PNG grasruts. Fit nating!

Las wik *Wantok Niuspepa* i bin putimaut bikpela bel wari bilong mipela Madang Lagoon pipel i kamap long fran pes na long pes tri (3) tu. Bikpela bagarap i kamap long solwara, rip na laip bilong mipela Madang Lagoon pipel, tasol gavman bilong mipela i aipas na kampani tu i iaupas na ol i no bisi long harim belhevi

bilong mipela ol simpel grasruts pipel. Olsem na mipela i amamas taim *Wantok* i putimaut dispela belhevi bilong mipela kamap ples klia.

Wantok Komentri bilong las wik long pes 14 i soim trupela kala olsem em i niuspepa tru bilong mipela ol grasruts bilong Madang na PNG olgeta.

Dispela piksa long *Wantok* Komentri pes (14) long las wik, em tu i kam gut stret na em inapim tru tingting bilong olgeta grasruts. Ful sapot na wanbel em stap

**MI ALOYSIUS KUBULAN PANUSIAN
MADANG LAGOON
C/- P O BOX 1081**

Sikani sapotim meri mekim hait na stil pasin

Dia Edita,

Mi wanpela ex woda nau mi i stap long Tamba Oil Pam Blok, Kimbe. Mi laik bekim toktok bilong CIS Komisina Richard Sikani em tu bin kalabus tasol laki Suprim Kot rausim 6 mun kalabus bilong em.

Em olsem na em toktok sapotim Komanda bilong em, Misis Margaret Garap long braiberi na rausim kalabusman James Kaukama long Lakimata CIS.

Mi i no klia bilong wanem tru na Komisina sapotim dispela meri komanda bilong em. Dispela em trupela korapsen.

Em ol CID long Kimbe ol wokim wok painimaut em tru ya na yet Kominisina i sapotim em.

Komisina inap toktok long Nesenel Gavman long kisim mani bilong mipela ol pensena na peim mipela tasol nogat.

Em save smat tru long toktok long nius midia long traim long kliam nem bilong em. Na wanem samting i kamap long banis kalabus em i no lukluk na toktok.

Mipela ol pensenas i kisim taim stret sampela long mipela ol pikinini bilong mipela skul long bikpela skul bai ol rausim ol long skul.

Ol komisina bilong bipo long CIS ol i no save toktok tumas na mipela save up to date long kisim pensen bilong mipela.

Em CIS eks tok olgeta pinis bilong wan wan mun mipela bai kisim mani tasol nau

mipela kisim taim em 6 - 7pela mun na mipela i no kisim pensen peimen.

Na tu em bin lusim CIS Dipatmen planti yia pinis taim PDM gavman apointim em i kam na i no klia long wok.

Sapos NEC makim ful taim opisa bilong Koreksenenel Sevises bai save na kisim mani long gavman na wokim ol wok na tu bai up to date long peim mipela ol memba long CIS husat i ritaita pinis.

**PETRUS LUS
KIMBE
WES NU BRITEN PROVINS**

Redi long helpim

Switzerlan:

WANPELA helikopta i flai antap long ol bikpela maunten long Switzerlan ol i kolim ol Swiss Alps. Bikpela ren long Switzerlan i mekim na ol atoriti i mas stopim ol bot long ron long hap bilong wara Rhine we i stap long Switzerlan. Ol helikopta i wok long putim was tu long wanem i gat tok olsem nogut ol wara bai tait na bagarapim ol hap tu.




Bikpela drai ples

Algeria:

KADA Chouli, wanpela man husat i bin bikpela long bikpela drai ples ol i save kolim deset i wokabout long ol wesan bilong wanpela bilong ol bikpela deset stret long wol, ol i kolim Sahara Deset. Bipo planti turis i save kam long raun long dispela deset tasol bihain long ol pait i kirap namel long ol paitman bilong ol Islam long 10-pela yia i go pinis i kam inap nau, na moa long 150,000 pipel i dai, ol turis i no save kam moa.

Poto: Paul de Bernden/Reuters



Tingim bek long bikpela pait

Beijing, Saina:

OL POLIS bilong Saina i mas bihain long ol i apim fleg bilong kantri long Tiananmen Square long Beijing, las Fraide moning. Ol i mekim dispela long tingim namba 15 aniveseri bilong wanpela pait namel long ol ami na ol pipel husat i bin kros na strong long Saina i mas kamap wanpela demokretik kantri.

Long dispela nait long June 3 i go long 4 long 1989, ol soldia bilong Saina i bin sut long gan long Beijing, na i bin kilim sampela tausen pipel, na i bin stopim dispela ol pipel husat i bin stap long Tiananmen



Painim drag

Saina:

WANPELA polis dok i lukluk insait long kar long painim drag long wanpela sek poin bilong ol polis long Burma rot klostu long siti bilong Kunming, Yunnan Prowins, Saina. Polis i tok ol i wok long redi long pait egensim namba bilong ol drag we i wok long kam insait long kantri.


Poto: Andrew Wong/Reuters



Baim ol bom beklong stopim woa

Irak:

WANPELA soldia bilong Yunaited Stets ov Amerika (U.S.A) i lainim ol grenet, o ol liklik bom we wanpela i ken holim long han na tromoi, long graun ausait long polis stesen long siti bilong Najaf, 120 kilomita long saut bilong Baghdad. Ol i bin baim ol dispela grenet long ol pipel bilong Irak. Poto: AFP/Ahmad Al-Rubave



Ol makim yu tu

Irak:

WANPELA bikpela lida bilong ol paitman bilong Irak, Moqtada al-Sadr, i lusim wanpela opis long Najaf long las

Fonde bihain long ol pairap i bin kamap long dispela apinun taim ol ami bilong Yunaited Stets ov Amerika i bin pait wantaim ol paitman. Dispela

birua i bin mekim planti handred pipel i ronawe i go hait. Poto: Zohra Bensemra/Reuters



Vot gen

Venezuela:

WANPELA mamba bilong oposisen i amamas long sampela toktok olsem bai i gat vot gen long long lukim husat tri bai presiden bilong Venezuela. Sampela i les long Presiden Hugo Chavez i stap long opis na pait long pawa i wok long kamap bikpela long kantri. Poto: AP/Leslie Mazoch

Paia bilong Olymipik Gems i raun long Australia

Sydney, Australia:

TOP rana bilong Australia husat i bin winim gol medal long 400 mita long Olymipik Gems long Sydney long 2000, na husat i bin laitim tu paia bilong dispela gems, Cathy Freeman, i holim paia bilong gem gen na i ron long namba wan hap bilong dispela ron bilong paia o tos.



We bilong Olymipik Gems em olsem. Tos i mas lusim ples tru bilong en, long Athens, na raun long ol narapela kantri we ol pipel ol i makim long en bai holim na ron o walkabout wantaim, inap tos i kamap long ples stret we gems bai kamap na bai ol i laitim bikpela tos ken long nait we ol bai opim gems.


Long 2000, Sydney i bin holim gems na ol i bin makim Cathy Freeman long paitim bikpela tos long namba wan nait bilong gems. Tasol nau, ples tru we Olymipik Gems i bin kam long en, Athens, bai holim gems, olsem na tos bai raun long 27 kantri na i go bek gen long as ples bilong en. Poto: Rick Rycroft

Presiden soim stail

Colorado, Yunaited Stets ov Amerika:

PRESIDEN bilong Yunaited Stets ov Amerika (U.S.A), George W. Bush i soim stail wantaim Paul Doran bilong Rochester, Nu Yok, taim em i go long greduesen bung bilong ol U.S Air Force Academy long Colorado Springs, Colorado.


Poto: Larry Downing/Reuters



Meri Australia winim Mis Yunives taitel

Ecuador:

LONG PNG yumi gat resis we yumi i save kolim Mis PNG. Long ol narapela hap bilong wol i gat ol wanwan resis long ol kantri tu na i gat bikpela resis tu we olgeta ol meri husat i makim wanwan kantri bai salens long taitel bilong Mis Yunives. I no long taim i go pinis, Jennifer Hawkins, husat i gat 20 krismas na i bilong Sydney Australia, i winim dispela taitel. Long dispela poto em i sanap long Quito long Ecuador long namba wan dei bilong em olsem Mis Yunives. Poto: AP/Miss Universe



Samap em skil bilong olgeta manmeri, yut na lapun wantaim

Hilda Wayne i raitim

OLGETA lapun em yumi save ting olsem ol lain bilong mekim liklik wok tasol long wanem taim bilong ol long mekim ol strongpela wok em pinis nau. Ol lapun tu em i nogat sans long ol i ken rit na rait o lainim ol nupela skils gen.

Dispela tingting em sampela lapun meri insait long wanpela ples ol i kolim Kwalakessj long Wes Nu Briten i soim olsem em i no tru.

Sapos yu laik lainim ol gutpela skils orait pawa i stap wantaim yu yet long kamapim wanem samting yu laikim long laip bilong yu.

Wanpela tisa meri nem bilong em Misis Pidik i go pas long lainim planti moa meri insait long komyuniti bilong em.

Man bilong em Mista Pidik i amamas tru olsem long wanpela trening we Esia Dvelopmen Benk i bin kamapim em yet wantaim meri bilong em i bin go pas long sapotim planti moa yut i ken go na kisim

"Ol mama i lukim ol man bilong ol i luk smat tru wantaim han mak bilong ol na bikpela amamas tru na mipela i krai amamas."

trening bilong samapim klos.

Mista Pidik i tok meri bilong em i klia tru long samap na meri i save samapim ol gutpela klos tru na taim dispela trening i kamap bilong givim sans long moa pipel long lainim skils bilong samap em i tok tingting bilong em i strong tru long lainim.

"Pikinini man bilong mi i save laikim tru wanpela siot bilong em we mi bin baim long-



• Amamasim ol papa...Ol mama hia i stori long gutpela skil bilong samap i bringim amamas i kam insait long famili bilong ol.

pela taim i go pinis tasol em i save laik tru long putim yet.

"Bihain long mi bin kisim skul long we bilong samap nau mi lukim olsem mi ken samapim dispela siot bilong pikinini man bilong mi," Mista Pidik i tok.

Em i tok em i go bek long haus nau em i rausim tret bilong dispela hap siot bilong pikinini bilong em na, em i stat long katim material i bihainim stret dispela siot bilong stoa.

Bihain em i samapim stret bihainim dispela siot we boi bilong em i save laikim long en.

"Taim mi luksave olsem mi ken samapim ol klos bilong famili bilong mi yet nau mi gat

bikpela amamas tru long dispela nupela skil mi bin lainim," Mista Pidik i tok.

Sampela mama insait long komyuniti tu i bin lainim skil bilong samap na ol i amamas tru long dispela gutpela skil bilong ol.

bin mekim long bringim amamas i kam insait long famili," Misis Pidik i tok.

Em i tok ol yut tu i wok long soim bikpela laik tru long lainim dispela kain ol skils tu.



• Yangpela hai skul boi tasol em i strong tru long lainim long samap we planti i ting em wok bilong ol meri tasol.

Ol mama ya i autim amamas bilong ol olsem ol man bilong ol na pikinini bilong ol i save laikim tru wok bilong ol long wanem ol i lukim olsem gutpela skil tru em ol mama na susa bilong ol i bin lainim.

Misis Pidik i stori olsem wanpela Sande bihain long dispela wik we ol mama i bin bung long trening ol i pasim tok na samapim ol yunifom siot bilong olgeta man bilong ol.

Ol mama i wasim gut ol siot taim ol i pinis samap na ol i givim long ol man bilong ol bai ol i putim long taim bilong lotu long Sande.

Long dispela Sande stret olgeta mama i go insait long haus totu wantaim ol pikinini na taim ol i lukim ol papa i bung sanap na wokabout i kam insait long haus lotu olgeta ai i pulap long wara.

"Ol mama i lukim ol man bilong ol i luk smat tru wantaim han mak bilong ol na mipela i krai na amamas long wanem dispela em wanpela gutpela wok tru ol mama i


Misis Pidik i tok em yet wantaim Mista Pidik bai go pas long sapotim ol komyuniti insait long ples bilong tupela long kamapim moa trening na ol pipel i ken save long ol gutpela we bilong sindaun tru long skils trening.

Em i tok planti moa lain i laikim tru dispela kain ol nupela skil we bipo ol i ting olsem i hat long ol tasol nau ol i lukim olsem tingting bilong ol i ken kamap tru sapos ol i laikim senis long laip bilong ol.

Misis Pidik i tok em bai amamas long kamapim moa trening long ples bilong em long helpim moa pipel long lainim we bilong samapim klos.

"Nau ol pipel yet i luksave olsem samap em i no wok bilong ol meri tasol. Ol lapun na yangpela na ol man tu i ken samap.

"Dispela em i wanpela skil we olgeta i ken lainim na helpim ol yet," Misis Pidik i tok.



• Pikinini amamas long papa....Mista Pidik wantaim pikinini man bilong em holim ol klos we Mista Pidik i bin samapim em yet.

Ol Hagen fama mekim save long planim rais

Hilda Wayne i raitim

PASIN bilong lusim planti mani long baim rais long ol stoa bai i no long-pela taim bai ol pipel i lusim long wanem ol pipel bilong Papua Niugini yet i stat long planim rais.

Olgeta wanwan yia Papua Niugini i save givim klostu mak long K1 bilien long baim rais i kam long ol ovasis kantri.

Long Momase i go long Niugini Ailans, Papua na Hailans rijen tu, ol pipel i luksave gut tru olsem rais inap tru long kamap insait long PNG.

Wanpela yangpela man Hagen nem bilong em Charlie Atip i soim olsem maski

"Mi lukim olsem planti famili insait long kantri i wok long lusim moa mani long baim rais."

em i no pinisim skul bilong em tasol sapos ol yangpela i tingting strong na putim han long graun bai ol i ken kisim bikipela kaikai long hat wok bilong ol.

"Mi lukim olsem planti famili insait long kantri i wok long lusim moa mani long baim rais na ol i tok em i hat tru long planim rais olsem na mipela i mas baim rais long stoa tasol," Charlie i tok.

Em i tok dispela tingting i bin stat long bipo kolonial taim i kam nau planti yia i kam i go PNG i wok long baim rais yet.

Las yia Charlie i bin go kisim agrikalsa trening long eko-tek trening senta long Rabaul ol i kolim OISCA.

Long dispela taim em wantaim moa long 60 pipel i bin luksave na lainim planti we bilong planim rais na mekim planti moa wok bilong lukautim ol animol long kisim mani na helpim famili bilong ol insait long PNG.

"Mi lukim olsem ol dispela kos ol i kamapim long OISCA em i gutpela tru long wanem laip bilong ples em i kamap hat na



• Lainim ol yangpela... trena Regina Kanza i soim ol yut long planim rais long Banz.

Thomas Kenzie bilong Tolu komyuniti insait long Not Banz, Westen Hailans provins, i tok moa pipel insait long Waghi hap i wok long planim rais na ol i no moa go long stoa.

Mista Kenzie i tok nau ai bilong ol pipel i op na ol i luksave olsem rais inap tru long kamap long gaden bilong ol na ol i noken baim.

Em i tok taim ol pipel i lukim olsem rais i kamap gut long gaden bilong ol nau ol i amamas moa long wok hat long planim rais.

"Ol pipel i save olsem pipia bilong rais tu em i wanpela gutpela kaikai bilong pik bilong ol na dispela em i kamapim moa helpim long lukautim animol na famili wantaim," Mista Kenzie i tok.

Em i tok long Maria Kwin senta long Banz i gat wanpela rais mil tasol na dispela tasol i givim hevi long ol.

Mista Kenzie i tok moa fama i wok hat long planim rais tasol i nogat inap rais mil bilong helpim ol fama long milim rais bilong ol.

Wanpela trena Misis Regina Kanza husat i save wok hat long trenim moa yut na pipel insait long Waghi hap tu i tok moa pipel i laik tru long lainim we bilong planim rais.

Misis Kanza i tok ol yut husat i save smok mariwana na dringim hom bru i wok long lusim dispela kain pasin bilong ol na ol i stat long lainim ol gutpela we bilong helpim famili bilong ol.

Em i tok taim em i lukim olsem ol yangpela man i laikim tru long lainim gutpela faming skils dispela i mekim em amamas moa long lainim ol long gutpela pasin bilong sindaun isi insait long komyuniti.

Misis Kanza i tok em i gutpela olsem planti moa lain husat i gat save long rais faming i ken givim olgeta helpim long ol pipel insait long kantri na ol PNG pipel yet i ken save gut long we bilong planim rais na noken baim rais long narapela kantri.

Yangpela man Charlie tu i sapotim toktok bilong Misis Kanza na em i tok moa pipel insait long kantri i mas save long gutpela we bilong planim rais na ol we bilong faming na i noken go long stoa olgeta taim long baim samting we yumi yet inap tru long kamapim insait long graun na ples bilong mipela yet.

tru long ol dispela kos bai mipela i ken kisim helpim taim yumi luksave long ol kain gutpela we bilong wok long graun bilong mipela," Charlie i tok.



• Charlie Atip wantaim papa bilong em Mark i sanap lukluk long rais fam bilong Charlie long Wurup ausait tasol long Mt. Hagen.



• Wari long moa rais mil...ol rais fama long Tolu komyuniti i sanap namel long rais gaden bilong ol. Ol i laikim bai ol lida i long helpim ol fama insait long WHP long kisim moa rais mil.

Yu ting wanem ol kain so olsem mad resling, wet siot?

Nau long dispela taim sampela ol hotel long kantri i save kamapim ol pilai o so olsem Mad Resling, Merimeri takol o manmeri takolim narapela narapela bihain long ol i penim gris long bodi bilong ol. Wantok Niuspepa ripota Paul Zuwani i raun long Boroko na askim ol manmeri sapos ol i laikim o i no laikim dispela kain so. Planti manmeri i tok em i no gutpela na olsem ol i no laikim dispela kain so. Tasol sampela i tok em i fridom bilong ol manmeri long mekim olsem. Hia em tingting bilong ol manmeri long dispela kain so.



Francisca Semoso


Francisca Semoso i bilong Buka Ailan, Not Solomon provins. Em i bipo biknem redio meri husat i wok wantaim Nesenel Brodkasting Komisen (NBC) na bihain i wok wantaim PNG FM Yumi FM. Tasol em i lusim na nau i go bek long Buka we em i wok wantaim ol disebel lain long Buka. Em i kam long Pot Mosbi long mekim sampela wok taim *Wantok Niuspepa* i bungim em. Em i tok olsem: "Mi no ting em i rong long kain so i kamap. Kain kain so i ken kamap tasol ol man husat i go pas long so i mas save sapos ples na taim ol i stap long en i orait long ol i kamapim kain so olsem. Dispela long wanem em i laik na fridom bilong ol long kamapim kain so na em i laik bilong ol manmeri husat i laik long lukim dispela kain so long go na lukim. Tasol long ples na taim we em kain so i kamap em i stap long han bilong ol manmeri husat i laik kamapim kain so long skelim tingting pastaim bipo long ol i kamapim. Tasol ol manmeri husat tingting bilong ol i no klia bai kros. Moa long dispela gavman i kisim mani long ol hotel taim em i kisim takis long ol. So bikpela samting mi laik tok long en em i olsem ol lain husat i kamapim kain so olsem i mas skelim ples na taim ol i stap long en bipo long ol i holim so.



Morgan Orumo


Morgan Orumo i bilong Okapa long Isten Hailans provins. Em i no wok tasol i stap long strong bilong em yet. Em i strongpela SDA man na i ting olsem: "PNG em i Kristen kantri tasol bilong wanem na kain so i kamap. Sapos Kristen kantri orait em i mas kamapim ol so we i

helpim sindaun bilong ol manmeri na i no bagarapim sindaun bilong ol. Mi no amamas long kain so long kamap. Dispela kain so i kamapim kain tingting we ol man i inap long bagarapim ol meri. Planti raskol pasin na pasin bilong bagarapim meri i kamap long kain so olsem. Na tu ol meri i mama bilong mipela na olsem wanem na ol i no sem long mekim kain pasin long bodi bilong ol?" Omuro i askim. "Olsem wanem ol i no sem long ol yet? Na tu buk Baibel i tok bodi bilong mipela em i temple bilong God. Na sapos dispela i tru bilong wanem na ol manmeri i mekim nabaut long bodi bilong ol.



Francis Pisimi

Francis Pisimi i bilong Ialibu, Sauten Hailans provins. Em i wok olsem sekyuriti wantaim Protect Sekyuriti Sevis long 6 Mail. Em i ting olsem: "Mi no wanbel long kain so i kamap. Dispela long wanem ol meri i yusim tasol bodi bilong ol long kisim mani. Long wankain taim ol meri i go les long mekim ol wok na kisim mani long isi wei tasol. Tasol dispela isi wei i no gutpela rot long kisim mani. Nau yet raskol pasin i go bikpela na long kain samting i kamap bai i helpim na skruim yet pasin nogut. Moa long dispela pasin nogut bilong bagarapim meri. So mi laik olsem mi no sapatim o laikim kain so long kamap long kantri bilong mipela. Namba wan samting em i olsem PNG em i Kristen kantri na olsem em i mas bihainim toktok bilong bikpela tasol. Namba tu long em em i olsem kain pasin i daunim velu bilong meri.




Paul Taboli

Paul Taboli i bilong Ialibu, Sauten Hailans provins. Em i

stap tasol long Pot Mosbi na i save sapatim em yet. Em i tok olsem: "Mi no amamas long kain so long kamap. Ol meri bai i tingting tasol long yusim bodi bilong ol. Ol i mekim olsem na i no wok tru.

no kontribut i go long ikonimi bilong kantri. Dispela kain pasin tu i inap na i wok long pulim pasin nogut. Kain so i putim tingting long ol manki long go bagarapim narapela meri. Gavman i mas givim lo long kain so i no ken kamap. Mi ken tok dispela so i mekim ol meri i les long wok, i rong wei long kisim mani na kamapim tingting nogut long ol manki long mekim pasin nogut.



Samantha Daki

Samantha Daki i bilong Ialibu, Sauten Hailans provins. Em i no wok tasol i stap tasol wantaim famili bilong em long Pot Mosbi. Em i tok olsem: "Mi wanbel long kain so i kamap. Dispela em i hap bilong samting mipela i kolim divelopmen. Sapos mipela i ken raun long kar, balus, sip na ring long telepon o i gat mobail telepon olsem wanem long kain pilai olsem?" Daki i askim. "Mi no lukim wanpela rong long dispela so long kamap. Ol pasin tumbuna yumi i wok long senisim olsem na yumi no ken wari tumas long dispela kain ol senis. Tingting bilong mipela i mas op long kain senis olsem. Moa long dispela em i wok mani bilong dispela lain. Ol i wok long sapatim ol yet. Sapos mipela i stopim ol orait mipela i mas painim narapela wei long helpim ol long sapatim ol yet," em i tok.



Freda Pisimi

Freda Pisimi i bilong Sauten Hailans provins. Na em tu wankain olsem Daki i stap wantaim famili bilong em

long Pot Mosbi. Em i tok olsem: "Mi amamas tasol long kain so i kamap. Nau laip i hat na olsem ol meri i painim kain wei long helpim ol yet i gutpela. Mi no lukim wanpela rong long dispela. Em i wanpela kain pasin bilong kamapim pilai.

Na em i fridom bilong ol manmeri husat i kamapim kain so, i stap insait long dispela so na husat i kamap na lukim kain so. Ol i pilim amamas na olsem ol i kamapim na soim kain pilai olsem.



Ikara Karata

Ikara Karata i bilong Lae, Morobe provins. Las yia em i mekim gret 12 long Kila Kila Sekenderi Skul na nau i painim wok long Pot Mosbi. Em i tok olsem: "Mi no amamas long kain so long kamap. Dispela i no kalsa bilong mipela. Ol lain husat i kamapim dispela kain so i kisim tasol pasin bilong narapela kantri na soim long hia. Mi ting planti manmeri long kantri i no redi long lukim na kamapim kain so olsem. Mipela i no redi yet long lukim kain pasin olsem. Na sapos ol i kisim gutpela pe long kamapim kain so olsem orait ol i ken go het tasol sapos nogat orait ol i mas lus tingting long stap insait long kain so olsem.



Danny Tumbu

Danny Tumbu i bilong Tari, Sauten Hailans provins. Em i tok olsem: "Sapos ol i putim longpela trausis bai i orait. Tasol ol i putim sotpela trausis na pens olsem na dispela i no gutpela. Taim ol i putim sotpela trausis o pens tasol ol skin bilong ol i kamap ples klia na dispela i ken kamapim tingting nogut sapos ol man husat tingting bilong ol i no op na lukim. Sapos ol i laik mekim ol i mas putim longpela trausis.

CATHOLIC RADIO schedule

Fonde	Mande	Fraide	Sarere	Sande
6:00 - ANGELUS	6:00 - ANGELUS	6:00 - ANGELUS	6:00 - ANGELUS	6:00 - ANGELUS
6:05 - MEDITATION/INSPIRATIONAL MUSIC	6:05 - MEDITATION/INSPIRATIONAL MUSIC	6:05 - MEDITATION/INSPIRATIONAL MUSIC	6:05 - MEDITATION/INSPIRATIONAL MUSIC	6:05 - MEDITATION/INSPIRATIONAL MUSIC
7:00 - VATICAN RADIO WORLD NEWS	7:00 - VATICAN WORLD NEWS	7:00 - VATICAN WORLD NEWS	7:00 - VATICAN WORLD NEWS	7:00 - VATICAN WORLD NEWS
7:15 - VATICAN ENGLISH PROGRAM	7:15 - VATICAN ENGLISH PROGRAM	7:15 - VATICAN ENGLISH PROGRAM	7:15 - VATICAN ENGLISH PROGRAM	7:15 - VATICAN ENGLISH PROGRAM
7:35 - NON-STOP GOSPEL MUSIC	7:35 - NON-STOP MUSIC	7:35 - NON-STOP GOSPEL MUSIC	7:35 - NON-STOP GOSPEL MUSIC	7:35 - NON-STOP GOSPEL MUSIC
8:00 - JOURNEY HOME (EWTN)	8:00 - BEST OF JOURNEY HOME	8:00 - OUR FATHER'S PLAN	8:00 - OUR FATHER'S PLAN	8:00 - OUR FATHER'S PLAN
9:00 - VATICAN RADIO WORLD NEWS	9:00 - VATICAN ENGLISH PROGRAM	9:00 - AFTERNOON GOSPEL MUSIC	9:00 - VATICAN ENGLISH PROGRAM	9:00 - VATICAN ENGLISH PROGRAM
9:15 - VATICAN ENGLISH PROGRAM	9:15 - VATICAN ENGLISH PROGRAM	9:15 - CHAPLET OF DIVINE MERCY	9:15 - VATICAN ENGLISH PROGRAM	9:15 - VATICAN ENGLISH PROGRAM
9:40 - KIDS SING-ALONG	9:15 - KIDS SING ALONG	9:30 - NON-STOP GOSPEL MUSIC	9:15 - KIDS SING-ALONG	9:15 - KIDS SING-ALONG
10:00 - CATHOLIC JUKEBOX	9:30 - CATHOLIC JUKEBOX (EWTN)	10:00 - WAVE FACTOR (EWTN)	9:30 - CATHOLIC JUKEBOX	9:30 - CATHOLIC JUKEBOX
10:30 - GOSPEL MUSIC	10:00 - GOSPEL MUSIC	10:00 - ANGELUS	10:00 - GOSPEL MUSIC	10:00 - GOSPEL MUSIC
11:00 - NON-STOP GOSPEL MUSIC	10:30 - ANGELUS	10:30 - VATICAN ENGLISH PROGRAM	10:30 - ANGELUS	10:30 - ANGELUS
12:00 - ANGELUS	12:00 - VATICAN ENGLISH PROGRAM	10:30 - VATICAN ENGLISH PROGRAM	10:30 - ANGELUS	10:30 - ANGELUS
12:05 - VATICAN WORLD NEWS	12:05 - VATICAN ENGLISH PROGRAM	11:00 - NON-STOP GOSPEL MUSIC	10:30 - ANGELUS	10:30 - ANGELUS
12:20 - VATICAN ENGLISH PROGRAM	12:20 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
12:40 - REFLECTION MUSIC	12:20 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
1:00 - LAMB'S SUPPER WITH DR. SCHOTT HAHN	12:40 - AFTERNOON REFLECTION MUSIC	11:00 - VATICAN ENGLISH PROGRAM	10:30 - ANGELUS	10:30 - ANGELUS
2:00 - MUSIC	1:00 - THE WAY TO FOLLOW JESUS	11:00 - VATICAN ENGLISH PROGRAM	10:30 - ANGELUS	10:30 - ANGELUS
3:00 - CHAPLET OF DIVINE MERCY	1:30 - GOSPEL MUSIC	11:00 - VATICAN ENGLISH PROGRAM	10:30 - ANGELUS	10:30 - ANGELUS
3:20 - NON-STOP GOSPEL MUSIC	3:00 - CHAPLET OF DIVINE MERCY	11:00 - VATICAN ENGLISH PROGRAM	10:30 - ANGELUS	10:30 - ANGELUS
4:00 - CATHOLIC JUKEBOX (ENCORE)	3:20 - NON-STOP GOSPEL MUSIC	11:00 - VATICAN ENGLISH PROGRAM	10:30 - ANGELUS	10:30 - ANGELUS
4:30 - NON-STOP GOSPEL MUSIC	4:00 - CATHOLIC JUKEBOX (EWTN)	11:00 - VATICAN ENGLISH PROGRAM	10:30 - ANGELUS	10:30 - ANGELUS
5:00 - JOURNEY HOME	4:30 - NON-STOP GOSPEL MUSIC	11:00 - VATICAN ENGLISH PROGRAM	10:30 - ANGELUS	10:30 - ANGELUS
6:00 - ANGELUS	5:00 - MESSAGE IN MUSIC	11:00 - VATICAN ENGLISH PROGRAM	10:30 - ANGELUS	10:30 - ANGELUS
6:05 - MADANG LOCAL NEWS	6:00 - ANGELUS	11:00 - VATICAN ENGLISH PROGRAM	10:30 - ANGELUS	10:30 - ANGELUS
6:10 - VATICAN ENGLISH PROGRAM	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
6:30 - LAMB'S SUPPER WITH DR. SCHOTT HAHN	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
7:00 - HOLY ROSARY	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
7:30 - CATHOLIC INSIGHT	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
8:00 - VATICAN WORLD NEWS	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
8:15 - MADANG LOCAL NEWS	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
8:30 - VATICAN ENGLISH PROGRAM	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
9:00 - TOK STREET LONG HVAIDS	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS
10:30 - VATICAN ENGLISH PROGRAM	6:05 - VATICAN ENGLISH PROGRAM	11:00 - VATICAN ENGLISH PROGRAM	10:30 - ANGELUS	10:30 - ANGELUS

Musik bilong Paramana Strangers i strong yet

Alfred Laita i raitim

Dispela em i stori bilong musik bilong Kiki Geno na Paramana Strangers. Strong bilong musik bilong ol i stap yet inap tude.

WANPELA pasin we mipela ol manmeri bilong Papua Niugini i save mekim we i stap tru long as bilong pasin kastom bilong mipela em pasin bilong skulim musik i go long ol tumbuna bilong mipela.

Musik em i bikpela samting long laip bilong yumi long Papua Niugini. Sapos i nogat musik, planti long ol pasin tumbuna bilong mipela, ol pasin kastom na stori tumbuna bai lus.


Musik i save wok olsem bris bilong bungim taim bipo na nau. Tete taim mipela i toktok long musik insait long PNG, mipela i tingting tasol long CHM Supersound olsem dispela nem we i strong tru wantaim PNG musik.

Long 1980 taim CHM i sanapim kaset faktori em i bin save mekim samting olsem 100 kaset long wan wan de. Long dispela taim, wanpela man, nem bilong em Kiki wantaim ol manki bilong namba wan Paramana Strangers i bin save pilai raun long ol ples long Aroma. Ol i bin pilai olsem i go na Kiki i mekim nem long pilai musik long planti bikpela bung bilong musik bilong ples.

CHM i bin go pas long em long olgeta rot, em i helpim long kamapim PNG musik long stat yet inap long nau. Olsem na musik stail bilong Kiki i bin strongim tingting bilong ol brata bilong em, Navu Genorupa, Chris na Renagi. Navu i bin go pas long namba tu lain bilong Paramana, PS2. Chris na Renagi i bin stat pastaim wantaim Paramana Strangers husat i bin bihainim ol papa bilong ol. Ol i bin kisim skul na lainim long ritim musik na winim ken ol papa bilong ol.

Taim laip i save hat, ol i save lukluk i go bek long musik long helpim ol.

Chris na Renagi i bin helpim papa bilong ol Kiki Geno long katim sampela musik albam wantaim olpela studio, Walter Bay. Tupela i bin mekim rekoding bilong ol yet long Pacific Gold Studios aninit long nem bilong PS3 aninit long stia



• Kiki (han sut) em i bin stap long namba wan Paramana Strangers, i go long Betty bilong PS2 na nupela lid singa bilong PS3 Chris. Olgeta tripela em ol bilong Genorupa famili husat i statim dispela Paramana grup. Poto i kam long CHM.

bilong narapela biknem man long PNG musik, John Wong.

Nau CHM studios i lukluk long pulim planti yangpela musik atis, na nau i luk olsem PS3 bai sainim narapela kontrak gen. Ol i gat tupela albam pinis, na wanpela ol i wok long mekim yet.

Kiki Geno, i bin pilai musik taim em i bin wanpela yangpela manki yet taim em i skul long Aroma Praimari Skul long 1960. Musik i bin opim ai bilong em na em i lusim skul long Gret 3 long pilai musik. Dispela tingting bilong em long lusim skul na bihainim laik bilong pilai musik nau i mekim kamap wanpela bikpela nem long PNG musik.

Kandre man bilong Kiki husat i bin malolo long wok i bin kam bek long ples na kisim wanpela liklik kapok gita na wanpela kulele. Gita, em ol i tunim long mak bilong musik bilong Hawaii na Samoa. Dispela em i bin hat tumas long Kiki bilong lainim

enjinia Joe Korao.

Dispela nem Paramana Strangers i bin kamap long Kiki na Terea long makim ol i stap long wanpela ben we i bin kamap long samting nating tasol. Em i soim olsem ol i no save long ol yet, tasol ol i bin mekim nem taim ol i pilai raun long Fiji, Samoa an ol arapela Pasifik ailan.

Biknem redio man tude, Roger Hau-ofa em i bin wanpela redio anaunsa long Studios 903 husat i bin askim ol long pilai long Fiji bondei pati bilong em. Bihain wantaim ol lain olsem Dokta Wari Iamo, Sam Pepena, Alu Gerega na Vagi Geno, nem bilong ben i go bikpela tru.

Wanpela poroman waitman, Mathew Macardle, i bin opim wok bilong musik studio insait long kantri taim em i sanapim namba wan rekoding studio insait long Papua Niugini aninit long nem 'Paradise Recording Company' (PRC) long stat bilong 1970s. PRC i bin wok bung wantaim Institiut bilong PNG Stadis long givim tok stia long kamapim PNG musik long stail bilong Sanguma Ben na ol arapela pawa ben olsem Gwadas, April Sun, Stalemates, Kopycats na ol arapela.

Bihain long PRC i bin pinis, wanpela man Saina, Peter Wong i bin helpim ben. Ol i bin kamapim PNG Meil Oda Sevis we i bin save salim ol kaset i go long ol arapela hap long kantri. Tasol taim Peter Wong i bin lus, kampani tu i bin pas.

Namel long 1977 na 1980, Mista Raymond Chin wanpela yangpela bisnis man long Rabaul husat i bin gat wanpela ben bilong em yet. Em i lukim olsem PNG musik i wok long kisim nupela stail na em i kamapim CHM Studios we nau em i karamapim RNG musik industri.

Taim ol i stap aninit long lukaut bilong CHM, Paramana Strangers i bin winim tupela bikpela awod o prais long 1976 na 1980 long makim ol i rilisim 5-pela top albam.

Long dispela taim ol sampela ben memba i bin dai na ol arapela i lusim musik, tasol Kiki, nau i gat 53 krismas i tok olsem em bai singsing na pilai musik yet na bikpela sik na dai tasol bai inap long pasim em.

EMTV GAID

Fonde 10/06/04

- 5.30 JOYCE MEYER MINISTRY
- 6.00 TODAY SHOW
- 9.00 CREFFLO DOLLAR
- 9.30 DR PHIL
- 10.20 GRADE 7 SCIENCE
- 11.10 GRADE 7 SOCIAL SCIENCE
- 12.00 GRADE 11 MATHS
- 12.50 GRADE 11 PHYSICS
- 1.30 GRADE 11 GEOGRAPHY
- 2.30 HERE'S HUMPHREY
- 3.00 BLUES CLUES
- 3.30 JUSTICE LEAGUE
- 4.00 HOT SOURCE
- 4.30 Y -Kids favourite
- 4.57 EMTV TOKSAVE
- 5.00 I DREAM OF JEANNIE
- 5.29 NEWS BREAK
- 5.30 THE PRICE IS RIGHT
- 5.57 CHILLOUT ZONE A guide to what is happening at clubs and restaurants.
- 6.00 NATIONAL EMTV NEWS
- 6.30 A CURRENT AFFAIR
- 6.57 TOK PISIN NEWS UPDATE
- 6.59 LOTTO DRAW
- 7.00 CHM SUPERSOUND
- 7.57 EMTV TOKSAVE
- 8.00 SPORT SCENE
- 9.30 THE FOOTY SHOW
- 11.00 AFL FOOTY SHOW
- 1.30 NIGHTLINE
- 2.00 EMTV CLASSIFIEDS

- 10.20 CHIT CHAT
- 10.27 EMTV TOKSAVE
- 10.30 NEWS REPLAY
- 11.00 CHURCHES MAGAZINE
- 11.30 PRAISE
- 12.30 EMTV CLASSIFIEDS
- 5.30 JOYCE MEYER

Mande 14/06/04

- 6.00 TODAY SHOW
- 9.00 CREFFLO DOLLAR
- 9.30 DR PHIL
- 10.30 SHARK TRACKERS
- 11.30 WANDERERS OF THE DEEP: MYSTERIES OF THE WHALE
- 12.30 MUHAMMAD ALI: THROUGH THE EYES OF THE WORLD Part 1
- 1.30 MUHAMMAD ALI: THROUGH THE EYES OF THE WORLD Part 2
- 2.30 DOCUMENTARY: INTO THE ARMS OF STRANGERS: STORIES OF THE KINDER TRANSPORT
- 4.30 Y
- 4.57 EMTV TOKSAVE
- 5.00 I DREAM OF JEANNIE
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 TOK PISIN NEWS UPDATE
- 6.59 LOTTO DRAW
- 7.00 PRAISE
- 8.00 INSAIT PNG
- 8.27 EMTV TOKSAVE
- 8.30 WHO WANTS TO BE A MILLIONAIRE
- 9.30 CSI - CRIME SCENE INVESTIGATION
- 10.30 CHM SUPER SOUND
- 11.30 NEWS REPLAY
- 12.00 NIGHTLINE
- 12.30 EMTV CLASSIFIEDS
- 5.30 JOYCE MEYER MINISTRY

Fraide 11/06/04

- 5.30 JOYCE MEYER MINISTRY
- 6.00 TODAY SHOW
- 9.00 CREFFLO DOLLAR
- 9.30 DR PHIL
- 12.00 GRADE 11 MATHS
- 1.30 GRADE 11 GEOGRAPHY
- 2.30 HERE'S HUMPHREY
- 3.00 BLUES CLUES
- 3.30 JUSTICE LEAGUE
- 4.00 HOT SOURCE
- 4.30 Y
- 4.57 EMTV TOKSAVE
- 5.00 I DREAM OF JEANNIE
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 NEWS UPDATE
- 6.59 LOTTO DRAW
- 7.00 TOK PIKSA
- 7.30 BURKE'S BACKYARD
- 8.30 FRIDAY NIGHT FOOTBALL Round 14-Penrith Panthers v St George Illawarra Dragons
- 10.57 EMTV TOKSAVE
- 11.00 FRIDAY NIGHT AFL LATE Carlton v Hawthorn
- 2.00 EMTV NEWS REPLAY
- 2.30 NIGHTLINE
- 3.00 EMTV CLASSIFIEDS

Tunde 15/06/04

- 6.00 TODAY SHOW
- 9.00 CREFFLO DOLLAR
- 9.30 DR PHIL
- 10.20 GRADE 7 SCIENCE
- 11.10 GRADE 7 SOCIAL SCIENCE
- 12.00 GRADE 11 MATHS
- 12.50 GRADE 11 PHYSICS
- 1.30 GRADE 11 GEOGRAPHY
- 2.30 HERE'S HUMPHREY
- 3.00 BLUES CLUES
- 3.30 COURAGE THE COWARDLY DOG
- 4.00 HOT SOURCE
- 4.30 Y
- 4.57 EMTV TOKSAVE
- 5.00 I DREAM OF JEANNIE
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.57 TOK PISIN NEWS UPDATE
- 6.59 LOTTO DRAW
- 7.00 HAUS & HOME
- 8.00 CROCODILE HUNTER DAIRIES
- 8.30 PREMIER SPECIAL: POMPEII
- 9.27 EMTV TOKSAVE
- 9.30 STINGERS
- 10.30 ER
- 11.30 EMTV NEWS REPLAY
- 12.00 NIGHTLINE
- 12.30 EMTV CLASSIFIEDS
- 5.30 JOYCE MEYER MINISTRY

Sarare 12/06/04

- 7.00 BARNEY
- 7.30 AROUND THE WORLD IN 80 DAYS * Final
- 8.00 PLANET FANTA
- 9.30 DOWNLOAD
- 10.00 SO FRESH
- 11.30 XTREME SPORT
- 1.30 THE CAR SHOW
- 2.00 SATURDAY AFTERNOON AFL
- 5.00 ESCAPE WITH ET
- 5.30 THE BOAT SHOW
- 6.00 NATIONAL EMTV NEWS
- 6.30 AUSTRALIA FUNNIEST HOME VIDEO SHOW
- 7.30 NCDC NEWS
- 8.00 SOUTH PACIFIC MUSIC
- 8.57 EMTV TOKSAVE
- 9.00 XENA: WARRIOR PRINCESS
- 10.00 HERCULES
- 11.00 BABYLON 5
- 12.00 NEWS REPLAY
- 12.30 EMTV CLASSIFIED

Trinde 16/06/04

- 6.00 TODAY SHOW
- 9.00 CREFFLO DOLLAR
- 9.30 DR PHIL
- 10.20 GRADE 7 SCIENCE
- 11.10 GRADE 7 SOCIAL SCIENCE
- 12.00 GRADE 11 MATHS
- 12.50 GRADE 11 PHYSICS
- 1.30 GRADE 11 GEOGRAPHY
- 2.30 HERE'S HUMPHREY
- 3.00 BLUES CLUES
- 3.30 ED EDD N EDDY
- 4.00 HOT SOURCE
- 4.30 Y
- 4.57 EMTV TOKSAVE
- 5.00 I DREAM OF JEANNIE
- 5.29 NEWS BREAK
- 5.30 THE PRICE IS RIGHT
- 6.00 NATIONAL EMTV NEWS
- 6.30 A CURRENT AFFAIR
- 6.58 TOK PISIN NEWS UPDATE
- 6.59 LOTTO DRAW
- 7.00 ANIMAL HOSPITAL
- 7.30 STATE OF ORIGIN GAME II
- 9.57 EMTV TOKSAVE
- 10.00 WEDNESDAY NIGHT MOVIE: SHOOTFIGHTER II
- 12.00 EMTV NEWS REPLAY
- 12.00 NIGHTLINE
- 1.00 EMTV CLASSIFIEDS

Sande 13/06/04

- 6.20 CHITCHAT
- 6.27 EMTV TOKSAVE
- 6.30 THE TEACHING MINISTRY OF CHARLES STANLEY
- 7.00 IT IS WRITTEN
- 7.30 WORLD OF WILDLIFE
- 8.00 BUSINESS SUNDAY
- 9.00 SUNDAY
- 11.00 SIGNS OF THE TIMES
- 12.00 NRL FOOTY SHOW
- 1.00 SUNDAY AFTERNOON AFL Sydney v Port Adelaide
- 4.00 SUNDAY FOOTBALL Manly Sea Eagles v Parramatta Eels
- 6.00 NATIONAL EMTV NEWS
- 6.30 TOUCHED BY AN ANGEL
- 7.30 SIXTY MINUTES
- 8.30 SUNDAY NIGHT MOVIE: REINDEER GAMES

Sande Nait Muvi: Reindeer Games




Gary Sinise (longpela gras) em poroman bilong dispela man i stilim nem bilong em. Em bai kam ausait long kalabus na painim man ya.

Piksa long wanpela man husat i stap long kalabus na i kam ausait. Em bai yusim nem bilong man i stap long kalabus wantaim em. Em i

kisim nem bilong poroman bilong em long kisim meri bilong em. Sande Nait long hap pas 8 long nait - Lukim Reindeer Games

NATIONAL WEEKLY HIT PARADE

Sarare Jun 10, 2004 Twisties i sponsa			
Singsing	Musik Atis	Las Wk	Dispela Wik
Nellien	Uralom/Moses Tau	1	1(8)
Lewa	Phi-Jay	5	2
Aroma	Hobby Mates	3	3
ToBes	Westall feat. Patti Doi	2	4
704 (A Loklok NCR)	Jnr Insects	4	5
Bucket	Doggies	7	6
TTB	Moses Tau	11	7
Kalivuvur	Patti Potts Doi	8	8
Bombastic	Slim Buda	6	9
Buimo Road	Camp 7	9	10
Gungun Yeo	Slumz Of Simbu	19	11
Gasiro	Pasiwa Boys	20	12
Malira Pawa	Zong Hits	13	13
Hanua Maurina	O-Shen	14	14
Street Mangi	X-Azzimbah	15	15
Tasi	Niu Age Band	0	16
Golden	Westall	10	17
Natute	Westall	12	18
Raitman	Niu Age Band	17	19
Tangi Varea	Iales De Sound	0	20



PENPREN

Nem: Gorez Nomane

Krismas: 26 (man)

Adres: No1 Builders Limited, PO Box 136, Waigani, NCD

Nem: Prosah Idarovi

Krismas: 18 (meri)

Adres: Mercy Secondary School, PO Box 580, Wewak, East Sepik Province

Save laikim: Mekim fani, waswas long nambis, go lotu, lukim TV na go long skul.

Nem: Jarvisa Tonokon

Krismas: 17 (meri)

Adres: Mercy Secondary School, PO Box 580, Wewak, East Sepik Province

Save laikim: Lukim TV, ridim Baibel na ol buk, stadi na danis, pilai basketbol, soka, go long lotu na prea, kukim kaikai na senisim presen.

Nem: Theckla Tigeni

Krismas: 17 (meri)

Adres: Mercy Secondary School, PO Box 580, Wewak, East Sepik Province

Save laikim: Ridim buk, go long lotu, pilai netbol, soka na volibol, senisim presen wantaim ol penpren na harim gospel na lokel musik.

Nem: Agsly Wirkas

Krismas: 17 (man)

Adres: Aitape Vocational Centre, PO Box 34, Aitape, Sandaun Province

Save laikim: Ridim buk, pilai spots na stap insait long ol ektiviti bilong lotu.

Nem: Billy Timbon

Krismas: 22 (man)

Adres: Mumbe Bros, PO Box 4249, Boroko, NCD

Save laikim: Pilai soka, lukim TV, riding, raun i go long narapela ples, go long lotu na planti moa.

Nem: Hagai Zemo

Krismas: 21 (man)

Adres: Mumbe Bros, PO Box 4249, Boroko, NCD

Save laikim: Pilai soka, volibol, stori wantaim ol pren, lukim TV na go long lotu.

Nem: Skhariodii Solmou

Krismas: 14 (man)

Adres: Aitape High School, PO Box 63, Aitape, Sandaun Province

Save laikim: Pilai soka, go lotu na mekim penpren.

Nem: Tepeli Solmou

Krismas: 13 (man)

Adres: Aitape High School, PO Box 63, Aitape, Sandaun Province

Save laikim: Pilai soka, mekim penpren na go waswas long solwara.

Nem: Bruce Solmou

Krismas: 14 (man)

Adres: Aitape High School, PO Box 63, Aitape, Sandaun Province

Save laikim: Pilai soka, mekim penpren, na go long lotu.

We bilong karim pikinini



STORI TUMBUNA

BIPO Bipo tru, i bin gat wanpela ples i stap na long dispela ples i bin i gat planti man i stap. Ol dispela lain man i bin lukautim wanpela liklik boi na nem bilong em Panagah. Dispela boi i bin i gat papamama, olsem na taim em i stap em i kamap bikpela man.

Em nau long dispela taim, em i bin marit long dispela ples. Long dispela taim, ol man i save katim bel bilong ol meri long taim ol i laik karim pikinini i stap. Taim ol i katim bel bilong ol meri ol i save dai.

Long wanpela taim nau, meri bilong Panagah i laik karim pikinini, olsem na Panagah i go na sindaun long dua bilong haus. Long taim em i lukluk i go, em i lukim ol man bilong katim bel bilong meri bilong em i kam. Wantu Panagah i singaut, yupela i no ken katim bel bilong meri bilong mi.

Tasol ol lain man ya i bekim, mipela i mas katim bel bilong meri bilong yu bai olgeta pen bilong em i pinis. Panagah i no laik bekim tok, olsem na em i pasim dua bilong haus na sindaun i stap.

Liklik taim bihain nau, Panagah i singaut long ol man bilong katim bel na tok, em nau meri i karim pikinini pinis.

Bihain em i kam ausait na i tok, yupela i mas mekim olsem: "Yupela ol man i mas go long bus na kisim sampela marasin bilong tumbuna, na givim long meri bai em i karim pikinini kwik. Long dispela taim, ol i stat long bihainim dispela tok Panagah i bin autim long en bipo i kam inap ol waitman i kam bungim yumi. Na nau yumi i gat haus sik long ol mama i ken karim pikinini.

**KORIKUNU
Bogenvil**



Mi wari long planti gras long bodi bilong mi

Dia Laiplain

Mi wari tru long gras i gro long olgeta hap bilong bodi bilong mi. I luk olsem gras em i bikpela wari long mi. Mi wok long yusim krim bilong rausim gras na em i save kamaut tasol i luk olsem bihain long sampela wik, em i save gro bek gen.

Plis, inap yu tokim mi wanem samting bai mi wokim na gras bai ino inap long gro bek gen.

HAIRY

Dia Pren

Mipela i luksave long wari bilong yu taim yu lukim olsem yu gat moa gras long bodi winim ol narapela.

Yu mas luksave olsem Bikman i wokim ol wan wan man i narakain na i no wankain long wanpela arapela. Na yumi i no inap long senisim samting we Bikman i wokim.

Yumi kisim ol wankain lukluk o samting olsem ol papamama bilong yumi.

Ol i kolim dispela long "heredity" na sapos wanpela papa o mama bilong yu i gat planti gras, yu bai gat wankain tu olsem.

Krim i mas save rausim antap long skin level tasol tasol ol rut bilong em i stap strong yet insait long skin.



Na ol i save gro bek gen. Sampela lain i nogat gras olsem na dispela em bikos ol i gat wanpela kain sik long bodi bilong ol we i save stopim gras long gro.

Olsem yumi tok pinis, em i hat long senisim samting we Bikman i wokim wantaim gutpela tingting.

Mipela i askim yu long tingting strong long dispela na noken les long gras long bodi bilong yu.

LAIPLAIN

LAIPLAIN TOKSAVE

Sapos yu gat hevi o wari, rait i kam long Lifeline. P O Box 6047, Boroko, NCD. Yu ken ringim mipela tu long telpon namba 3260011. Mipela i no inap long autim trupela nem bilong yu long hia tasol taim yu rait long Lifeline, yu mas putim trupela nem na etres bilong yu na bai mipela i salim bekim long pas bilong yu.



Raun wantaim Kanage long olgeta wik!

KANAGE em i wanpela bikman bilong Dreki kir long Is Sepik provins.

Wanpela taim ol manmeri long liklik ples bilong em i bungim mani aninit long wanpela komyuniti asosiesen bilong ol long baim wanpela bikpela trak bilong helpim ol long wok bisnis bilong ol long ples.

Taim ol i baim pinis wanpela bikpela retpela kar, ol i karim i go long fran bilong haus bilong Kanage bai em inap long lukim na mekim sampela bikpela tok tok long en.

Taim Kanage i lukim ol i kam wantaim bikpela kar, em i kamaut na painim toktok nau long tok.

Em i kirap na givim nating tasol.

"Em i gutpela tru yupela ol yangpela pikinini i wok hat long baim dispela bikpela kar... na kala bilong em tu i ret na i makim stret yumi ol pipel bilong Dreki kir. Ret em i wanpela fas kala tru ya," Kanage i tok.

Bihain nau em i painim toktok na em i askim ol long statim

bikpela kar ya. Ol i statim enjin bilong em na i karai liklik pastaim na Kanage i singaut, "Em nau, dispela kar em i kar bilong yumi stret. Yupela i harim pinis! Taim em i kirap, em i singaut dreki kir-kir-kir-kir-angoram!" Das i kirap na Kanage i lus i go insait long haus bilong em.

**Mangi Dreks
Wewak
Is Sepik provins**

KANAGE i bin kisim luksave olsem wanpela man husat i gat strongpela bilip long dring bia. Olsem na kampani husat i save mekim SP bia i salim em i go long makim ol long wanpela bikpela bung bilong ol bikman husat i save lukautim ol bisnis i save mekim bia.

Bihain long kibung bilong ol ol i go sindaun long ba na askim ba man long givim wan wan bia bilong ol yet bikos ol i tok olsem bia bilong ol i fit tru na i winim olgeta arapela bia.

Tasol taim Papa Kanage i go sindaun long ba em i askim long wanpela ken loli wara. Olgeta

arapela bia bosman i kirap nogut tru na ol i askim em: "Oi, PNG, yu olsem wanem? Yu les long dring na apim nem bilong SP bilong yupela ah? Bilong wanem na yu no dring SP?"

Kanage i tanim na tokim ol: "Nogat, mi lukim olsem yupela i les long dring bia olsem na mi tu bai mi no inap long dring bia."

**Spak Maik
Godens
NCD**

KANAGE em i wanpela man bilong pilai hos stret. Olgeta taim em i save kisim niuspepa long sekim ol hos na em i save gut tru long en. Em i save makim ol hos i go na meri bilong em tu i stat long skelim ol hos. Na olgeta hos meri bilong em i save skelim i save win. Wanpela taim Kanage i kisim tingting long kisim meri bilong em i go long hos res long helpim em makim ol hos.

Taim ol i stat, kanage i go sanap long hap bilong baim hos na em i lukluk long meri bilong em i stap.

Taim meri bilong em i skelim hos long namba wan resis pinis, em i siknel long Kanage na paitim antap long het bilong em.

Kanage i kisim tingting olsem i mas top weit ya. Em i putim mani na hos i win.

Namba tu resis, meri bilong em i selim hos pinis na paitim as bilong em. Kanage i putim mani long bottom weit hos na hos ya i win.

Ol i mekim i go na i laik kam long bikpela resis tru nau na meri i paitim fran bilong em stret.

Man, Kanage i paol olgeta nau. Em i tingting planti na em i no putim mani nau. Bihain tupela i kam ausait na Kanage i askim.

Em wanem kain siknel ya yu givim? Antap long het mi save, na taim yu paitim as bilong yu mi save.

Tasol dispela yu paitim fran bilong yu mi paol olgeta. Meri i tanim na tokim Kanage, "Em fevret bilong yu ya!"

**Ronim Hos
Pot Mosbi
Sentrel provins.**

KANAGE wantaim ol boi bilong em i bin pilai long wanpela sofbal tim long Kavieng taun, Nu Ailan provins.

Ol i winim taun resis na ol i go long Gavana's kap long Is Nu Briten.

Tasol taim ol i go long Namatanai long kisim sip i go long Kokopo, solwara i bagarap na ol i no lusim Namatanai inap long apinun long Ista Fraide taim ol pilai i stat pinis.

Taim ol i kamap long Kokopo em ol i fofitim pinis ol pilai bilong ol long Fraide.

Ol i askim ol opisel sapos ol inap long pilaim ol gem bilong ol gen na ol i tokim Kanage na ol boi bilong em long sekim ol kepten bilong Rabaul Reds na Rebels.

Tupela kepten i kirap na tokim Kanage, "Yes, em i orait, tasol bai yupela i mas pilai bihain long gren fainol nau." Kanage i nogat toktok moa.

**Karanas Lewa
Kavieng
Nu Ailan provins**

Raun wantaim KANAGE



RAUN WANTAIM EM TASOLI EM WE BILONG EMI



Hap Hap Nius Wok bilong rausim wel i ron isi

WOK bilong rausim wel long ol wel fil bilong Kutubu na Gobe i wok long ron isi nau, i no strong olsem bipo.

Dispela toktok i bin kam long Petroluem na Eneji Seketeri, Joseph Gabut, las wik.

Em i tok bikos PNG i no wok long kamapim planti wel nau ol wol prais bilong wel we i antap i gutpela na bai helpim kantri.

Ol bisnis les long planti senis long gavman

MELANESIAN Semba ov Komes na Indastri i singaut long ol politisen long helpim kamapim gutpela strongpela gavman we bai pinisim taim bilong en long opis na i no senis olgeta taim long mekim ol investa i laik kam long Papua Niugini.

Presiden bilong Semba ov Komes, Gabriel Miriye, i tok olsem planti senis long gavman bai bagarapim mak we kina na ikonomi i stap long en nau na dispela bai bagarapim sindaun bilong ol pipel.

Em i tok olsem planti ol investa long ol indastri bilong maining, agrikalsa, manufeksering na ol narapela bisnis husat i soim laik bilong ol long inves o putim mani bilong ol long PNG, nau i wok long tubel na wet long lukim wanem samting tru bai kamap long gavman bipo ol i go het wantaim ol tingting bilong ol.

Em i tok strong long ol politisen long wanem ol i tok o mekim long wanem nogut ol i salim ol rong toksave i go long ol gavman bilong ol narapela kantri na ol bisnis manmeri na investa tu.

Mista Miriye i singaut tu long ol papagraun long wok klostu wantaim ol bisnis na ol semba long pulim ol investa i kam long PNG.

Planti pipel tu long PNG i les pinis long ol planti sensi we i wok long kamap long gavman long ol yia i go pinis, we i no helpim ikonomi, na bagarapim sindaun bilong ol.

POSF karim gutpela kaikai

...Ikonomi i wok long strong gen - Philemon

William Natera i raitim

IKONOMI bilong Papua Niugini long taim nupela nesenel gavman i bin kamap i kam inap nau i wok long kamap gut moa.

Dispela em i toktok bilong Minista bilong Fainens na Treseri, Bart Philemon, long tokaut bilong ol risalt o kaikai bilong Pablik Opisas Supaenuesen Fand LTD (POSF) bilong yia 2003 las Fraide long wanpela bung Crowne Plaza Hotel long Pot Mosbi.


Mista Philemon i tok olsem wok kamapim ikonomi long mak we ol gutpela invesmen i ken i kamap long en i bin wanpela bilong ol bikpela as tingting bilong gavman taim ol i bin kisim opis long 2002.

"Dispela wok i no bin isi. Taim gavman i bin kisim opis, badset i no bin stap stret, na ikonomi i no wok long gro.

"Husat bai laik inves long PNG long dispela kain taim," em i tok. Tasol nau badset i luk orait gen na ikonomi i wok long stat long gro isi ken na kamap gut moa, Mista Philemon i tok.

Em i tok amamas long ol dairekta bilong POSF long gutpela wok ol i bin mekim we i bin kamapim gutpela kaikai tru.

Mista Philemon i tok dispela gutpela wok menesmen o bosim i wok long kamap insait long POSF na gutpela lukaut i wok long kamap long mani bilong ol



• Ol memba (sanap) bilong POSF husat i bin stap long dispela bung i bin gat sans long kisim ol stetmen bilong ol long ol POSF opisa (sindaun). Foto: JOE IVAHARIA

membra bilong ol.

Siaman bilong bod bilong POSF, Sir Nagora Bogan, i tok olsem sapos gutpela menesmen na wok lukaut long mani i kamap, olgeta taim bai i gat gutpela kaikai.

"Olsem mipela long POSF, dispela gutpela wok mipela i mekim i soim strong bilong fand na gutpela rot bod i wok long makim long bihainim," Sir Nagora i tok.

Em i tok olsem ol wok manmeri long POSF i save olsem ol i

ol was papamama tasol long ol mani bilong planti tausen pipel long kantri.

"Bod i kamapim wanpela gutpela we bilong wok we ples klia we ol pipel i mas save olsem mipela i mekim wok stret na mipela i no wok long stilim mani o giamanin ol," Sir Nagora i tok.

Em i tok POSF i laik karim gutpela kaikai gen neks yia na long bihainim taim tu.

Long dispela taim tu Sir Nagora i tokaut long makim olsem Leon Buskins olsem nupela

menesing dairekta bilong POSF na Mista Buskins i bin autim tingting bilong en long mekim POSF ron strong.

I bin gat planti ol bik manmeri husat i bin kamap long dispela bung olsem ol bik manmeri bilong praiwet sekta, ol bos bilong ol gavman dipatmen na ol arapela gavman opis, ol lida bilong ol union, Gavana bilong Sentrel Benk o Benk of Papua Niugini (BPNG), Wilson Kamit na Minista bilong Fainens na Treseri, Bart Philemon.

DIWAI BISNIS



tane rijen bilong Saut Afrika we em i reflektim long longwe hap stret sampela ol vegetation we i wankain, em olsem i gat wankain histri na i gat konek-sen long ol dispela hap.

2. Ol samting i stap long bus na graun we i kamapim developmen bilong renfores

Histri Factor

Histri factor i sut long taim bipo long renfores komyniti na long taim we environmen i kisim hevi long renfores, ating long mak olsem 100 yia bipo na dispela i stap yet long sampela hap bilong fores.

Olsem mipela i tok bipo, renfores i save givim yet ol gutpela samting we yumi i ken lukim long ol kainkain element long flora we i save stap long bus, na tu tropikel na temperate renfores fomesen. I gat tripela narapela ol samting we i bin kamap long renfores long graun long equatorial len mes na bikpela senis tru em long temperate renfores long Saut Afrika na Nu Silan, long isten Australia na long tropikel mon-


Long lokel level, ol fores we i no stap moa olsem long isten Australia na Afrika, ol dispela em ol i ting i gat moa gutpela kondisen bilong renfores developmen we i stap long dispela ol hap long taim bipo. Long dispela taim ol senis long taim o klaimet na biotic pressures, i bin daunim groa bilong ol renfores eria.

Long ol hap we i gat ol renfores, ol plent fomesen i soim olsem ol samting we i bin kamap bipo:

Olsem ol dispela planti graslen long PNG em long wanem planti lain long lokel komyniti na long ol ples i save kukim gras long painim o planim kaikai na tu long ol paia we ol ples lain i mekim na i no was gut na i kukim gras i go moa yet.

Bisnis bilong groim diwai long PNG

...Lukautim ol bus diwai we i stap pinis



• Lukautim ol dispela kain renfores na ol bai lukautim yumi.

Narapela tok piksa em ol graslen bilong Bunya Maunten long saut Queensland em ol i bilip olsem em i wanpela hap we ol kanaka bilong Australia i save bung na singsing na danis na ol sid bilong Araucaria bidwillii i bin kamap.

Kamap bilong ol sampela kain gras na flaua long renfores i save soim piksa bilong ol samting we i bin kamap bipo;

graun. Dispela i kirapim dispela tingting olsem long ol arapela hap long PNG we dispela kain diwai i pulap, kain ol hevi long graun bipo i bin kamapim.

Long pinisim dispela hap tok -re ecological factors affecting rainforest development

Renfores i kamap bikos i gat faivpela grup factor olsem climate, soil, topographic, biotic na historic i bin bung na mekim kamap.

Long lokel level, wanpela

Planti ol kwila diwai i gro long Gogol bus bilong Madang Provins long wanem ol pipel i stap long hap bipo i save painim hat long katim dispela strongpela diwai.

Ol kain samting olsem planti kwila diwai we i gro long Gogol bus bilong Madang provins. Dispela ol i bilip olsem bipo ol manmeri i save stap long hap i save painim hat long katim ol dispela diwai bilong wanem ol i strong tumas na ol i nogat kain tamiok yumi i gat tude. Long dispela as i gat planti kwila stap long hap.

Ol kain samting olsem planti ol Ocotmeles long ol hap we Mt Lamington long Oro provins i pairap na kukim

factor tasol i no inap kamapim wanpela samting na bilong renfores long kamap olgeta dispela faivpela factor i mas stap. Sampela bilong ol dispela i ken senis long han bilong man i lukautim o planim fores o forester tasol ol arapela em i hat long forester i kamapim. Yumi mas amamas long ol dispela ol samting sapos ol renfores hap i ken stap aninit long han bilong scientific menesmen.

Hap Hap Nius

Stopim raskol pasin

OL bisnis long Pot Mosbi na long Lae i kros long ol bikpela raskol pasin we i wok long kamap na bagarapim ol wok bilong ol.

Planti bilong ol bisnis i lusim planti mani pinis long ol dispela nogut pasin na planti manmeri husat i wok long ol dispela bisnis i bin kisim bagarap taim ol dispela birua i bin kamap.

Ol bisnis i les pinis long kisim taim na i singaut long ol polis long stopim ol dispela raskol pasin.

Senis long gavman bai bagarapim sindaun bilong ol main

SAPOS planti senis tumas i kamap long gavman dispela bai bagarapim sindaun bilong ol main husat i stap insait long kantri pinis na mekim ol kampani husat i wok long tingting yet long kam insait long kantri tubel.

Dispela toktok i bin kam long Maining Minista, Sam Akoitai, long Mande.

Em i tok olsem nau yet maining industri i wok long ron gut na ikonomi bilong Papua Niugini i wok long luk orait.

Tasol sapos planti senis i stat long kamap long gavman, bai planti hevi i kamap long ikonomi tu.

Planti manmeri long kantri i les pinis long ol senis we i wok long kamap.

Ol senis long gavman i no wok long bagarapim sindaun long maining industri tasol, tasol long ol narapela industri tu, sampela bilong ol em ol industri bilong foresti na fiseris.



Buai long Burma?

PLANTI manmeri long Papua Niugini i save ting olsem buai em yumi tasol ol PNG i save salim na kaikai.

Tasol nogat. Planti ol narapela kantri i gat ol diwai buai na ol manmeri long dispela kantri i save kaikai tu.

Tasol we bilong kaikai em narakain liklik. Olsem long dispela

poto wampela man i wok long brukim brukim buai i go insait long kambang long redim long salim na pikinini bilong em i sanap klostu na lukluk i stap.

I gutpela long luk-save olsem bisnis bilong buai i no long PNG tasol, tasol long ol narapela kantri tu.

Wok bung namel long PNG na Thailan i strongim ikonomi

...Minista Semri i amamas

MINISTA bilong Fiseris, Ben Semri, i amamas long moa wok bung wantaim we i wok long kamap namel long Papua Niugini na Thailan long sait bilong bisnis o ikonomi, moa yet long ol industri bilong fiseris na agrikalsa.


Mista Semri i bin mekim dispela toktok taim em i tok welkam long Vais Minista bilong Foren Afeas bilong Thailan, Dokta Sorajak Kasemsuvan, na ol lain husat i bin kam wantaim em, long palamen long Mande.

Mista Semri i tok olsem PNG i

gat pinis ol gutpela wok bung wantaim wantaim Thailan we ol i save baim na salim ol samting namel long ol yet.

Wampela tok piksa bilong dispela we Mista Semri i bin givim em we Thailan i save baim planti tuna prodak long PNG na em i tok PNG i laik go moa yet long dispela kain wok.

"PNG i bai amamas long kisim moa trening i kam long ol save manmeri bilong Thailan na ol save manmeri bilong mipela i ken helpim Thailan.



Mista Semri.

"Dispela trening em long sait bilong ol we long painim pis long

solwara na wara long antap long ol wok ol i wok long mekim pinis long developim agrikalsa olsem rais long Morobe Provins, Mista Semri i tok.

Em i tok tenk yu long Dokta Kasemsuvan long laikim. Thailan i wok long soim long mekim bisnis wantaim na insait long PNG, na i tok strong olsem em i bilip dispela laikim bai i kamap strong moa long bihain taim.

Kamapim ol industri olsem agrikalsa i stap insait long ol as tingting bilong nesene gavman.

Wok manmeri laikim gutpela pe

Paulus Tali i raitim

BIKPELA hevi we ol wok manmeri long Papua Niugini i lukim em olsem ol i no wok long kisim gutpela pe.

Jenerel Seketeri bilong Amalgamated Jenerel Wokas Union bilong Papua Ni-

ugini, Andrew Kandakasi, i tok dispela em long wanem ikonomi bilong kantri i no stap gut nau yet.

Dispela i mekim na prais bilong ol kaikai long stua na long ol sevis tu i go antap na givim hevi long ol wok manmeri.



Lukim na Lainim...Planim na salim vanilla i kamap wampela bikpela bisnis long Papua Niugini. Tasol ol manmeri i mas save long we stret bilong planim. I gat pinis planti toktok olsem ol ovasis lain husat i bin baim vanilla long PNG i no bin wanbel taim ol i binlukim olsem vanilla ol i bin baim i no bin gutpela. Long dispela poto sampela yangpela i wok long kisim skul long ol bikpela long we bilong planim gut vanilla.



BANK OF PAPUA NEW GUINEA

PRESS RELEASE

KINA FACILITY RATE (KFR) FOR THE MONTH OF JUNE 2004

There are indications of continued improvements in economic activity over the first five months of 2004, with:

- Annual headline inflation of 2.9 percent in the March quarter of 2004;
- Further strengthening of the exchange rate against the United States and Australian dollars;
- Decline in market interest rates;
- Maintenance of sound fiscal management by the Government and commencement of restructuring of domestic debt from shorter to longer term with issuance of 1 to 2 1/2 years Inscribed stocks; and
- Sustained supply response to high international prices by producers of agricultural export commodities.

While the Central Bank acknowledges these positive developments, the recent hike in oil prices, the weakening of the Australian dollar against the kina, and the narrowing in the interest rate differentials between Papua New Guinea and its major trading partners, pose a potential risk to macroeconomic stability.

In view of these risks the Central Bank is taking a cautious stance, and therefore maintains the Kina Facility Rate (KFR) at 10 percent for June 2004.

L Wilson Kamit, CBE.
Governor



Queen's Birth Day Specials

Telikad International Call Discount

Country	Standard Price	Special Price	Discount %
Australia	K2.45	K1.00	59%
Canada	K4.00	K2.00	50%
China	K4.00	K2.00	50%
Hong Kong	K2.75	K1.00	63%
Indonesia	K2.75	K1.00	63%
Fiji Islands	K2.45	K1.50	38.8%
France	K4.00	K2.00	50%
Germany	K4.00	K2.00	50%
India	K4.00	K2.00	50%
Japan	K4.00	K2.00	50%
Malaysia	K2.75	K1.00	63%
New Zealand	K2.45	K1.00	59%
Pakistan	K4.00	K2.00	50%
Philippines	K4.00	K2.00	50%
Singapore	K2.75	K1.00	63%
South Africa	K4.00	K2.00	50%
South Korea	K4.00	K2.00	50%
Sri Lanka	K4.00	K2.00	50%
USA Alaska & Hawaii	K4.00	K2.00	50%
United Kingdom	K4.00	K2.00	50%

Calls will be discounted to International and Domestic destinations starting from Friday 11th of June 2004 at midnight and ending on Monday 14th of June at midnight, 2004

Calls within PNG will be charged at one third (1/3) of the standard charges, plus VAT, (Maximum) per minute, to all destinations.

Calls can be made from any telephone anywhere in PNG including a friend or neighbors phone, the phone at the workplace, a blue access phone or from a public phone.

Telikad Domestic Call Discount

Type of calls	Standard price/min	Special price	Discount %
In Same Zone Call (Lae to Wau)	30 Toea	10 Toea	66.66%
Adjoining Zone Call (Lae to Boroko)	60 Toea	20 Toea	66.66%
Non-adjoining Zone Call (Lae to Daru)	90 Toea	30 Toea	66.66%
Call to Cellular B-Mobile	75Toea	50 Toea	33.33%

*All above Price exclusive of VAT



Telikad
Connect anywhere, anytime.



NSW Blues Sapota Daniel Kabale (rait) na Maroons sapota James Kewa (lephan) i soim sapot long feiveret State of Origin tim bilong ol. Oi Foto: ANDREW MOLEN



Fleg bilong Blues i stap long kar bilong wanpela man.

State of Origin i save mekim ol manmeri longlong

Andrew Molen i raitim

LONG olgeta yia nanel long mun Mei, Jun na Julai i save gat wanpela bikpela ragbi resis i kamap nanel long tupela stet bilong Australia we ol i save kolim State of Origin.

Insait long dispela pilai ol lain long Queensland i save brukim bun stret wantaim ol lain nogut bilong New South Wales.

Planti bilong ol pilaia long tupela tim ya i save pilai wantaim long sem tim o klab long nomol gem nambaut insait long Nesenei Ragbi Lig (NRL) tasol taim ol i pilai long State of Origin, ol i no save wari moa poroman, tambu o wanpilai, tingting bilong ol i save strong tru long makim stet we ol i kam long en.

State of Origin i bin kamap ofisel long yia 1980 na inap nau NSW (Blues) na QLD (Maroons) i gat planti sapotas stret tasol i no long Australia tasol. Ol i gat sapotas long planti ol narapela kantri tu we ol manmeri i save long ragbi lig. Taim de bilong gem i kamap klostu ol manmeri i save putim was tasol long sapotim feiveret tim bilong ol.

Long hia long Papua Niugini, yumi tu gat planti sapota bilong dispela gem na ating yumi mas i gat planti moa sapota bilong State of Origin winim ol narapela kantri.

Tasol long Australia yet ol manmeri long hap i gat as long sapotim wanpela long dispela tupela tim bilong wanem ol wantok bilong ol. Na yumi? Bilong wanem na yumi tu i save sapot longlong stret long ol? Ating wanpela gutpela ansa bilong wanem na yumi save sapotim State of Origin em long ol feiveret pilaia bilong yumi husait ol i save pilai long ol feiveret tim bilong NRL i save pilai long State of Origin. Sampela i sapotim Blues o Maroons bilong wanem mama na papa i wokim wankain na sampela i bihainim man o meri o poro bilong ol bilong wanem ol i no laik bai kros i kamap.

Sampela stori i bin kamap bipo i tok olsem taim State of Origin i save kamap, ol marit i save bruk taim tim bilong man o meri i win. Bikpela pait i save kamap nanel long ol sapotas na sampela lain tu i lusim laip pinis. Sampela lain i save brukim TV na tromoi tasol bihain bai ol i baim narapela ken long lukim narapela gem.

Long taim bilong State of Origin bai yu lukim tu ol fleg, posta na stika bilong feiveret tim bilong ol manmeri i pas long kar na bas bilong ol na raun raun long rot. Mi no save long ol narapela hap bilong kantri tasol long Pot Mosbi, ol bikpela ples bung olsem Tabari



Ol lain bilong sapotim State of Origin i sanap wantaim bihain long ol i penim pes bilong ol long kala bilong feiveret tim bilong ol.

Place, Boroko, Gordons na Taun i gat ol man bilong penim pes i stap husait ol i save putim ol samting bilong ol na manmeri i save baim ol long penim pes bilong ol wantaim kala bilong feiveret tim bilong ol long kainkain stail.

Sampela save penim pes olgeta, sampela penim namba bilong feiveret pilaia bilong ol na sampela save penim sta o ol narapela kain stail nambaut. Wanpela mangi mi bin lukim taim mi bin go raun long Tabari Place long apinun bipo long nambawan pilai bilong State of Origin long dispela we ol NSW Blues i bin winim, i penim pes bilong olgeta na garas bilong em wantaim. Man ya mas wanpela dai hat stret ya.

State of Origin i kamap olsem wanpela samting bilong ol femili tu. Mi tok olsem long wanem ol pikinini i save bihainim wanem tim mama na papa bilong ol i sapotim. Sampela taim ol pikinini yet i save sapotim narapela tim sapos ol i laik agensim ol lain bilong ol long haus.

Long ol stret, taim gem i stat bai yu no inap long lukim wanpela man o meri i raun nating long rot na sapos yu yet yu sanap bai yu ting i gat keflu o bai yu ting olsem em biknait pinis.

Sapos yu putim yau bilong yu bai yu no inap harim wanpela nois inap wanpela tim i putim trai nau bai wanpela haus i pairap. Na taim


narapela tim i putim trai bai narapela haus i pairap.

Sampela manmeri i no save bisi long State of Origin. Yu askim ol long feiveret tim bilong ol bai ol i tok, "Mi sapotim refri ya". Ol save tok ol tim ya bai i no inap givim ol wanpela gutpela samting. Mi no save bilipim dispela ol lain bilong wanem samting tru ol i les long yu save long tim bilong ol, nogut ol i lus na yu bikhet long ol.


State of Origin em i gutpela long yumi sapotim bilong wanem em i save mekim yumi amamas na bung wantaim tasol ol birua olsem pasin bilong kros na pait i save kamap taim ol sapotas bilong tupela tim i bung wantaim na sapot.

Em bai moabeta sapos ol Blues i sindaun long wansait na ol Maroons long narapela sait. Tasol yumi ol lain i save laikim na sapotim State of Origin i mas luksave olsem dispela i gem tasol na yumi mas lukaut long filings bilong yumi na taim gem i pinis go long haus na silip na noken painim trabel long ol narapela sapota.

Mi yet mi dai hat NSW Blues sapota mi amamas tru taim Shaun Timmins i kikum fil gol na winim gem bilong Blues na mi laik toksave ol Maroons sapota husait i rit i stap nau olsem lukaut mipela bai kisim gen ya - noken kros.



Man bilong penim pes Clement Koi i penim pes bilong wanpela mangi husait i save sapotim Blues.



**Ol Top Trai Skora
bihain long Raun 13**

- Amos Roberts (Penrith) - 13
- Joel Monaghan (Canberra) - 11
- Willie tonga (Bulldogs) - 10
- Matt Cooper (Dragons) - 9
- George Carmont (Newcastle) - 8
- Anthony Minichiello (Roosters) - 7
- Ben Hornby (Dragons) - 7
- David Peachey (Cronulla) - 7
- David Simmons (Cronulla) - 7
- Eric Grothe (Parramatta) - 7
- Kurt Gidley (Newcastle) - 7
- Luke MacDougall (Souths) - 7
- Luke Patten (Bulldogs) - 7
- Reece Simmonds (Dragons) - 7
- Steven Bell (Melbourne) - 7

Husat bai namba wan neks wik?

**Strong bilong ol tim i sanap olsem
bihain long pilai bilong ol long Raun 13**


**Ol namba wan tim bilong
brukim difens bilong ol arapela tim**

- Storm
- Roosters
- Bulldogs
- Dragons
- Panthers



**Ol tim we difens bilong
ol i winim ol arapela tim**

- Roosters
- Cowboys
- Dragons
- West Tigers
- Storm



**Maroons selekta tok
Blues i strong tumas**



• Lockyer bai pilai agensim Brad Fittler. Planti manmeri bai laik lukim strong bilong tupela long gem 2.

WANPELA biknem silekta bilong Kwinslen Maroons, Gene Miles, i tok olsem sapos Fittler i go pas long ol Blues, ol Maroons bai painim hat long daunim ol.

Kwinslen i mekim tupela senis long sait bilong ol, tasol Fittler em i wanpela long 5-pela niupela pilaia i go insait long Nu Saut Wels Blues sait.

"Mi pret long ol," Miles i tok taim em i skelim sait bilong Blues.

Miles i tok em i nogat kros long kosa bilong Blues, Phil Gould i singautim bek Fittler long helpim ol Blues.

"Mi skelim olsem ol i strong moa long tim bilong ol long gem wan. Nau ol i gat strongpela sait bilong brukim difens bilong Maroons, na mi pilim olsem mipela bai painim hat long daunim ol," Miles i tok.

Ol i askim em sapos em i ting Fittler bai bagarapim pilai bilong ol Blues, tasol Miles i askim, "Wanem taim

stret yupela i lukim Fittler i bin pilai nogut long dispela level?"

Miles i tok em i wanpela gutpela pilaia stret.

Em i tok taim Fittler i pilai klostu long Brett Kimmorley (Sharks), em bai kisim planti bal na bai mekim bikipela wok bilong difens bilong Maroons taim ol i laik stopim em.

Tasol Miles i tok em i amamas long Fittler i kam bek bai em i ken traim strong bilong em agensim Darren Lockyer husat bai pilai long faivet bilong Maroons long neks wik Trinde nait.

Ol i askim tu Miles sapos em i tingting long singautim bek Gordon Tallis long go bek long helpim Maroons, tasol Miles i tok olsem ol i onaim tingting bilong Tallis long lusim rep futbol.

Tasol Miles i tok tu olsem ol bai lukluk long Lockyer long helpim ol long pilai bilong ol long traim na winim gem tu.

Fittler go bek long Blues


OLPELA kepten bilong Nu Saut Wels Blues na faivet bilong Sydney City Roosters, Brad Fittler i stap sambai long pilai makim ol Blues long namba tu gem bilong State Of Origin we bai i kamap long namba 16 de bilong mun Jun (neks wik Trinde ñait) bihain long Blues kosa Phil Gould i askim em long helpim ol.

Fittler i bin go pas long Nu Saut Wels Blues inap ong 14 pela taim olgeta olsem kepten.

Tasol tripela yia i go pinis, Fittler i bin lusim pilai long State Of Origin na Australia Kangaroos.

Gould i bin ringim meri bilong Fittler na askim em long askim Fittler sapos em i gat tingting long pilai State Of Origin yet na tok-save long em.

Fittler i bin ring i go bek na tokim Gould olsem em i redi long stap sambai tasol long lukim sapos ol silekta bilong Nu Saut Wels bai lukluk long em long



• Fittler, kam bek bilong em i givim bun long ol Blues.

stap long gem tu long Trinde Jun 16.

"Fittler i save olsem dispela em i wanpela bikipela askim tumas, tasol em i lukim olsem Nu Saut Wels i nidim em stret, bilong wanem planti pilaia bilong mipela i kisim bagarap," Gould i tok.

Fittler i bin lusim State Of Origin bihain long em i bin pinisim 2001 raun bilong Kangaroos na tok olsem em bai lukluk strong long pilai long klab resis tasol.

Long 2002, hat wok bilong em i karim kaikai taim em i karim Roosters i go long gren fainal.

Nau yet em i wanpela long ol top faivet insait long NRL, tasol ol bikman long Roosters tu i bin kirap nogut long tingting bilong em long go bek pilai State Of Origin.

Roosters kosa Ricky Stuart i tok em dispela tingting bilong Fittler bai givim liklik hevi long klab, na Sief Eksekutiv bilong Roosters Brian

Canavan i tok em i kirap nogut tu.

Canavan i tok klab i bin klia olsem Fittler bai pilai sapos Shaun Timmins na Scott Hill i kisim bagarap na i no inap long pilai long namba tu gem bilong State Of Origin.

Nau Fittler i tok olsem em bai redi long pilai State Of Origin, tingting bilong planti long ol Blues bai orait.

Timmins i gat bagarap long sol bilong em, Scott Hill i gat bagarap long baksait bilong em, na Trent Barrett tu i no pilai bilong wanem em i gat hevi long lek bilong em.


Ol arapela Blues husat inap long pilai faivet em Craig Wing (Roosters), tasol ol silekta na Gould wantaim i save laik yusim em long bens tasol.

Narapela faivet em Matt Orford long Melbourne Storm.

NSW Selekta Bob Fulton i tok olsem tok tok bilong Fittler nau em i gutpela nius bilong ol Blues na em bai strongim tim bilong ol.

Ol Top Poin Skora bihain long raun

Pilaia Poin	Tim	Trai	Gol	Fil Gol	
Michael De Vere	Broncos	6	51	-	126
Hazem El Mazri	Bulldogs	4	52	-	120
Andrew Walker	Sea Eagles	5	37	-	94
Brett Hodgson	Tigers	5	37	-	94
Brett Kimorley	Sharks	2	40	-	88
Cameron Smith	Storm	2	39	-	86
Luke Burt	Eels	4	28	-	72
Josh Hannay	Cowboys	2	31	-	70
Mark Riddell	Dragons	4	27	-	70
Ryan Girdler	Panthers	2	27	-	62



Em Tim Bilong Mi

Raun 14 NRL Dro

Fraide, Jun 14 7.30pm

Penrith Football Stadium




Penrith Panthers V St George Dragons

*Lukim dispela gem long EMTV long hap pas 8 long Fraide nait.

Sarere, Jun 12 5.30pm


Canberra Stadium



Canberra Raiders V Cronulla Sharks

7.30pm


Dairy Farmers Stadium



NQ Cowboys V Newcastle Knights

7.30pm


Aussie Stadium



South Sydney Rabbitohs V Melbourne Storm

Sande, Jun 13 3.00pm


Parramatta Stadium



Parramatta Eels V Manly Sea Eagles

4.30pm

Jade Stadium



West Tigers V New Zealand Warriors

Brisbane Broncos - Malolo
Canterbury Bulldogs - Malolo
Sydney City Roosters - Malolo

Manly kilim Panthers

WANPELA las trai bilong Luke Williamson long namba 71 minit i bin helpim Manly Sea Eagles long daunim primia tim bilong 2003, Penrith Panthers 20-12 las wiken.

Dispela win nau i strongim tingting bilong ol pilaias long pilai gut bihain long ol i tokaut olsem ol bai praive-taisim klab bilong ol bai ol inap long baim ol biknem pilaias long neks sisen.

Kepten bilong Manly, Sea Eagles, Steve Menzies i bin statim wok we i bin kamap long dispela trai bilong Williamson.

Winga bilong Penrith Brett Howland i bin traim long kikim bal taim ol i takolim em. Tasol



• Luke Williamson taim em i skorim trai bilong em.

em i kikim i go baksait taim Menzies i kisim, em i sakim rausim Penrith winga Amos Roberts na kukim i go daun long trailain bilong Panthers. Tasol-ful bek bilong Maroons, Rhys Wesser i stap long daunim em.

Menzies i tromoi bal i go long Williamson na em i tanim tanim long takol bilong Trent

Waterhouse we i bin karim em i go antap long trai lain.

Vidio refri i bin skelim na i lukim olsem i no rong bilong Williamson i mekim em i go long kamapim dispela trai.

Ful bek bilong Manly, Brett Stewart i putim ol poin gen antap long helpim ol i kisim namba 4 win bilong ol long dispela sisen.

Warriors kaikai tit long daunim Raiders

NEW ZEALAND Warriors i bin kaikai tit taim ol i daunim Canberra Raiders 20-14.

Dispela win nau em i givim strong long ol long lusim kain pilai bipo ol i save mekim taim ol i wok long lusim ol gem bilong ol.

Stacy Jones, paia lait hap bek bilong ol i soim stail bilong pilai bilong em long bipo.

Seken Rowa bilong ol, Richard Villasanti i bin kalap antap long bal bihain long Jones i salim wanpela kik i go daun insait long hap bilong ol Raiders.

Lance Hohaia i bin putim wanpela arapela trai gen pastaim long namba wan hap bilong

pilai i pinis. Tasol dispela pilai bilong Warriors tu i lukim wanpela kros pait i bruk namel long prop bilong Raiders, Jason Crocker na lok bilong Warriors, Wairangi Koopu.

Sione Faumuina bai sanap long NRL kot bihain long em i apim Joel Monaghan bilong Raiders na em i pun-daun kranki.

Kosa bilong Warriors, Daniel Anderson i bin lusim klab tripela dei pastaim long ol i bin go pilai agensim Raiders.

Taim interim kosa bilong Warriors, Tony Kemp i bin kisim wok olsem kosa, em i putim Jones i go bek long hap bek posisen bilong em.

Broncos kisim bikpela bagarap

PILAI namel long Brisbane Broncos na Cronulla Sharks i bin kamapim wanpela strong-pela pilai pait namel long tupela tim.

Long dispela pilai, Sharks i bin strong tumas taim ol i daunim ol Broncos 30-22.

Riplesmen fowet, Sam Isemonger i bin kisim bikpela pen taim em i bin kisim hevi long het bilong em long fes hap bilong pilai, tasol em i bin kam bek na pilai strong na karim ol Sharks long daunim ol Broncos.

Brisbane i bin kisim bikpela bagarap long dispela pilai. Shaun Berrigan i bin bagarapim masol long lek bilong em, Brent Tate i bin bagarapim sol bilong em na Ben Ikin i bin kisim bikpela hevi long het bilong em long namel bilong namba wan hap na Neville Costigan i bin kam insait na

pilai long dami hap posisen bilong fes i go inap long seken hap.

Nau i luk olsem Berrigan bai i no inap long pilai gen inap longpela taim liklik. Tate i bin tokim wanpela silekta bilong Kwinslen Maroons, Gene Miles, olsem taim sol bilong em i bin dai bihain long ol i bin takolim em, em i no pilim wanpela samting.

Tasol bihain long pilai, em i tok olsem sol bilong em i bin kam bek na em i orait.

Kosa bilong Brisbane, Wayne Bennett i tok olsem Berrigan na Tate bai i no inap long pilai long namba tu gem bilong State Or Origin, tasol Miles i tok olsem nem bilong Tate bai i stap yet insait long Kwinslen skwat, tasol ol bai wet long kisim toktok bilong dokta long Trinde long dispela wik.



• Michael Sullivan bilong Sharks i bin helpim ol long daunim ol Broncos.

Kosa bilong Cronulla, Stuart Raper i tok olsem Isemonger i bin kisim 110 stits taim ol dokta i samapim het bilong em bihain long em i kisim bagarap.

Em i bin kam bek long fil wantaim het gad bihain long ol i samapim het bilong em na

skorim tupela trai long seken hap insait long 7-pela minit.

Brisbane i bin lid long namba wan hap, tasol long seken hap, Sharks i kam bek na i go antap long 30 poin.

Dispela gem i bin wanpela gutpela gem tru we planti stail pilai i bin kamap.

Poin Lata bilong NRL bihain long Raun 13

Namba	Klab	P	W	D	L	B	PF	PA	PTS
1	Roosters	12	9	0	3	1	324	186	20
2	Bulldogs	12	8	0	4	1	322	265	18
3	Broncos	12	8	0	4	1	303	250	18
4	Panthers	12	8	0	4	1	308	259	18
5	Storm	12	7	0	5	1	346	248	16
6	Wests Tigers	12	6	0	6	1	243	242	14
7	Knights	12	6	0	6	1	273	273	14
8	Sharks	13	7	0	6	0	296	340	14
9	Cowboys	11	4	1	6	2	192	200	13
10	Dragons	13	6	0	7	0	308	221	12
11	Raiders	12	5	0	7	1	247	284	12
12	Eels	12	5	0	7	1	243	336	12
13	Sea Eagles	12	4	0	8	1	281	328	10
14	Warriors	12	4	0	8	1	218	310	10
15	Rabbitohs	11	2	1	8	2	163	325	9

P: Pilai, W: Win, D: Dro, L: Lus, B: Bye o malolo, PF: Poin Fo, PA: Poin Agens, PTS: Poin

Lukim neks wik long moa NRL stori na poto

Spots ken kamapim ol gutpela manmeri

Paul Zuvani i raitim

LAS tupela wiken i go pinis mipela i lukim, harim na ridim nius long SP Brewery long em i wokbung wantaim Papua Niugini Spot Federe-sen na givim awot long ol biknem spotman-meri o ol manmeri husat i mekim gut long spot. I gat bikpela amamas long ol lain husat i winim ol awot. Tasol yumi i inap save wanem samting ol i kisim o painim taim ol i pilai spot. Hia em sampela tingting long helpim mipela long luksave long bikpela wok bilong spot.

Bihainim tingting bilong Unaited Nesen we i tok spot em i samting bilong kamapim developmen na wanbel pasin, Papua Niugini nau i gat nupela spot polisi.

Dispela nupela polisi bai mas lukim ol pipel bilong PNG i gat gutpela helt, go long skul, i gat bel isi sindaun na i gat tingting long stap long strong bilong ol yet.

Dispela spot polisi- Spot Polisi 2004 na Plen 2004-2008 em Minista blong Komuniti Afeas na Spot Ledi Carol Kidu i tokaut long en taim ol i ridim toktok bilong em long nait bilong 2004 SP Spot Awod long Crowne Plaza long las tupela wiken i go pinis.

Long toktok bilong em Ledi Carol i tok kain sindaun long kantri we ol manmeri i pas long ol pasin olsem spak, kisim smuk nogut na i no was gut long bodi bilong ol we i lukim sik HIV AIDS i go bikpela we nau i mekim komuniti i wari. Na olsem Dipatmen bilong em husat i wok bung wantaim ol grup i pas long wok bilong spot long kamap wantiam dispela polisi long helpim ol pipel.

Em i tok spot helpim olgeta samting long laip bilong man, long bodi, tingting na spirit.

"Pasin bilong stap insait long pilai i developim ol yangpela long kamapim gutpela helt long bodi na tingting na mekim ol i wok bung wantaim narapela narapela," toktok bilong Ledi Carol i tok.

"Em (spot) i kamapim sans we ol manmeri i pilai na soim strong, save na opim tingting bilong ol.

Em i tok polisi bilong Unaited Nesen long spot i tok olsem spot i gat strong na olsem em i wanpela samting we komuniti i yusim long

kamapim developmen na wanbel pasin.

Long wanpela painim aut wok we UN i bin mekim i no longtaim i go pinis i painim olsem spot i kamapim sans we ol manmeri taim ol i pas long spot i lain long ol samting olsem disiplin, bilip long ol yet na lain long kamap gutpela lidaman.

Moa long dispela long spot manmeri i ken painim pasin bilong skelim tingting, wok bung wantaim na rispektim ol yet na ol narapela.

Long spot manmeri i ken kirapim tingting bilong kamapim samting ol yet na wei bilong lukautim gut samting.

Spot em i tokples we i bungim wan wan ol man na komuniti we kain bung i mekim ol manmeri i luksave long ol pasin na tingting we i wankain na bungim pasin tumbuna na kastom wantaim.

Tasol dispela kain sindaun Ledi Carol Kidu i tok i no inap kamap nating sapos i nogat gutpela plen bilong kamapim kain bung we i kamapim kain sindaun.

Na olsem Dipatmen bilong em i mas sindaun wantaim olgeta grup we i pas long wok bilong spot long kamapim dispela nupela polisi.

Em i tok kain pasin we SP Brewery i mekim gutpela long wanem em i givim tingting long ol manmeri long stap insait long spot na long traime moa yet long kamap gut long pilai bilong ol.

Em i givim tok tenk yu long SP Brewery long kamap wantaim kain tingting olsem.

"Dispela tingting (SP Spot Awod) i mekim na planti ol spotmanmeri bilong mipela i tren pilai hat long kamap strong long pilai bilong ol," em i tok.

Long wankain taim Nigel Yeo, Jenerol Menesa bilong SP Brewery i tok SP Spot Awod tingting i bilong luksave na givim amamas long ol gutpela spotmanmeri bilong mipela.

Em i tok bihainim gutpela sindaun we ol manmeri i painim taim ol i pilai spot Brewery i mas painim we long strongim na pulim tingting bilong ol manmeri long pas long pasin bilong pilai spot.

"Olsem na bikpela toktok bilong mi em i



• Biknem PNG na Wol amata kikboksing sempion Stanley Nandex i danis long stes taim em i autim tiken bilong wanpela Australia paitman i no longtaim i go pinis long Sidney.

olsem- wok hat, traime long kamapim gutpela pilai na olsem yu ken lukim na kisim kaikai bilong dispela," em i tok.

Ol samting insait long spot:

Namba wan samting ol manmeri i kisim taim ol i pilai spot em amamas. Ol i save kisim amamas. Sapos manmeri i mekim wanpela bikpela wok em i malolo na wanpela samting em i mekim long mekim tingting bilong em i kisim gutpela malolo em long pilai spot. Namba tu samting em manmeri i painim o kisim long spot em- gutpela helt.

Taim manmeri i pilai em ol i save rausim olpela blut bai nupela blut ol i kisim long kaikai samting i ken ron gut na bodi i ken wok gut. Wankain olsem oil bilong ka. Man i rausim olpela oil bilong ka bai nupela oil i ken helpim enjin bilong ka i ron gut.

Namba tri samting em bungim na painim ol poroman.

Taim ol manmeri bilong narapela narapela hauslain, tokples, kala o bilip i kam bung wantaim long pilai spot ol i painim na mekim nupela ol pren.

Planti taim dispela ol bung na poroman pasin i save mekim wanbel pasin.

Na olsem mipela i ken tok narapela samting em ol manmeri i ken painim long spot em wanbel pasin.

Narapela bikpela samting em spot i helpim tingting long go op, lukim laip na lainim samting.

Dispela em i bikpela samting long ol skul manmeri. Ol sumatin i kamap smat long lainim samting taim tingting bilong ol stap strong na op long lainim samting.

Spot long nesenel gol insait long Mama Lo bilong mipela:

Long nesenel gol namba wan, tu na faiv em i tok: "Sapos olgeta man, meri na pikinini long taun, long ol siti na long ol ples long Papua Niugini i luksave long bikpela wok bilong spot na oltaim painim wei long stap insait long kamapim gutpela helt long bodi na long tingting (mentol) mipela inap long daunim ol sosel hevi bilong mipela wei planti mani i no ken lus

nating long wok bilong haus sik na lo na oda.

Na olsem mani i ken i go insait long wok bilong edukesen na wok bilong agrikalsa, rot na ol bris."

Gol namba wan i tok long Integrol Human Developmen. I olsem olgeta manmeri i ken luksave long strong na save bilong em na mekim em yet i fri long kain kain ol lo na pasin i passim rot bilong em long kamapim na mekim ol samting.

Gol namba tu i tok long Ikuaiti na patisipesen. I olsem olgeta man na meri i mas kisim o painim wankain ol samting long ol developmen i kamap long kantri.

Na gol namba faiv i tok long Wei bilong Papua Niugini. I olsem long wok bilong politik, sosel o iekonomik yumi bai mas mekim ol samting kamap aninit long ol dispela samting insait long wei bilong mipela yet.

Olsem na sapos gavman o ol manmeri i toktok long givim sapot long spot developim manmeri long kamap tru tru olsem man dispela em i bikpela samting. I nogat tupela tingting long dispela tingting.

Sapot i kam long komuniti na gavman:

Long tokaut mipela i tok olsem sampela gutpela helpim long spot i kam long komuniti, long ol bisnis lain na gutpela manmeri. Tasol long gavman mipela i no lukim yet gutpela helpim. Gavman i givim liklik helpim tasol.

Spot wankain olsem long ol narapela bikpela samting long laip olsem kaikai, ples bilong silip, wasman (sekyuriti), kamapim pikinini (riprodaksen), long lainim samting na long kamapim ol samting i laikim helpim.

Long dispela as mipela i tok spot i bikpela samting. Em i mas kisim gutpela sapot long komuniti na gavman wantaim.

I gutpela tru mipela i gat Ledi Carol husat i luksave long bikpela wok bilong spot na olsem em i wok strong wantaim ol opisa bilong em long helpim na kamapim wok bilong spot.

Mipela tu long sait bilong ol pipel i mas helpim ol opisa we kainkain pasin nogut olsem pait na bagarapim samting i kamap taim mipela i pilai o kros long wanpela samting.



• Sampela ol netbol pilaia long Pot Mosbi netbol tim i tren long Ela Bis spot kot long wiken.

26 lig asosiesen i baim registresen

Joe Ivaharia i raitim

LONG dispela yia moa long 26 ragbi lig asosiesen insait long kantri i affiliate long Papua Niugini Ragbi Futbol Lig, PNGRFL jenerel menesa Joe Tokam i tok.

Em i tok yumi i stap insait long mun Jun na insait long mama lo bilong (PNGRFL) registresen bilong ol teknikal opisel na ol pilaia bai pas long Jun 30 long pinis bilong dispela mun.

Tokam i tok 14pela lig i rejisterim pinis ol sinia na junia pilaia bilong ol tasol sampela klab insait long wan wan ol lig i no rejisterim ol teknikal opisel bilong ol yet.

Insait long enuel jenerel miting bilong PNGRFL we i bin kamap long Lae long Febuari 28 dispela yia 16pela presiden bilong ol lig husat i bin stap insait long dispela miting i bin kisim tok long rejisterim ol opisel na pilaia long ol namel long mak ol i makim pinis insait long PNGRFL kalenda bilong dispela yia.

Em i tok tu olsem ol sampela ol administreta long ol wan wan asosiesen i wok long larim yet ol pilaia bilong ol long pilai insait

Pasin bilong ol asosiesen long rejisterim ol teknikal opisel na pilaia we i wok long slo tumas olsem na PNGRFL i kenselim ol ragbi lig Zon sempionsips we i sapos long kamap long Jun 26-27 (Momase na Hailans) na Julai 10-11 (Sauten na Ailans).

long kompetisen bilong ol maski ol i no rejista na dispela em i krangi na i no stret.

Em i tok long kain pasin bilong ol asosiesen long rejisterim ol teknikal opisel na pilaia we i wok long slo tumas PNGRFL nau i kenselim ol ragbi lig Zon sempionsips we i bin sapos long kamap long June 26-27 (Momase na Hailans) na July 10-11 (Sauten na Ailans).

Em i singaut nau i go long ol asosiesen long hariap na rejisterim ol teknikal opisel na pilaia bilong ol long wanem taim i wok long

sot we dei bilong baim pinis Jun 30 i kamap klostu nau.

Long seim taim tu Tokam i tok olsem ol wanwan asosiesen husat i baim pinis olgeta affiliesen na registresen fi bilong ol bai i gat sans long pilai insait long Nesenel ragbi lig sempionsip we bai i kamap long Lae long namba tri wik bilong mun Septemba.

Ol affiliet lig wantaim namba bilong ol rejista pilaia long wan wan ol divisen em Bialla husat i gat sikspela klab i gat 241 sinia pilaia, 147 Anda 19 na 140 Anda 17 pilai, Buka sikspela klab na i nogat wanpela bilong ol i rejista yet, Bulolo (6), (77) (43); ENB (12), (235), (251), 268; Gumune (6-pela klab na i ol pilaia i no rejista yet. Goroka (11 klab), 46 sinia pilaia, 25 Anda 19; Kainantu sikspela klab na ol pilaia i no rejista yet. Kiunga i gat faivpela klab, 226 sinia pilaia, 80 Anda 19 pilaia na 87 Anda 17 pilaia. Kimbe i gat eitpela klab, 199 sinia pilaia, 146 Anda 19 pilaia na 142 Anda 17 pilaia. Koiari i gat sikspela klab, 237 sinia pilaia, 122 na Anda 19. Kundiawa i gat sevenpela klab na i nogat wanpela pilaia bilong ol i rejista yet. Lae i gat

13pela klab, 420 sinia pilaia, 134 Anda 19 na 137 Anda 17. Madang i gat sikspela klab, 74 rejistet pilaia, 28 Anda 19 na 28 Anda 17. Magarima i gat sikspela klab, 51 sinia pilai. Mendi i gat sikspela klab, 272 sinia pilaia na 132 Anda 19 pilaia. Mt. Hagen i gat eitpela klab na 16pela rejistet sinia pilai. Nondugl i gat sikspela klab na i nogat wanpela bilong ol i rejista. Pangia i gat sikspela klab na inogat wanpela bilong ol i rejista.

Porgera i gat nainpela klab na 170 sinia rejistet pilaia. Popengetta i gat sikspela klab we i nogat wanpela pilaia bilong ol i rejista yet. Poreporena i gat sikspela klab, 100 sinia pilaia, 58 Anda 19 na 84 Anda 17 pilaia. Pot Mosbi i gat 13 klab, 741 sinia pilaia, 52 Anda 19 pilaia na 66 Anda 19 pilaia. Ramu i gat sikspela klab, 116 sinia pilaia, 31 Anda 19 pilaia na 35 Anda 17 pilaia. Tabubil i gat sikspela sinia klab, 368 sinia pilaia na 156 Anda 19 pilaia. Wau i gat sikspela klab na i nogat wanpela pilaia bilong ol i rejista yet na Wabag i gat sevenpela klab, 189 sinia rejista pilaia na i nogat rejista pilaia long Anda 19 na 17 i rejista yet.

Los Negros soka klab

Paulus Tali i raitim

NUPELA Pot Mosbi Soka Ssosiesen soka klab Los Negros Soka Klab i affiliet piris wantaim Pot Mosbi Soka Asosiesen long las Sarere.

Ol eksekutiv em presiden Ezekiel Pawai, vais presiden Luke Pomaleu, sekreteri James Kiele na tresera Mary Handen. Ol narapela opisa em hed kosa Chilen William, namba tu kosa Jackson Ngahan na tim menesa Kila Polume.

Long kamap long taim bilong ileksen em presiden bilong Los

Negros Lokel Level Gavman na provinsi siaman bilong Works na Infrastraktsa; Komunikesen na Enesi Hon Paul Pokolou.

Pokoļou i givim K100 olsem mak bilong sapot.

Em i tok tingting bilong kamapim klab i gutpela long wanem em bai bringim spirit bilong wok bung namel long Los Negros komyuniti long Pot Mosbi.

Nupela presiden Ezekeil Pawai i amamas long kamap bilong klab na tu long kamap olsem presiden i tok strong olsem em i laikim gutpela wok

bung pasin long stap insait long klab bai klab i ken kamapim gutpela ol pilai insait long resis na long kamapim gutpela sindaun long Pot Mosbi soka na long Los Negros komyuniti.

Em i tok tenk yu long kaunsil presiden Pokolou long sapotim klab wantaim mani em i givim we bai helpim ol tru.

Los Negros soka klab i gat pilaia i kam long Mokerang, Papitalai, Naringle, Lolak, Loni na Lombrum.

Olgeta dispela ples i stap long Los Negros konstituensi.

Waliya stap strong yet long SP Mosbi ragbi lig resis

Joe Ivaharia i raitim

POST PNG Waliya i wok long sanap strong yet long winim gen taitel bilong Pot Mosbi ragbi lig long dispela yia. Dispela em bihain long ol i bin winim gen PRK Souths 20-12 long mein gem bilong PRL long Sande apinun.

Tasol dispela win i no mekim wanpela tenis bilong ol long kompetisen poin lata bikos ol i stap long namba tu ples bihain long Dobo Warriors husat tu i bin winim Magani 22-12.

Bihain long dispela raun 14 pilai tupela tim wantaim i stap long 22 poin tasol Warriors i go pas long gutpela pesentes rekot.

Long ol arapela risal Kone Tigers wantaim nupela yunifom bilong ol i amamasim nupela sponsa Ponderosa Hotel wantaim win taim ol i autim Royals 18-08, PCS West i kam bek gen wantaim win ananit

long lukaut bilong nupela kosa Sam Kaia taim ol i autim Indies DCA 32-30, Millinium Brothers i nekim Defence 30-20 na Wari Vele Hawks i palai antap long ol Paga Panthers 22-14 long gem long Sarere.

Poin teibel i sanap nau olsem Millinium Brothers long namba tri ples (20), PRK Souths (19), Wari Vele Hawks (15), Kone Tigers (14), Defence (14), Hekari Tarangau (12), Indies DCA (12), Magani (11), PCS West (11), Royals (7) na Paga Panthers (4).

Long mein gem PRK Souths i no westim taim long fil we ol i bin laik amamasim nupela yunifom bilong ol taim ol i salim fulbek James Kolopu i go insait long skorim namba wan trai bilong ol na go pas long skoa 4-0. Ol bik nem fowet bilong ol olsem Joseph Omai, Joshua Steven, Alex Haija, John Freeway, kepten John Pandia.



Redi long pilai
...Anda 15 tim bilong June Valley Praimeri Skul i redi long pilaim POMIS long Pot Mosbi Skul soka kompetisen.
Foto: JOE IVAHARIA

Ragbi lig long Madang taun i no go het inap tupela wik

Paul Zuvani i raitim

OL RAGBI lig pilai long Madang taun kompetisen i no go inap tupela long wanem sampela ol pilaia i no rejista.

Dispela ol hevi i kamap long taim we PNG Ragbi Futbol Lig i tokaut long olsem em i stopim go het long ol pilai bilong Zone Sempionsip long wanem ol pilaia i no regista.

Madang Lig seketeri/tresera Max Kitao i tok tripela bilong ol sikspela klab tasol i soim olsem pilaia bilong ol i rejista.

Dispela ol klab em 2003 sempion LBC Diwai, ranap Hawks na Brothers.

Ol opisa bilong lig i stopim ol pilai tupela wik i go pinis long wanem em bai brukim lo sapos ol i go het long holim ol pilai.

Ol opisa i tok ol bai statim gen ol pilai sapos olgeta pilaia bilong

klab i baim registresen fi bilong ol.

Kitao i tok long Fonde las wik toksave i bin kamap long pepa olsem tripela ol klab i baim pinis fi bilong ol na tok i stap long narapela ol tripela klab long ol pilaia bilong ol i mas baim affiliesen fi bilong ol.

Tasol opisa i tok inap nau i nogat wanpela tenis i kamap long dispela ol klab.

Ol narapela klab we i mas lukim olsem pilaia bilong ol i regista em Newtown Panthers, Royals na Tarangau.

Kitao i tok i moa gutpela olsem dispela ol klab i baim fi bilong ol long lukim ol pilai i go het.

Tasol em i no amamas long wanem em i tok taim pilai i kamap kain kain ol yangpela pilaia i go insait na pilai.

Dispela em i tok i brukim lo.

"Ol i no inap long go insait tasol na pilai.

"Ol i mas bungim olgeta samting em PNGRFL i askim long em bipo long ol i go insait na pilai," Kitao i tok.

Em i tok stat long dispela yia eksekutiv bilong lig i no laik long givim moa sans long kain pilai we ol pilaia na ol klab i no bihainim gut ol lo bilong pilai.

Tasol bikpela wari bilong eksekutiv em i olsem sapos ol klab i go het long mekim kain pasin olsem laik bilong ol bisnis haus husat i laik sponsorim na sapatim ol klab bai lus.

Long dispela as em i kisim dispela taim long askim wan wan ol klab long soim gupela pasin na spirit bilong spot long hevi ol i gat long en na tokaut stret bai helpim i ken go. Madang i gat gutpela kompetisen.

Ol meri Wau i redi long PNGFA soka sempionsip

Egareka Greg Noine i raitim

KLOSTU olsem 18 Wau soka meri i redi long soim strong bilong ol long dispela wiken PNGFA soka sempionsip.

Oganaising komiti i tok olgeta samting i redi long tasol long tim i go kamap na pilai.

Tim menesa Catherine Tobem i tok olgeta pilaia i redi na i bilip Wau bai mekim sampela nois long dispela tonamen maski ol biknem asosiesen olsem Pot Mosbi, Lae o Madang.

Em i tok meri husat bai go pas long tim em midfila Dianne Aissah na tupela straike Martha Yang na Rachael Lenny. Na long Raksait em Nancy Aissah na Fiona Haro bai lukautim.

Em i tok moa olsem

em i gat bilip long tim bilong em na i givim tok lukaut long ol tim long Pot Mosbi, Lae, Madang na Tabubil long was long ol yet.

"Olgeta pilai i bin redi na i bilip Wai bai mekim sampel nois long dispela resis."

Long narapela nius nupela Wau Basketbol Asosiesen i statim pinis sisen propa bilong em we long las wik i lukim namba wan raun bilong em.

Long mein pilai Nami i rausim tiket bilong Kunai 21-16.


Kepten Kelly Mainiwe i pas long tim long opim skoa poin bilong em taim em i putim basket long wantaim tupela

poin. Bihain long dispela Nami i surukim yet skoa bilong ol. Kunai long narapela sait i traim long pait bek tasol i painim hat long wanem banis bilong Nami i strong moa.

Tupela tim i pilai olsem yet inap long klostu long namel bilong fes hap we i lukim Kunai i kisim tupela poin bilong en. Long dispela taim Nami i gat 10 poin pinis.


Long hap malolo Nami i go pas wantaim 11 poin na Kunai i putim narapela tupela basket long go bihain wantaim siks poin.

Bihain long hap tupela tim i kam bek na kamapim gutpela pilai tasol strong bilong Nami i strong moa we i lukim ol i pinisim pilai bilong ol wahtaim 21 poin na Kunai i pinis wantaim 16 poin.



WANTOK

Spots



Ol meri brukim bun long Madang

Salens bilong PNGFA kap long dispela wiken

Joe Ivaharia i raitim

BIKPELA pilai bilong ol meri bai i kamap long Madang we Papua Niugini Futbol (soka) Asosiesen i kamapim Nesenel soka sempionsip bilong ol meri.

Moa long 12pela asosiesen i tokaut pinis long laik bilong ol long kam na pilai insait long dispela sempionsip we bai i kamap long dispela kwins betdei wiken Jun 11-14.

Ol asosiesen em Pot Mosbi, Lae, Lahi, Bulolo, Wau, Boana, Kimbe, New Britain Palm Oil, Goroka, Popondetta, Manus na Madang.

Enga, Mt.Hagen, Kaiapit (KDSA) na Bell soka asosiesen i no tokaut yet long laik bilong ol sapos ol bai kamap o nogat.


Presiden bilong Madang soka asosiesen Clement Kongate i tok olgeta wok bilong stretim ol samting bilong tonamen i wok long go het na man husat i go pas long dispela oganaising komiti em Benny Bango.

Kongate i tok ol bai yusim tupela soka fil long Laiwaden oval we dispela i moa beta long wanem tuepla i stap long namel bilong taun na long wankain taim bai ol i ken luksave long sait bilong sekuriti bilong ol meri pilaia.

Em i tok ol i gat dispela wik tasol long redim olgeta samting bipo long ol tim bai i kam long Madang.

Ol tim bai stat long kam long Madang long Fonde Jun 10 we bai i gat wanpela menesmen miting bipo long ol pilai i stat long tumoro.

Em i tok tu olsem ol i makim pinis John Gringo olsem tonamen dairekta bilong dispela sempionsip.



• Desmond Kaumu long wanpela pilai bilong em wantaim A gred tim bilong Cairns Cobras pilai. Hia yangpela Kaumu i traim long ronowe long ol birua pilaia bilong em.

Tupela PNG osi rul pilaia i kisim ples long pilai long ol Cairns tim

Paul Zuvani i raitim

DESMOND Kaumu na Glen Tom i kisim ples long pilai long Cairns osi rul tim.

Dairekta bilong AFL PNG Dvelopmen opisa Scott Reid i tok Kaumu nau bai pilai long sinia tim bilong cobra klab na Tom bai pilai long Anda 18 sait.

Em i tok tupela manki ya i kisim ples bihain long gutpela pilai bilong ol.

"Mipela i amamas long ol tim na klab bilong Australia long luksave long strong bilong mipela long pilaim osi rul. Na olsem wantaim gutpela pilai bilong ol klab bilong Australia nau i ken kisim moa ol pilaia bilong mipela long strongim osi rul pilai hia long kantri," Reid i tok.

Em Alester Sioni tasol i abrus long kisim ples long wanem em i kisim bagarap long wanpela pinga bilong em.

"Tupela hia i stap long Cairns Siti Cobras Anda 23 tim na bai pilai wantaim Townsville long dispela Kwins Bed De. Wantaim Cobras ol narapela tim olsem Is Kwinsten, Rockhampton, Bunderburg, Townsville na Darling Downs.

"Dispela tupela manki i stap long Cairns stat long Jenuari dispela yia.

Long dispela taim we tupela i ya i wok long redi long pilai long dispela ol gem Reid o tok PNG Anda 14 sait tu i redi long pilai long Cairns AFL Anda 14 tonamen long dispela wiken.

PNG tim bai lusim kantri tumoro we long Sarere ol bai pilai namba wan pilai bilong ol wantaim Cape Crusaders. Long Sande moning ol bai pilai wantaim Capricorn na long apinun ol bai pilai wantaim Bunderburg White Bay.

Sapos ol i winim olgeta tripela pilai ol bai i gat sans long go insait long gren fainol. Sapos nogat ol bai pilai tasol long kisim wanpela ples.

Anda 14 tim em: Eddie Tilik (kepten), Jason Katmali, Phelan Chemote, John Kolongo, Oglia Pena, Amua Pirika, Nicky Kera, Ivan Kala, Leslie Gere, Trevor Jessie, Graham Teddy, Sebastian Mambo, Julio Hauta, Ryan Vincent, Breno Beno, Kingsley Bui, Elliot Manjamba, Ellison Manjamba, Noah Yangen, Ivan Tamu, Francis Pasliu, Andrew Louis na Jeremiah Ovia. Ol opisa em Cornelius Papali (kosa), namba tu kosa Joe Maggio, trena Bernard Gerson, tim menesa Dominic Kaumu na tua menesa Justin Karcha.

RAMU SUGAR ... EM I SWIT MOA

RAMU SUGAR

'Naturally Sweet'

Ramu Suga nau ikam long yu long niupela paket. I gat nau long 250g, 500g and 1kg paket. Painim niupela paket long stoa klostu long yu.



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.